

LUKA

Olaa Biene Wɔ Di Luka Lakpana Nii

¹ Obiloo Tiofilo, batii kpinwu lekpee ɔnyeeɛ bɛɛbla mmle baafuo nii, bɛɛkpana lesaa biala niawa ni kaamee loo bɛɛte. ² Baakpana nya baate fe mmle baatii ba nianya ni asaa ya mmle ku anu lema kaasɔ kakyekɔ latɔkɔ wo nii, ku mba kafɔɔ nia buɛ nwu nii. ³ Nkpo oso, bienete Tiofilo, ta nntoobuo di asaa ya mmle kame nwaa lenu ni diɛyɔ ni kaasɔ kakyekɔ oso, ntɔɔbla disibu nlɛ, dile ale kakpana nya fe mmle diawa ni klekle nta fɔ. ⁴ Kɔbla nle mmle ta mmle faatofo ni onukware omuu wɔ ninsi ni di asaa ya baatootuo fɔ ni suoto.

*Baayie Yohane Yaa Ntu Kpeesate Olofobee
Lekya Baate.*

⁵ Di obe wɔ kame di Herode latoole ni sekə di Yudea kasɔ suoto, Yaa oletate onwii lawɛ baatɔɔlɛɛ nwɔ ni Sakaria. Aakye olebatate dikudi le manlɛɛ ni Abia kame. Sakaria wɔ mmle ɔɔfɔ baatɔɔlɛɛ Elisabet ne. Nnwɔɔ kafɔɔ aakye Yaa oletate wɔ baatɔɔlɛɛ ni Aaron kafaabi kame. ⁶ ɔsa ku ɔɔfɔ wɔ mmle, baasisie nkpa biene di Yaa anu. Baale kafɔɔ Saate afiofa nwu amuu, baakyɛ di sisuku nɔɔ suoto. ⁷ Batii ba mmle ditawɛ obi kuonwii, diekye Elisabet ɔlema aale. Banyɔ lema kafɔɔ batoobe beefū aleɛ kpinwu.

⁸ Dii ninwii, Sakaria latɔɔbla ɔkpe nɔɔ fe oletate di Yuda batii Olekatakɔ, diekye dikudi

lema suoto nfε diadu. ⁹ Diekye, di olebatatε ɔsaabla kanya, baawii atrebi baadiki Sakaria ale akyε Yaa Olekatakɔ aalaafie odufii di Yaa oleɔta akyikye suoto. ¹⁰ Obe wɔ aawε ni ninfa aatoofie ni odufii nwu, batii dikudi bule kafɔɔ lawε kaayi baatɔɔpe ɔlaa baatɔɔta Yaa.

¹¹ Ninfε di Yaa tɔkyente onwii lakyɔɔ di oleɔta akyikye oletanεεkyε, aadiki suoto aatuo nwɔ di obe wɔ aye ofie ni olufii nwu. ¹² Di Sakaria lanyɔɔ nii,aabla tro, leyεke lapε nwɔ osie kanya. ¹³ Kafɔɔ Yaa tɔkyente nwu latɔkɔ nwɔ ale, "Sakaria, tanyεke! Yaa ntoonu fɔ ɔlaa ɔpε, ɔsɔfɔ lefɔ Elisabet malofo obi suɔtɔbi anta fɔ. Faatika nwɔ leyooto fale Yohane. ¹⁴ Suoto mayɔɔ fɔ osie kanya se beelofo nwɔ. Nkpo okle kafɔɔ di suoto mayɔɔ batii kpinwu ne. ¹⁵ Aba le otii finle di Yaa anu. Atannyi wanyi ee nta siene kunwii. Ni dibayo ni di olofobee nɔɔ, Ninwuna Klekle mayii nwɔ kame po. ¹⁶ Nnwɔɔ nimakplesa Israel batii kpinwu anwako Saate Yaa lema nfū ne. ¹⁷ Abale Saate katū anwa di osie ku sɛkambi kame fe mmle di Yaa ɔlaa Buɛtɛtɛ Elia late nii. Di lewa nɔɔ kame abalolaa babi ku bate ntεε. Abata batokopite disibu nkyi mambu disi fe batii klekle. Abalolaa kafɔɔ Saate batii nɔɔ mansie mansoko nwɔɔ."

¹⁸ Ninfε di Sakaria lakaale Yaa tɔkyente nwu ale, "Be nimata nfū ɔlaa wɔ mmle nnu? Diekye ntoobe kofokofoko, ɔsɔfɔ nii kafɔɔ ntoobe laakpa nwu."

¹⁹ Ninfε di Yaa tɔkyente nwu latɔkɔ nwɔ ale, "Ami ninle Gabriel wɔ ninyila ni di Yaa anu ne. Nnwɔɔ niekpee mi ale, matɔkɔ fɔ ɔlaa biene wɔ mmle ne. ²⁰ Kafɔɔ faafū mi ɔlaa wɔ mmle

nimawa ni kaanya di obe biene kame fanu. Ta nkpo oso fabakple omumu flabasinfo ɔkakate, diɛlase di obe wɔ kame di ɔlaa wɔ mmle kɔtɔkɔ fɔ ni lewa ni kaanya.”

21 Di obe wɔ kame diɛ asaa ya mmle amuu latɔwa nii, diabla batii ba niayila ni kaayi baasoko ni Sakaria ɔkpɛ. Diekye batatofo lesaa le oso aatɔɔkɛ ni di Yaa Olekatakɔ nwu nkpo. **22** Obe wɔ nfɛ di Sakaria ladie ni di Yaa Olekatakɔ nwu, atafuo ma ɔkakateko. Nioso nnɛɛ nfɛ aatoowiwi aayɔ aatɔɔkakateko ma. Nioso batatofo ale, odiki otu aanya.

23 Obe wɔ di Sakaria ɔkpɛ ɔbla ntooloo ni di Yaa Olekatakɔ nwu, aadie ninfa aasifi leyo. **24** Ni di obe owo kame, ɔsɔfɔ nɔɔ Elisabet labalaka lɛmɛ, aawofasa suoto awente anɔɔ amu, atadie kayi. **25** Ninfe di Elisabet labue ale, “Nunua, Yaa ntoole mi sibuale, atootekete mi sinunṣɔ di suoto di batii anu.”

Baayie Yesu Olofobee Lekya Baate.

26 Di awente akuɔ kame nfɛ di Elisabet nlaka ni lɛmɛ, Yaa lakpee tɔkyente nɔɔ Gabriel ale akyɛ okpoo wɔ bɔɔlɛɛ ni Nasaret, di Galilea kasɔ suoto. **27** Yaa tɔkyente wɔ mmle layɔ kanya aakyenku kakpeelebitɛ ka baakaale baata ni osuɔtɔ wɔ baatɔɔlɛɛ ni Yosef, aakyɛ ni ɔka Dawid kɔna kame. Kakpeelebitɛ nwu leyooto niale Maria ne. **28** Yaa tɔkyente nwu lawa Maria nfū aabatɔkɔ nwɔ ale, “Kɔseɛsa fɔ! Saate nwu nsiko fɔ, eekusɛkusesa fɔ kafɔɔ.”

29 Yaa tɔkyente wɔ mmle ɔlaa wɔ aatɔkɔ ni Maria latɔɔ disibu, diekye atanu ɔlaa nwu kasɔ. **30** Ninfe di Yaa tɔkyente latɔkɔ nwɔ ale, “Maria,

tanyekε, diekye Yaa ntoole fɔ sibualε. ³¹ Fabalaka lemε, fanlofo obi suotobi, fantika nwɔ leyooto fale Yesu. ³² Abale otii kple, babaleε nwɔ ale Yaa wɔ ninlenke ni petee Obi. Saate nɔɔ Yaa mase nwɔ sekε fe mmle aase ni ɔwa nɔɔ Dawid. ³³ Abale sekε di Yakob kɔna kame obe lele. Diidii sekε kalekɔ nɔɔ nnaa kaloo.”

³⁴ Nfa nfe di Maria lakaalε Yaa tɔkyentε nwu ale, “Lε nfe di nle mmle mawa kaanya, ninanye ni osuɔtɔ?”

³⁵ Nfa nfe di Yaa tɔkyentε nwu ladiki kanya ale, “Ninwuna Klekle mawafɔ di suoto, Yaa wɔ ninlenke ni osie kafɔɔ matikafɔ di suoto. Ta nkpo oso Obi Klekle nwu fɔɔwa ni ɔbalofo, baaleε nwɔ ale, Yaa omu Obi. ³⁶ Nunua, komie nle fatofo fale, leyo lee kame ɔsankɔ wɔ ninle ni Elisabet bɔɔlεs ni ɔlema, nfe alaka lemε, nu atoobe nkpo. Kowente kuɔnle nɔɔ nfe asi ni ne. ³⁷ Diekye lesalesaa nnaa Yaa osie ku ɔbla.”

³⁸ Ninfε di Maria latɔkɔ nwɔ ale, “Nyu lo, Saate kpɛmblate nle. Abla aateε fe mmle okle feebue ni.” Ninfε di Yaa tɔkyentε nwu lasifi aadiε nwɔ ne.

Maria Lakyε Elisabet Nfū.

³⁹⁻⁴⁰ Di ayi nwu kame Maria lataka aapεsεwa aalolaa suoto, aakyε okpoo onwii di Judea kasɔ di kabokoe suoto, aalaabuo Sakaria leyo, aasεesa Elisabet. ⁴¹ Diawa ale obe wɔ di Elisabet lanu ni Maria lesεesa, obi wɔ ninsi nwɔ ni kaafutu kame lakpε. Nfanwu Ninwuna Klekle niayii Elisabet kame po. ⁴² Ninfε aakakate aabue osie kanya ale, “Beekusεkusεsa fɔ di basanko bamuu kame, beekusεkusεsa kafutu lefɔ kame obi kafɔɔ! ⁴³ Sεmεmbuale ninle nse, ale, Saate

nii ɔya kawa amasεεεε? ⁴⁴ Di obe wɔ kamε fεεkyako mi ni ɔseesa, nfanwu obi wɔ ninsi mi ni kaafutu kamε niεkyako ɔkpε ku suoto լεyօ. ⁴⁵ Suoto siyօ fօ osie kanya, diekye feefū feenu fale ɔlaa wɔ di Yaa lεkakate eekyeko ni suoto lεfօ mawa kaanya.”

Maria Lasa Katansa Onu.

- ⁴⁶ Maria lataka aabue ale,
“Otu nii kɔtansa Saate nwu.
⁴⁷ Suoto kօyօ ninwuna nii di Yaa wɔ ninle
mi ni Dikite suoto,
⁴⁸ diekye eenyuma mi,
ami wɔ ninle nwɔ ni kpεmblate ninandie ni
lesalesaa.
 Nioso dieyօ ni di nua diesifi nii, ana ya nikօwa
ni sεεmaa, mawa mamaleε mi suoto լεyօ
otii,
⁴⁹ Diekye di lesaa le di Yaa wɔ ninklenke nii,
lebla εεtεε ni oso.
 Leyooto nօc ninle klekle nε.
⁵⁰ Nyaami nօc ɔnya nte diεta mba ninyεke nwɔ
nii,
dieyօ ni kօona diesfi ni kօona,
⁵¹ Eediki osie nօc kayi,
εεsamisa batii ba nintakatesa ni suoto lema
katoo ku disibu lema nimuu,
⁵² Eεtakatesa baka siene laakpomii lema suoto,
ni εεtakatesa mba niεwakosa ni suoto lema
kasco katoo nε.
⁵³ Eεta batii ba di aka nkle ni lele alesaa biene
beemie,
kafօo εεta basaawεntε lesifi ku kօka.
⁵⁴ Eenyuma ntam nօc be
aaka aata ni bawa loo,

ni atɔɔwa ale ɔɔbadiki bakpɛmblate nɔ
Israel ne.

⁵⁵ Atoonyuma ale ootuo nyaami nɔ ɔnyɑ di
Abraham suoto
ku banantii nɔɔ diesifi ni, dinnaa ni kaloo."

⁵⁶ Maria lasie di Elisabet nfū fe awente atie fie
aakple aasifi leyo nɔɔ.

Yohane Ntu Kpeesate Lelofo.

⁵⁷ Di obe lawo ale Elisabet kalofo nii, ni aaloko
obi suɔtɔbi ne. ⁵⁸ Ni di Elisabet bawo nɔɔ ku
banatii nɔɔ lanu mmle okle di Yaa lele nwɔ
ni sibuale, ni baamuu lɛma lanyako nwɔ suoto
leyɔɔ ne.

⁵⁹ Obe wɔ di obi nwu nkpo lafū ni ayi ane,
baawa ale bɔɔbabudi nwɔ lɛsɔkɔsɔkɔ, ni baamie
ale bɔɔyɔ ote Sakaria leyooto mantika nwɔ ne.
⁶⁰ Kafɔɔ ɔya ditatunako ma, ni aatɔkɔ ma ale,
"Batika nwɔ leyooto bile, Yohane."

⁶¹ Ninfe baananfiko nwɔ ɔlaa baakaale nwɔ
ale, "ɔnanti lee kuonwii dilole leyooto le mmle
okle fie de?"

⁶² Nioso, baawiwii nnɛɛ baakaale obisɔ nwu
ote ale, lemeyooto omie ale bayɔ batika obi
nɔɔ nwu. ⁶³ Ninfe di Sakaria lakaale ale batɔɔ
lɛkpanafuɔ, ni aakpana aatika ale, "Leyooto
nɔɔ ninle Yohane." Diabla bamuu lɛma ɔkpe
osie kanya. ⁶⁴ Nfanwu, Sakaria lakple aakyako
ɔkakate, ni aakyako Yaa otansa ne. ⁶⁵ Leyekɛ
lape manko mba ninsi bakaako ni bawo. Batii
labue ɔlaa wɔ mmle baakyakasa sekpo se simuu
ninkpe ni di Judea kobokotee kamɛ. ⁶⁶ Batii
ba bamu nianu ni selaa se mmle latoobu diisi
baatɔɔkaale ale, "ɔmentiikle di obisɔ wɔ mmle

kowa ɔbale?" Diekye diakpa kɔmɛ ale, Yaa otumi ntika nwɔ di suoto.

Sakaria Ladiki Yaa ɔlaa Aabue.

- 67 Diawa ale Yaa Ninwuna Klekle layii Yohane ote Sakaria kame, ni aabue Yaa ɔlaa ale,
- 68 "Bita butansa Saate, Israel Yaa nwu diekye atɔɔwa kale nɔɔ ɔkyakaako, εewa ma kafɔɔ odiki.
- 69 Atɔɔta wo Dikite wɔ ninkpe ni osie nwɔ niekye ni kpemblate nɔɔ Dawid kɔna kame.
- 70 Yaa labue ɔlaa wɔ mmle aate kofokofoko diefe ni di ɔlaa babuetete nɔɔ suoto ale,
- 71 abadiki wo ankyeko bakpileblate ku batii ba niekyidi wo ni bamuu nnɛɛ kame.
- 72 Aabue ale abanya bawa loo nyaami abanyuma kafɔɔ kanya ninii klekle le aanii ni ku mma.
- 73 Aaka ntam aata ɔwa loo Abram osie kanya ale,
- 74 abadiki wo ankyeko bakyidite loo nnɛɛ kame,
- abata mambla nwɔ ɔkpe kafɔɔ di ɔtanyekɛ kame.
- 75 Ale ababla wo klekle, munte tinini di anu nɔɔ di nkpa loo mmuu disiebi kame.
- 76 Kafɔɔ, afɔ obi nii, babaleɛfɔ ale Yaa wɔ ninlenke ni ɔlaa buetete. Fabale Saate nwu katū, fanlolaa osuku fante fanta ɔwabee nɔɔ.
- 77 Fabata batii nɔɔ kafɔɔ ntofo ale babawɛ didiki, ku sikpile lɛma se babayo mankyɛ ma ni oso.
- 78 Yaa loo լεյօօ buɛɛ, annya nyaami. Abakyesee wo dikite wɔ ninkpa ni fe mmle kuufi nkpa nii.

79 Abata lækpa le mmle nwa di batii ba ninsi ni
di ditunu kame
di kukpi lęyekę nkle ma nii ale,
abakpaa wo anfenko di atoko ɔkyę ole osuku
suoto.”

80 Nioso obiso nwu lamuɔ di suoto sina kame
ku Yaa Ninwuna kame osie kanya. Aasie di
ɔfaafuu di leba le baatii diesi ni diaalase di obe
wɔ aadiki ni suoto kayi di Israel kafaabi anu.

2

Yesu Lelofo.

1 Di obe nwu kame, ɔka Kple Kaesare Augusto
lata otumi ale baka batii bamuu ba ninkpe ni di
Roma sekä kalekɔ kame. **2** Di batii ɔka kasale wɔ
mmle kame, abaa ɔnɔɔfo wɔ baatɔɔlɛɛ ni Kirenio
niatoole sekä di Siria kasɔ suoto. **3** Nkpo oso otii
biala lasifi okpoo nɔɔ ale balaaka nwɔ.

4 Nioso Yosef kafɔɔ ladie di Nasaret okpoo di
Galilea kasɔ aasifi Betlehem di Yudea kasɔ suoto,
nfū baalofo ni ɔka Dawid. Yosef lasifi nfa diekye
Dawid ɔnanti aale. **5** Manko Maria wɔ baakaalɛ
baatɔɔ ni niasifi nfa ale balaaka ma. Aalaka lemɛ
kafɔɔ. **6** Obe wɔ baawɛ ni di Betlehem, Maria obe
lawo ale aalofo. **7** Ni aalofo obi suɔtɔbi nɔɔ kasale
ne. Ni aayɔ sikplakpi aamiminisa nwɔ, aayɔ nwɔ
aatensa di lesaa le mankpee ni babɔkɛɛ alesaa
kame ne. Diekye batawɛ leyo di bafɔɔ kafunko.

Yaa Batɔkyentɛ Layɔ ɔlaa Biene Baawako Bafoso Bakpate.

8 Diawa ale bafoso bakpate banwii lawɛ nintɛɛ
nwu kassɔ suoto, baatoonyu bafoso lemɛ ku
kakyę. **9** Yaa tɔkyentɛ onwii ladiki suoto aatuɔ

ma, ni di Saate leklekle lakpa diakpete ma di suoto ne. Ta nkpo oso baayekε osie kanya, ¹⁰ kafcɔ Yaa tɔkyentε nwu latɔkɔ ma ale, "Bitanyekε, ɔlaa biene nkyenku, nwɔ nimata ye ni suoto lεyɔcɔ osie kanya ku batii bamuu. ¹¹ Di miɛ dii le mmle suoto, batoolofo Saate wɔ ninle ni Kristo bεtaye di ɔka Dawid okpoo kamε. ¹² Lesaa le bibanya mintε ni nsū, diotuo ale kute ni nkpo ninle ale, bibanya beemiminisa obifcɔle nwu ku sikplakpi, bεeyɔ nwɔ beetensa di bafoso lesaa le manle ni alesaa kamε."

¹³ Nfanwu, Yaa batɔkyentε dikudi kple ninwii niakye osi baakyɔcɔ babakyakaa di nwɔ nkpo suoto baatɔtansaa Yaa ale,

¹⁴ "Leklekbaata Yaa di osi fanfan,
di suoto lεyɔcɔ diwa di batii ba suoto di Yaa mbɔmbɔ ni kaayi!"

¹⁵ Di obe wɔ di Yaa batɔkyentε nwu lakple baasifi ni osi baadie ma ni, bafoso bakpate nwu labue baatɔkɔ suoto lεma ale, "Bita bukyε Betlehem buɔlaanyu lesaa le niɛwa ni, di Saate nwu ntɔɔtɔkɔ wo ni."

¹⁶ Nioso baapɛsɛwa baakyε baalanya Maria ku Yosef ku obifcɔle nwu niate ni di babɔkεɛ alesaa lekpeesaa nwu kamε. ¹⁷ Nioso obe wɔ baanyɔcɔ ni nkpo, baabue lesaa biala di Yaa tɔkyentε nwu latɔkɔ ma aakyeko ni obisɔ nwu suoto. ¹⁸ Batii ba bamuu nianu ni bafoso bakpate ba mmle ɔlaa wɔ baabue nii, diabla ma ɔkpε. ¹⁹ Maria lamufū selaa se mmle simuu aakpee diisi, aatoobusī disi osie kanya. ²⁰ Ninfε baafoso bakpate ba mmle lakple baasifi, ni baatɔtansaa Yaa di asaa ya amuu baanu, baanya ni suoto ne. Diekye diawa

kaanya tutuutu fe mmle di Yaa tɔkyɛntɛ nwu latɔkɔ ma nii.

Baatika Yesu Obifɔɔle Nwu Leyooto.

²¹ Di ayi ane kamaa, obe wɔ di obe lawo ale baabudi ni obisɔ nwu lessɔkɔsɔkɔ, ni baatika nwɔ leyooto ale Yesu, fe mmle di Yaa tɔkyɛntɛ nwu labue aate ni fie baalaka nwɔ ni lɛmɛ.

Baakpaa Yesu Baakyenkyo Yuda Batii Yaa Olekatakɔ.

²² Obe wɔ di obe lawo ale Yosef ku Maria kabla suoto okleklesa amanle fe mmle di Mose kufiofa letuo nii. Ni baakpaa obifɔɔle nwu nkpo kafɔɔ baasifiko Yerusalem ale, bɔɔyɔ nwɔ manakpee di Saate nnɛɛ kame ne. ²³ Fe mmle bɛɛkpana beekpee ni di Yaa kufiofa kukū kame ale, "Obi suɔtɔbi kasale lele beelofo, baadiki nwɔ lete base bata Saate nwu." ²⁴ Nioso baakyɛ ale bɔɔlaayɔ Abronuma anyɔ ee alaapɔɔ anyɔ manta Yaa ole, fe mmle di Saate nwu kufiofa lebue nii.

²⁵ Di obe nwu nkpo kame, osuɔtɔ onwii baatɔɔlɛɛ ni Simeon lawɛ di Yerusalem. Aale otii biene wɔ ninyɛkɛ ni Yaa, aasie aatoonyu osuku aatɔɔta Israel didiki. Yaa Ninwuna Klekle lasiɛko nwɔ, ²⁶ ni diatɔɔ aatoofo ale ɔlabakpi, diediki dielase di obe wɔ atɔɔnya ni Saate Dikite nwu baabue ale babalofo nii. ²⁷ Yaa Ninwuna Klekle lakpaa Simeon diasifiko Yuda batii Yaa Olekatakɔ nwu. Obe wɔ baalofote ba mmle lakpaa obifɔɔle nwu baawako ale bɔɔbla fe mmle kuufiofa nwu lebuiɛ ni mantɔɔ nii, ²⁸ ninfe di Simeon lafū obifɔɔle nwu aaklee ninnɛɛ, ni aapɛ Yaa sɛfa ale, ²⁹ "Saate, nunua, fatɔɔnya fɛɛbla di ntam be faaka ni kanya oso,

diki ami, kpemblate lefɔ, osuku aatɔɔkye di atoko ɔkye ole kame.

³⁰ Ami omu, ntoodiki anu nii lɛnya Dikite lefɔ nwu,

³¹ nwɔ feɛta fale awa ni di nnle batii anu.

³² Nnwɔɔ ninle lkpa le nimadiki dibiesaa lefɔ kayi anta ni batii ba ninanle ni Yuda batii ne.

Annanfi dibu kafɔɔ anwako ni Israel batii lefɔ kale kame ne.”

³³ Selaa se di Simeon labue ni di obifɔɔle nwu suoto labla Yosef ku Maria ɔkpɛ. ³⁴ Ni di Simeon lakusekusesa ma, aatɔkɔ ɔya Maria ale, “Obisɔ wɔ mmle Yaa niekyesee nwɔ ale didiki ku kawɔɔ eɛta batii kpinwu di Israel. Ale nsũ be niekye ni Yaa nfū baatii kpinwu mataka manyila nwɔ ni di suoto. ³⁵ Ale abadiki batii disi kame sɛwofala kayi antuo. Afɔ kafɔɔ, diefe ni di nle mmle kame oso, fabanu otu kame dibuo fɛ kapamii kobe piɔpiɔ bakle bootofo fɔ di otu kame.”

³⁶⁻³⁷ Ḍsanko onwii lawe aale ni Yaa olaa buetete, nnwɔɔ baatɔɔlɛɛ Hana ne. Ḍsanko nwu ote niale Fanuel, aakyɛ Aser kafaabi kame. Aleɛ akueñsi ko manko ɔsa baayɔ bawo fiɛ aakpi aadie nwɔ. Ni kamaa aale kpisɔfɔ aleɛ afosi ane aleɛ ana. Obe lele ankye Yuda batii Yaa Olekatakɔ kakū ku kakye anaatɔɔtansa Yaa, annii kanya, antɔɔrɛ ɔlaa antɔɔta Yaa. ³⁸ Di obe nwu kame tutuutu, nnwɔɔ kafɔɔ aawa aabare Yaa sɛfa, ni aakakate aakyeko obisɔ nwu nkpo suoto aata batii ba bamuu ninsi boonyu osuku manta ni Yerusalem didiki ne.

Baakple Baasifi Nasaret.

39 Di obe wɔ di Yosef ku Maria ntooloo ni amanle nwu ɔbla fε mmle di Yaa kufiofa kukū letuo nii, baakple baasifi okpoo lεma di Nasaret, di Galilea kasɔ suoto. **40** Obisɔ nwu lamuɔ, aawɛ suoto osie, aawɛ kafɔɔ ninumbe osie kanya. Yaa sibuale latika nwɔ di suoto.

Yesu Lakyε Yuda Batii Yaa Olekatakɔ.

41 Lelεε biala, Yesu balofote nkyε Yerusalem manaaale dii le manlεε ni ale, Okpi Diisi Ofe Dii. **42** Nioso obe wɔ di Yesu lafū ni lefosi aleɛ anyɔ baakpaa nwɔ baakyε dii nwu kalekɔ di Yerusalem, fε mmle mambla ni saa. **43** Di obe wɔ batooloo ni dii nwu nkpo ole, baakple baatoosifi okpoo lεma, kafɔɔ Yesu lakple aasie di Yerusalem. Balofote nɔɔ ditatofo. **44** Baanyu ale asi baatii nwu kame, nkpo oso baakyε dii kufi osuku fie baakyako nwɔ owolaa di basiewo nɔɔ ku batii nɔɔ kame. **45** Obe wɔ batanyɔɔ nii, baakple baasifi Yerusalem baalaatoowolaa nwɔ. **46** Di dii tiefa kame, ni baakyε baalaanyɔɔ di Yuda batii Yaa Olekatakɔ ne. Aasie ku Yuda batii basaatuotε bawo aatoonu ma, nnwɔɔ kafɔɔ aatɔɔkaale ma selaa. **47** Batii ba bamuu nianu nwɔ ni selaa, diabla ma kpo, diekye di lεesɔnu kple le aayɔ aatoodiki ni selaa se baatɔɔkaale nwɔ ni kasɔ oso. **48** Obe wɔ di Yesu balofote lanyɔɔ nii, diabla ma yaaa. Ni di ɔya lakaale nwɔ ale, “Obi, obe oso feɛbla wo nkpo? Ami ku Teefɔ ditɔɔbla wo ninunsɛɛ buokyi munwolaa fɔ.”

49 Ninfε di Yesu ladiki kanya ale, “Be oso biokyi minwolaa mi? Bieye bile Teemi leyo dikpe ni lesie?” **50** Kafɔɔ batanu ɔlaa wɔ aatɔkɔ ma ni kasɔ.

51 Ninfę di Yesu latikanko ma baasifi Nasaret nę. Aawakosa suoto kasę aata ma. Ḷya lamufü selaa se mmle aakpee diisi aatoobu sī disi osie kanya. **52** Yesu lalolaa aamuč aawę suoto osie. Aawę kafčč ninumbe. Aabuo batii ku Yaa anu osie kanya.

3

Ntu Kpeesate Yohane Layie Olaa Biene Nwu Lekya.

1-2 Di lefosi aleę anoo ya kamę di əka nočfo Kaesare Tiberio latoole ni sekę, Yaa ɔlaa buetę Yohane wō ninle ni Sakaria obi lafū ɔlaa aakyeko Yaa nfū di obe wɔ aasie ni di ɔfaafuu kamę. Ni di Pontio Pilato lale Abaa ɔnočfo di Yudea kasę suoto nę. Herode kafčč latoole sekę di Galilea kasę suoto. Di obe nwu kamę tutuutu, Herode obilema Filipo kafčč latoole sekę di kasę ka bɔččeę ni Iturea ku Trakoniti ntęę nwu suoto. Ni di əka Lisania kafčč latoole sekę di Abilene kasę suoto nę. Di obe wō mmle kamę kafčč, ni di Hana ku Kaiafa lale Yaa olebatate banččfo nę. **3** Ninfę di Yohane lakyę aakyi Yordan okle sęmaa ku ntęę nwu mmuu aatoobue Yaa ɔlaa ale, “Bikyi siikpile lee kamę biefū Yaa ntu okpeesa, di Yaa ayc sikpile lee akyę ye.” **4** Fę mmle bęekpana bęete ni di Yaa Olaa Buetęte Yesaia kukū kamę ale,

“Otii onwii kofaa di ɔfaafuu kamę ambue ale,
‘Bilolaa osuku bite Saate nwu ɔwabee.

Biekęsęsa abaya abafe ni bite nwɔ.

5 Bietčč abaya amuu niekyofo ni.

Biebieč kafčč abokote ku kobokotee amuu
bite kaasę.

Bieyilasa sisiku se niékönkō ni.

Biekylōkylōsa abaya kafōo niekukyukukyū ni.

6 Kayi batii bamuu manya Yaa Didiki! ”

7 Batii kpinwu ladie baawa ale Yohane akpeesa ma Yaa ntu. Ni aatōkō ma ale, “Aye kōsaanwu kōna! Owe niéka ye ale biatoso di Yaa lēkanko le nikōwa ni kame? **8** Bibla asaa ya nimatuo ale bitookyi ni siikpile lee kame. Biedie obue ɔtōkō suoto lee bile Abraham banantii bile. Diekye kōtōkō ye nle, Yaa mafuo afuɔ ya mmle ɔyɔ ɔbla banantii anta Abraham. **9** Nunua bia yi, batcɔyɔ kafe beese di awoso sidu suoto kofokofoko. Kowoso lele ninantika abi biene yi, bababudi kū, man-yɔ kū mankpee di ɔtō kame.”

10 Ninfé baatii nwu lakaale nwɔ ale, “Ni be nfé buabla nunua?”

11 Ninfé aadiki kanya, aatōkō ma ale, “Otii lele nikpe osi awu anyɔ, ayɔ anwii ata otii wɔ ninnaa ni kuanwii. Otii wɔ kafōo nikpe ni alesaa, asekɔ owo nɔɔ wɔ di alesaa nnaa ni.”

12 Akpooto bafunte bawo kafōo lawa ale, bakpeesa ma Yaa ntu. Ni baakaale nwɔ ale, “Saatuotε, be dikpe ni buɔbla?”

13 Ninfé di Yohane latōkō ma ale, “Bitanfū akpooto bialenkeesa n-ya bɛɛta ye ale biafū nii.”

14 Bakpetε bawo kafōo lakaale nwɔ ale, “Ni awo mɔ? Be dikpe ni buɔbla?”

Ninfé aatōkō ma ale, “Bitan-yɔ suoto osie biafū koto di otii kuonwii nnɛɛ, ee bitambudi otii kuonwii kanya di osuku kpile suoto. Bita ato lee ya biofū ni sɛɛkpe mme abuoye anu.”

15 Batii osuku onyu lakyako katoo ɔtaka, ni baatoobu ale, loo Yohane ninle Kristo wɔ boonyu

ni osuku ale abawa ni ne. ¹⁶ Nioso Yohane latəkə ma ale, "Ami, ntu kɔyɔ nkpeesa ye. Kafɔɔ otii wɔ nikɔwa ni sɛɛmaa nii nlenkee mi. Otii wɔ ninansieko ale bia kadiki nwɔ ni ntokota. Nnwɔɔ, abayɔ Ninwuna Klekle ku ɔtɔ ankpeesa ye. ¹⁷ Akle kɔfɛɛ nɔɔ di nnɛɛ kamɛ, abafɛɛlɛ ni kamɔɔ andiki ni kufuo kaamɛ, an-yɔ kamɔɔ abi ankpete di owu kamɛ. Kafɔɔ kufuo nkū, abafie kū di ɔtɔ wɔ ninaanii ni diidii kamɛ." ¹⁸ Yohane latəkə batii nwu Yaa ɔlaa biene nwu di sisuku ate ate suoto, ni aaka ma ale, bakyisa nkpa, di nkpa lɛma disiebi kamɛ.

¹⁹ Kafɔɔ Yohane lasi ɔlaa aata Herode wɔ niale ni abaa ɔnɔɔfo, diekye aafū obilema ɔsɔfɔ wɔ baatɔɔlɛɛ ni Herodia aayɔ, ku sikpile bamba se kpiniwuaabla ni oso. ²⁰ Nioso okpile wɔ ninlenke ni di Herode lakpleaabla ni, ninle ale, aamufū Yohane aate leeyo.

Yohane Lakpeesa Yesu Yaa Ntu.

²¹ Obe wɔ di Yohane ntooloo ni batii Yaa ntu okpeesa, aakpeesa Yesu kafɔɔ. Obe wɔ di Yesu latɔɔpɛ ɔlaa aatɔɔta ni Yaa, kolo lasɛkɛtɛ. ²² Ninfɛ di Yaa Ninwuna Klekle lasoo nwɔ di suoto fe mmle di lɛlaapɔɔ nsoo ni ne. Ninfɛ baanu sɛlɔ lakyɛ osi siabue ale, "Afɔ ninle obi nii wɔ suoto ninantuna ni ne. Foobuo mi anu nwaa."

Yesu Banantii Ninle Mba Mmle Ne.

²³ Yesu lafū fe ale afosi atiɛ di obe wɔ aakyɛ ni ɔkpɛ nɔɔ kasɔ. Batii lanyu ale Yosef obi ale. Yosef ote niale Eli. ²⁴ Eli ote niale Mattat, Mattat ote niale Lewi, Lewi ote niale Melki, Melki ote niale Yanai, Yanai ote niale ni Yosef. ²⁵ Yosef ote niale Matatia, Matatia ote niale Amos,

Amos ote niale Nahaum, Nahaum ote niale ni
 Esli,
 Esli ote niale Nagai. ²⁶ Nagai ote niale Mahat,
 Mahat ote niale ni Matatia, Matatia ote niale
 Semein,
 Semein ote niale Yosef, Yosef ote niale ni Yuda.
²⁷ Yuda ote niale Yohanan, Yohanan ote niale
 Resa,
 Resa ote niale Sorobabel, Sorobabel ote niale
 Sealtiel,
 Sealtiel ote kafoo niale Neri. ²⁸ Neri ote niale
 Melki,
 Melki ote niale Adi, Adi ote niale Kosam,
 Kosam ote niale Elmadam, Elmadam ote niale Er.
²⁹ Er ote niale Yosua, Yosua ote niale Elieser,
 Elieser ote niale Yorim, Yorim ote niale Matat,
 Matat ote niale Lewi. ³⁰ Lewi ote niale Simeon,
 Simeon ote niale Yuda, Yuda ote niale Yosef,
 Yosef ote niale Yonam, Yonam ote niale Eliakim.
³¹ Eliakim ote niale Melea, Malea ote niale Mena,
 Mena ote niale Matata, Matata ote niale Natan,
 Natan ote niale Dawid. ³² Dawid ote niale Yisai,
 Yisai ote niale Obed, Obed ote niale Boas,
 Boas ote niale Salomo, Salomo ote niale Nahason.
³³ Nahason ote niale Aminadab,
 Aminadab ote niale Adimin,
 Adimin ote niale Arni, Arni ote niale Hesron,
 Hesron ote niale Peres, Peres ote niale Yuda.
³⁴ Yuda ote niale Yakob, Yakob ote niale Isak,
 Isak ote niale Abraham, Abraham ote niale Tera,
 Tera ote niale Nahor, ³⁵ Nahor ote niale Serug,
 Serug ote niale Regu, Regu ote niale Peleg,
 Peleg ote niale Eber, Eber ote niale Sala.
³⁶ Sala ote niale Kainan, Kainan ote niale Arfaksad,

Arfaksad ote niale Sem, Sem ote niale Noa,
 Noa ote niale Lamek. ³⁷ Lamek ote niale Me-
 tusala,
 Metusala ote niale Henok, Henok ote niale Yared,
 Yared ote niale Mahalaleel,
 Mahalaleel ote niale Kainan.
³⁸ Kainan ote niale Enos, Enos ote niale Set,
 Set ote niale Adam, Adam ote kafco niale Yaa ne.

4

Abonsam Lasɔ Yesu Aanyu.

¹ Obe wɔ di Yesu ladie ni di Yordan okle nwu kame, aayii pɔ ku Ninwuna Klekle. Ni di Ninwuna nwu lakpaa nwɔ aasifiko ofaafuu kame, ² leeba le di Abonsam lasɔ nwɔ aanyu ni ayi afosi ana amu. Di obe nwu kame, Yesu ditale lesalesaa, nioso kɔka lakle nwɔ osie kanya di ayi nwu kayenteko.

³ Ninfɛ di Abonsam latɔkɔ nwɔ ale, “Nse Yaa obi fale, ni tɔkɔ difuɔ le mmle fale dikple alesaa.”

⁴ Kafco Yesu latɔkɔ nwɔ ale, “Kɔkpana Klekle Kukũ lebuɛ ale, ‘Diele alesaa lete suoto di otii nsie nkpa.’ ”

⁵ Nni kamaa, Abonsam lakpaa nwɔ aalaase di leba le niataka ni suoto. Ni aatuo nwɔ kayi assaa ku sekə nlekɔ mmuu di onumpoo lepe kame ne.

⁶ Ni aatɔkɔ nwɔ ale, “Kamayo kayi kamuu otumi wɔ mmle ku kame lesaawɛ nta fɔ, diekye ami bɛeyɛ bɛeta, otii lele kafco ninlɛ mi kafuo nwɔ ɔyɔ ɔta. ⁷ Nioso asaa ya amuu makple fɔ ale nse fabase katũ kasɔ fantɛɛ.”

8 Ninfé di Yesu latókó nwó ale, “Kókpána Klekle Kukú lebue ale, ‘Saate Yaa lefó lete faase katú kaasó fanta. Lete nōo kafóo faatansa.’”

9 Nni kamaa, Abonsam lakpaa Yesu aasifiko Yerusalem aalaatika nwó di Yuda batii Yaa Olekatakó lèkya kapiòpiòkó, ni aatókó nwó ale, “Nse Yaa obi fale, faayefe fakye ninfú fasifi kasó.

10 Diekye Kókpána Klekle Kukú lebue ale, ‘Yaa mata batókyente nōo nyila mannyu fó.’

11 ‘Babaklee fó di nnéé lëma kamé di osi ale, bia falaatuula diifuo kuninwii suoto.’”

12 Kafóo Yesu latókó nwó ale, “Kókpána Klekle Kukú lebue ale, ‘Tansó Saate Yaa lefó faanyu.’”

13 Obe wó di Abonsam lasó Yesu di sisuku se mmle suoto aaloo nii, aayidié nwó këëke aasifi.

Yesu Lakye Òkpe Nōo Kasó Di Galilea.

14 Ninfé di Yesu lakple aasifi Galilea ne. Yaa Ninwuna Klekle otumi lasié nwó kaame. Ni di suoto nōo ɔlaa lakyaka ntéé nwu ne. **15** Aatuó asaa di Yuda batii nsiisakó, obiala latansa asaa nōo otuo.

Baasi Yesu Di Nasaret.

16 Nni kamaa, Yesu lakyé Nasaret ninle ni okpoo wó baaklee nwó aamuó nii. Ni di Lenyéeteyi suoto, aakyé Yuda batii kasiisakó fe mmle ambóombó ni ɔbla. Ni aataka aayila ale ɔóka asaa di Kókpána Klekle Kukú kamé ne.

17 Ninfé baayó Yaa ɔlaa Buëtëtë Yesaia kukú baatoo ne. Ni aatikiti kukú nwó aanya leba le bëækpana ni ale,

18 “Saate Ninwuna ntika mi di suoto, diekye eediki mi ale,

kayɔ ɔlaa biene nwu nwako bapiite.
 Eekyesee mi kafɔɔ ale kayie lekya nta batii ba
 beemufū beεεre ni akpo ale baawε difukiti.
 Ku mba di anu lebie nii, ale baanya.

Ku batii ba beenyinka beεεte ni kaasɔ ku dibuo
 ale, baawε ɔnyεε ɔtε.

19 Ale kata mantofo kafɔɔ ale obe ntoowo di
 Saate madiki ni batii nɔɔ."

20 Ninfɛ di Yesu latii kukū nwu nkpo, aakplesa
 aata tɔkyente nwu, ni aasiε kaasɔ ne. Batii ba
 bamuu niawε ni di kasiisakɔ nwu lakyako nwɔ
 onyu tuwii. **21** Ni aatɔkɔ ma ale, "Kɔkpana Klekle
 Kukū leba le mmle biene leka ni ninfū, nintɔɔwa
 kaanya mie dii le mmle ne."

22 Selaa nɔɔ se aabue ni lamufū di batii nwu
 situ osie kanya, ku mmle aablako ni ɔkplalomii
 nɔɔ ɔkpe, diabla batii nwu ɔkpe. Ni baakaale ale,
 "Diele nnwɔɔ ninle Yosef obi nwu nkpo ne?"

23 Ni di Yesu latɔkɔ ma ale, "N-ye nle bibapɛ
 mi lekpa le mmle bile, 'Fablate, bla suoto kɔfa.'
 Bibakple mintɔkɔ mi kafɔɔ bile, 'Asaa ya okle
 bianu bile labla ni di Kapernaum, mbla nya
 kafɔɔ di okpoo nii.' " **24** Ninfɛ di Yesu lakple
 aatɔkɔ ma ale, "Kɔtɔkɔ ye nle, mánfū Yaa ɔlaa
 buetete di nnwɔɔ omu nɔɔ okpoo. **25** Binu!
 Nwaako diale ale bakpisɔfɔ kpinwu lawε di
 Israel kasɔ suoto di obe wɔ di Elia lawε nii. Di
 kanto ladie ni onɔɔ aleε atie ku ɔfā, di kɔka
 kple lawa ni kaasɔ nwu kamuu suoto. **26** Kafɔɔ,
 Yaa ditakyesee Elia ale akyε kuonwii lεma nfū.
 Kafɔɔ aakyesee nwɔ aakyε bakpisɔfɔ nfū di
 Sarep okpoo kame di Sidon kasɔ suoto. **27** Nkpo
 nwu kafɔɔ baatii kpinwu latoofie ofie sεele di

Israel kasɔ di Yaa ɔlaa Buεtete Elia obe kamε nε. Kafɔɔ kuonwii ditawε difiεyɔɔ kaamε lεma, dilenkee Naeman wɔ niakye ni Siria kasɔ lete niawε difiεyɔɔ.”

²⁸ Obe wɔ baatii ba niawε ni di kasiisakɔ nwu lanu ni ɔlaa wɔ mmle, oblo lafiε ma osie kanya di Yesu suoto. ²⁹ Ni baataka, baananfi Yesu baadieko di okpoo nwu baasifiko kobokote ko suoto baabudi ni okpoo nwu kobembe, ale bootukusɔɔ mankpee di kɔwε kamε nε. ³⁰ Kafɔɔ Yesu lafe ma nintεε aasifi.

Yesu Latososa Ninwuna Kpile Aadiki Di Osuɔtɔ Onwii Kame.

³¹ Nni nkpo kamaa, Yesu lasifi Kapernaum okpoo kamε di Galilea kasɔ suoto. Ni di Lenyeεetεyi suoto aalaakya ko batii asaa otuo nε.

³² Asaa nɔɔ otuo labla ma ɔkpε, diekye aatuonya ku otumi. ³³ Otii onwii lawε di Yuda batii kasiisakɔ nwu niinwuna kpile lasie nii. Ni aafaa osie kanya aabue ale, ³⁴ “Oo! Be foomie di ɔkyε loo, afɔ Yesu Nasaret Otii? ɔwɔɔsa feεwa wo? Nyε otii wɔ fale nii! Afɔ ninle Otii Klekle wɔ di Yaa lekyesee ni nε!”

³⁵ Ninfε di Yesu lakpee ninwuna nwu kufiofa ale, “Lo kanana! Faadie nwɔ kaamε!” Ninfε di ninwuna kpile nwu lanwanyisa nwɔ aate kaasɔ di batii nwu anu nε. Ni aadie nwɔ kaamε aasifi nε, kafɔɔ lesalesaa ditabla osuɔtɔ nwu.

³⁶ Diabla batii nwu bamuu yaaa, ni baakaale bawo ale, “ɔmenlaa ninle nwɔ? Otii wɔ mmle leyɔ otumi ku osie kplε antososa anwuna kpile andiki di batii suoto.” ³⁷ Nioso Yesu leyooto lakyaka ntεε nwu sekpoo simuu kamε.

Yesu Layɔɔsa Batii Kpinwu Sifɛ.

³⁸ Yesu ladie di Yuda batii kasiisakɔ, ni aasifi Simon leyo ne. Simon ɔmaato late aatoofie kɔbɔ ofie osie kanya. Ninfɛ baata Yesu latofo ne.

³⁹ Ninfɛ aakyɛ aalaayila die atensaa nɔɔ ɔccɔkɔ ni aasī ɔlaa aata ofie nwu ne. Nfanwu, ofie nwu layɔɔ nwɔ, ni aataka aanyu ma kanya ne. ⁴⁰ Obe wɔ kuufi ntɔɔmɛɛ nii, batii ba bamuu baafietɛ ate ate nkpe ni lakpaa ma baawako Yesu nfū. Ni aatika ma nnɛɛ di suoto aayɔɔsa bamuu lema sifie ne. ⁴¹ Anwuna kpile kpinwu kafɔɔ ladie baatii kame baatooyiisa kudu ale, “Afɔ ninle Yaa obi nwu ne!” Kafɔɔ Yesu ditata anwuna kpile nwu osuku ale abue ɔlaa kuonwii, diekye baatofo ale nnwɔɔ ninle Kristo wɔ bɛɛre ni ɔccɔ ne.

Yesu Labue Yaa ɔlaa Di Yuda Batii Kasiisakɔ.

⁴² Kaale lasɛ nii, Yesu ladie di okpoo nwu aasifi leba le nialo nii, batii nwu lakyako nwɔ owolaa. Obe wɔ baanyɔɔ nii, baamie ale se atansifi aadiɛ ma fiɛ. ⁴³ Kafɔɔ aatɔko ma ale, “Dikpe nii lekye lelaabue Yaa sekə kalekɔ ɔlaa biene nwu di sekpoo bamba kamɛ, diekye nni oso di Yaa lekyesee mi ne.”

⁴⁴ Nkpo oso aabue Yaa ɔlaa di Yuda batii nsiisakɔ nwu mmuu di kasɔ nwu suoto.

5

Yesu Laleɛ Basaateketete Nɔɔ Kasale.

¹ Dii ninwii, Yesu layila di lekpo le bɔɔlesɛ ni ale Genesaret kotoko. Ni baatii dikudi nwu latoosisikiti ale bɔɔtɛɛtɛɛ nwɔ mmle baanu ni Yaa ɔlaa wɔ ababue nii. ² Yesu lanya ekolo enyɔ n-yɛ di lekpo nwu kotoko ninfa, kɔkpaku

badikite ladiε sī bεεkyε boofoto asawu lεma.
³ Ninfε di Yesu layie aabuo di oklo onwii kame, nwā ninle ni Simon ole. Ni aatōkō nwā ale atukusa oklo nwu kuɔkyε ntu kame kεkεε. Oklo nwu kame di Yesu lasiε aatuο batii dikudi nwu asaa nε.

⁴ Obe wā aatuο ma asaa aaloo nii, Yesu latōkō Simon ale, "Tukusa oklo nwu fakyεnko sitū nintu nwu kame lεeba le niekyofo ni, di afō ku basiεwo lεfō biεtaa asawu bidiki kōkpaku."

⁵ Ni di Simon labue ale, "Oncəfo, kakye ka kpe buɔbla ɔkpe ku ninunseε, kafōo butadiki lεsalesaa. Kafōo bubataa asawu nwu fe mmle feebeue nii." ⁶ Baataa asawu nwu, ni baadiki kōkpaku kpīnwu diata ale asawu lεma lakyako ɔbεbεε. ⁷ Nioso, baawii nnεε baaleε basiεwo lεma die oklo nyɔɔfa kame ale bawa babakyakaako ma. Baawa babadiki kōkpaku baayiisa eklo εnyɔ be mmle kame pō ale kεkεε niabu di eklo nwu kameε ni nintu kame.

⁸ Obe wā di Simon Petro lanya lεsaα le niawa nii, ni aape akunkyi di Yesu katū, aatōkō nwā ale, "Saate, tantεεtεε mi, diekye kpileblate nnle!" ⁹ Kōkpaku ko kpīnwu baadiki ni ninfa oso, dibla nnwāo ku basiεwo nōo ɔkpe osie kanya. ¹⁰ Nkpo okle kafōo diabla Simon basiεwo ba ninle Sebedeo babi, Yakobo ku Yohane ɔkpe nε.

Ninfε di Yesu latōkō Simon ale, "Tanyεkε. Dieyɔ ni di nua diesifi nii, batii dikite nfε fabale." ¹¹ Nni kamaa, baananfi seklo nwu baase di lekpo kotoko, ni baadiε lεsaα biala baate, baasifi baalaatikanko Yesu nε.

*Yesu Layɔɔsa Osuɔɔ Onwii Niatoofie Ni Ofie
Sεεle Ofie.*

¹² Obe onwii, Yesu lakyɛ okpoo onwii kame, nfü di osuɔɔ onwii lawɛ aatoofie ni ofie sεεle. Obe wɔ di osuɔɔ wɔ mmle lanya ni Yesu, ni aapɛ akunkyi di Yesu katü aatikiti nwɔ lekoto ale, “Saate! Nse dile fɔ, faafuo ɔta suoto nii mbla klekle.”

¹³ Yesu ladiki kɔnɛɛ aakpanko nwɔ, aatɔkɔ nwɔ ale, “Letuna, suoto lefɔ siklekle!” Nfanwu, ni di ɔfie nwu layɔɔ nwɔ ne.

¹⁴ Ninfe di Yesu lakpee nwɔ kufiofa ale, “Tantɔkɔ otii kuonwii. Kafɔɔ tɔɔkyɛ falaayɔ suoto lefɔ fatuo Yaa oletate, faata ole di mmle di Mose lekpee kufiofa εεte ni di suoto okleklesa suoto, diatuo ale ɔfie nwu ntɔnu cɔɔyɔɔt fɔ ni.”

¹⁵ Kafɔɔ Yesu leyooto lakyaka kayi osie kanya. Diata ale batii kpинwu latɔɔwa ale bɔbatoonu nwɔ asaa otuo anyɔɔsa ma sifie. ¹⁶ Kafɔɔ obe obe, andie ankyɛ leba le nielo ni anaatɔɔpɛ ɔlaa antɔɔta Yaa.

Yesu Layɔɔsa Osuɔɔ Onwii Niafefe Aate Ni Ofie.

¹⁷ Dii ninwii obe wɔ di Yesu latotuo ni asaa, Yuda batii dikudi le bɔɔlɛɛ ni Farisi batii ku kufiofa batuote bawo lakyɛ Galilea ku Yudea ku Yerusalem kasɔ aba aba baawa nfa. Ni di Yaa Ninwuna lasie di Yesu kame ale ɔɔyɔɔsa batii sifie ne. ¹⁸ Nfanwu, batii banwii niakpaa osuɔɔ onwii niafefe aate ni di ɔkla suoto baawako. Baatoomie osuku wɔ baayɔɔ nwɔ mambuoko ni leyo le di Yesu lawɛ nii, man-yɔ osuɔɔ nwu mantɛ ni di anu nɔɔ. ¹⁹ Kafɔɔ batii lepɔ nwu

oso, batafuo osuku ɔwε. Nle mmle oso, baatuka nwɔ baalaayie lεkya osi. Ni baadufu kutue di lεkya nwu suoto baasoosa fiεtε nwu ku ɔkla nɔɔ wɔ suoto aate nii, baate di Yesu anu di batii nwu ntεε ne.

²⁰ Di Yesu lanya ni ofū onu lεma oso, ni aatɔkɔ osuɔtɔ nwu ale, “Siεwo nii, ntɔɔyɔ sikpile lεfɔ lεkye fɔ!”

²¹ Ninfε di Farisi batii ku kufiofa batuotε lakyako bawo ɔkaale ale, “Owe ninle nwɔ mmle nikobue ni mbusuo ɔlaa wɔ mmle? Yaa lete nikafuo sikpile ɔyɔ ɔkye!”

²² Obe wɔ di Yesu latofo ni disibu lεma, ni aakaale ma ale, “Be oso biobu selaa se mmle okle disi? ²³ Lemεnle niεyɔɔ dilenke di selaa se mmle obue kamε, ‘Bεεyɔ sikpile lεfɔ bεεkye fɔ’ εε sεε baabue ale, ‘Taka faakyε’? ²⁴ Kamadiki ntuo ye nle ami, Otii Obi nkpe, otumi kaasɔ ka mmle suoto n-yɔ okpile nkye.” Ninfε aatɔkɔ otii wɔ niekpi ni kakyεkakyε ale, “Kɔtɔkɔ fɔ nle, taka faayɔ ɔkla lεfɔ faatɔɔkye leyo!”

²⁵ Nfanwu, osuɔtɔ nwu nkpo niataka aayila baati nwu anu, aayɔ atensaa nɔɔ ya suoto aate nii, aasifi leyo, aakyako Yaa ɔtansa. ²⁶ Lesaa le mmle labla batii nwu bamuu ɔkpε! Nioso leyεkε lape bamuu lεma, ni baatansa Yaa, baabue ale, “Be mɔ lessaa kple buɔnya miɛ nkpo?”

Yesu Laleε Lewi.

²⁷ Nni kamaa, Yesu ladie leeyo nwu kamε, ni aanya akpooto funte onwii baatɔɔlεε ni Lewi, aasie di akpooto kafunkɔ. Ninfε aatɔkɔ nwɔ ale, “Tikankoe!” ²⁸ Nfanwu, Lewi ladie lesaa biala aate, ni aataka aatikanko nwɔ ne.

29 Lewi lata baawa alesaa biene leeyo nɔɔ, aatū opunu kplε aata Yesu. Baakyakako akpooto bafunte kpинwu ku batii bamba kafɔɔ. **30** Farisi batii ku kufiofa batuote ba niawε ni di alesaa nwu kalekɔɔ lakyε kasɔɔ baatɔɔnanfiko Yesu basaateketete ɔlaa ale, “Be oso biole minwee ku akpooto bafunte ku bakpileblate bamba ba mmle?”

31 Ninfε di Yesu ladiki kanya ale, “Fablate diefī batii ba ninoofie nii, bafietε di fablate lefī.

32 Ninwa babienete ɔlεε, bakpilete oso lewa.”

Yesu Lakakate Di Kanya Onii Suoto.

33 Batii bawo lakaale ale, “Le diewa fie di Yohane basaateketete nnii kanya mampe ɔlaa manta Yaa wlawla, Farisi batii basaateketete kafɔɔ mbla nkpo, kafɔɔ bale fo mma obe lele manle manyi?”

34 Ninfε di Yesu ladiki kanya ale, “Biefū bienubile batii ba bεεkyakako bεεwako ni ɔsanko kayɔkɔ kaanii kanya di obe wɔ di ɔsanko nwu nkpo ɔsa nkpe ma ni di ɔkyε? Oowo! Diidii dilafuo ɔwa nkpo! **35** Kafɔɔ, dii lewo kɔwa, babakpaa ɔsanko nwu ɔsa di ɔkyε lema mansifiko nii. Nfa nfe babakyako kanya onii ne.”

36 Nni kamaa, Yesu lapε ma lekpa le mmle ale, “Otii konwii nimbe dibula fɔle aakaa aatii lekofole kabɛkɔ. Nse otii owo lebla nkpo, abalalaasa dibula fɔle nwu. Ni kafɔɔ, lekofole nwu nkpo ku lefɔle nwu nkpo dilabakaatεε bia. **37** Nkpo kafɔɔ kuonwii nin-yɔ nta fɔle aakpete di bɔkεε kukū kotofo kofole kame ne. Diekye nse diewa nkpo, nta fɔle nwu nkpo mafuu ninta ale, kɔbɔkεεkū kotofo nwu nkpo mbε, nta nwu nkpo kafɔɔ nwii

nyinlalaa. ³⁸ Nioso dikaatε ale baayɔ nta fole mankpete di kɔbɔkɛɛkū fole kame. ³⁹ Diɛkyakaa nii, otii kuonwii ninyi nta kofole, nfe oosie nii aakple akaale nfɔle. Nse diele nkpo ɔlaa wɔ ababue ni ko ninle ale, ‘Nkofole nwu nle dilenke nfole!’ ”

6

Yesu Ku Farisi Batii Lananfi ɔlaa Di Lεnyεɛtεyi Suoto.

¹ Di Lεnyεɛtεyi ninwii suoto, Yesu ku basaateketete nɔɔ latoofe di atita kofe kunwii kame. Ninfe di basaateketete nɔɔ nwu lakyako atita nwu ofee, baafini nya baakyako owee nε. ² Ninfe di Farisi batii bawo lakaalε ma ale, “Be oso biɔbla lεsaa le di kufiofa loo diɛta ni osuku ale babla ni di Lεnyεɛtεyi suoto?”

³ Ninfe di Yesu ladiki kanya ale, “Biika lεsaa le di Dawid labla ni ku bawo nɔɔ di Kɔkpana Klekle Kukū kame binya, di obe wɔ kɔɔka laklee ma ni? ⁴ Dawid lakyε Yaa Olekatakɔ kame aalaayɔ alesaa ya baata ni Yaa ole, aale ni. Aayɔ awo kafɔɔ aata bawo nɔɔ lale ni. Nu kuufiofa loo diɛta osuku ale otii bamba kale ni alesaa nwu nkpo. Diediki Yaa oletate letε pe nikale ni.”

⁵ Ninfe di Yesu labue aanyεntε ale, “Ami, Otii Obi, ninle Lεnyεɛtεyi Saate.”

Yesu Layɔɔsa Osuɔɔ Onwii Kɔnεɛ Nɔɔ Kunwii Lakatu Nii Ofie.

⁶ Di Lεnyεɛtεyi bamba suoto Yesu lakyε Yuda batii kasiisakɔ, aalaatuo asaa. Osuɔɔ onwii lawε ninfa di koletaneɛ nɔɔ lakatu nii. ⁷ Kufiofa

batuotε ku Farisi batii bawo lawε ninfa baatoomε osuku wɔ baafe man-yɔ ni ɔlaa di Yesu suoto oso, baadiki anu baase nwɔ baatoonyu, nse, abayɔɔsa ofie di Lenyeeteyi nwu suoto. ⁸ Di Yesu latofo ma ni disibu nwu oso, ni aatɔkɔ osuɔtɔ nwu kɔnεes lεkatu ni ale, "Taka, fawa sitū ninfū." Ni di osuɔtɔ nwu lataka aakyε aalaayila ma die anu ne.

⁹ Ninfε di Yesu lakaale ma ale, "Be di kufiofa loo leta osuku ale buabla di Lenyeeteyi suoto? Dile ale buabla dibiene di lenyeetɔyi suoto εε, buabla dikpile? Ee dile ale buafū batii nkpa εε, sεε buawɔɔsa mi?"

¹⁰ Yesu lanyu batii nwu bamuu aafenko, ni aatɔkɔ osuɔtɔ nwu ale, "Yilasa kɔnεes lεfɔ." Ni aayilasa kū ne, nfanwu kɔnεes nɔɔ nwu lakple kuaε. ¹¹ Oblo lafiε batii nwu bamuu ni baakyako disi obu di lesaa le babafuo ni Yesu ɔbla.

Yesu Ladiki Batɔkyεntε Lefosi Banyɔ.

¹² Di obe nwu kame, Yesu lasifi kabokotee kanwii osi, ale ɔɔlaa pε ɔlaa anta Yaa. Aawε ninfa kakye kamuu, aatɔɔpε ɔlaa aatɔɔta Yaa.

¹³ Obe wɔ kaale lase nii, aaleε basaatekete nɔɔ bamuu aasiisa, ni aadiki lefosi batii banyɔ kaame lema, aata ma leyooto ale, batɔkyεntε. ¹⁴ Mma ninle, Simon wɔ aata ni leyooto ale, Petro ku obilema suɔtɔbi Andrea ku Yakobo ku Yohane ku Filipo ku Bartolomeo, ¹⁵ ku Mateo ku Toma ku Yakobo wɔ ninle ni Alfeo obi ku Simon wɔ manlεε ni ale otii wɔ nimbaɔmbɔ ni okpoo nɔɔ.

¹⁶ Ku Yakobo obi Yuda ku Yuda Iskariot wɔ niabakple ni otii dikitateε.

Yesu Latuo Asaa, Aayɔɔsa Batii Sifε.

17 Di obe wɔ di Yesu ku batɔkyɛntɛ nɔɔ lasosoo baakye ni kabokotee nwu osi, baabayila lεeba le ninte ni yaaa. Ni di basaateketete nɔɔ kpintu bawo lawɛ ninfa ku batii dikudi kplɛ ninwii le niakye ni Tiro ku Sidon. **18** Baawa ale, bɔɔbanu asaa ya di Yesu kotuo nii, anyɔɔsa ma sifiɛ ate ate se boofie nii. Batii ba di anwuna kpile latɔɔhaa ni kafɔɔ lawa aayɔɔsa bamuu lεma sifiɛ. **19** Batii ba mmle bamuu lakpee ɔnyɛɛ baakpanko nwɔ, mmle siifiɛ lεma kayɔɔ ma nii. Diekye osie owo latoodie di Yesu suoto kamɛ diatɔɔyɔɔsa batii bamuu sifiɛ.

Suoto Mayɔɔ Batii Bawo, Bawo Kafɔɔ Mawɛ Dibuo.

20 Yesu latakatesa anu aanyu basaateketete nɔɔ, ni aatɔkɔ ma ale,
“Suoto siyɔɔ aye bapiitɛ,

dikye Yaa sekə kalekɔ ninle ye kale!

21 Suoto siyɔɔ aye ba kɔɔka nkle ni nunua
diekye aye nimamie nɛ!

“Suoto siyɔɔ aye ba nikowi ni nunua,
diekye aye nimama nɛ!

22 Suoto siyɔɔ ye nse batii lekyidi ye,
beesī ye,
beetufa ye, beebue kafɔɔ ale batii kpile bile
ta ami, Otii Obi, oso!

23 “Binya suoto lεyɔɔ nse n-ya mmle amuu kɔwa, bietū ku suoto lεyɔɔ, diekye Yaa mata ye letota kplɛ di Yaa kafa. Diekye asaa ya mmle okle di bawa lεma layɔ baabla Yaa ɔlaa babuetete nɛ.

24 Aye ba ninle ni basaawente biyɔɔsa,
diekye bitɔɔwɛ suoto lεyɔɔ lee ninfū!

25 Aye ba nintoole biemie^ε ni nunua biyɔɔsa,
diekye kɔka kɔwa ye ɔbaklee!

Aye ba nikɔma ni miɛ, biyɔɔsa
diekye biɔwa sənyaami obuo ku kaku owi!

26 Biyɔɔsa, aye ba baatii kɔtansa ni miɛ,
diekye nkpo okle kafɔɔ di bawa lɛma latansa
balaate Yaa ɔlaa babuetete ne.

Bɔmbo Balo Lefo.

27 "Kafɔɔ aye ba nikonu mi ni ɔlaa, kɔtɔkɔ ye
nle, bibɔmbo balo lee, biɛbla dibiene bita ma.

28 Batii ba ninkpaani ye nii, bikaale dikusɛkuse
bita ma. Batii ba kafɔɔ nikɔbla ye ni amumu,
biɛs ɔlaa bita Yaa diisi lɛma. **29** Nse otii owo
kafɔɔ lepɛ fɔ kɔneɛ kootokosi, faamuniküisa
kɔnyɔɔfa kafɔɔ fatɔɔ apɛ. Nse otii owo lefū fɔ
osi awu kple, faadiɛko nwɔ kalɔ ale kafɔɔ. **30** Otii
lele niɛkaale fɔ lesaa, faatɔɔ. Nse otii owo ɔeyɔ fɔ
lesaa, tambue fale dikpe ni eekplesa ni εewako.
31 Lesaa le biomie bile batii babla bata ye nii, nni
okle biɛbla bita ma ne.

32 "Nse mimbɔmbo batii ba nimbɔmbo ye ni
lete, ni lɛmenkusɛkuse bibawɛ? Bia bakpileblate
mbɔmbo batii ba nimbɔmbo ma nii. **33** Ni nse
batii ba nimbla ye ni dibiene lete mimbla dibiene
minta, semɛnfa babapɛ ye? Bia bakpileblate
mbla nkpo. **34** Ni nse minfensa asaa minta batii
ba lete biye bile babakplesa manwako ye nii,
lɛmenkusɛkuse bibawɛ? Bia bakpileblate nfɛnsa
asaa manta bawo ale baakplesa manwako ma!
35 Kafɔɔ, bibɔmbo balo lee, biɛbla dibiene bita
ma. Bifensa ma asaa, kafɔɔ bitantika anu bile
babakplesa manwako ye kokooko. Nse biɛbla
nkpo, bibawɛ letota kple. Ni babalɛɛ ye ale

Yaa wɔ ninlenke ni babi. Diekye Yaa nkpe sifutule εεta batii ba di asaa nimbuo ni anu ku basiensietε. ³⁶ Binya nyaami fe mmle okle di Teeye nnya ni nyaami.

Yesu Latuo Asaa Aakyeko Bawo Ḍkanko Suoto.

³⁷ “Bitankanko bawo lee, ni Yaa kafɔɔ dilɔbakanko ye. Bitanlo bawo lee lερɔɔ, ni Yaa kafɔɔ dilɔbalo ye lερɔɔ. Biyɔ bikyε bawo lee, ni Yaa kafɔɔ mayɔ ankyε ye. ³⁸ Bita batii asaa, ni Yaa kafɔɔ mata ye asaa. Nwaako, Yaa mata siwu lee nyii pɔ di sifutule nɔɔ kanya. Diekye leklapoosaa le bieyɔ biεklapoosa biεta ni bawo lee, nninwu okle di Yaa mayɔ anklapoosa anta ye ne.”

³⁹ Ninfε di Yesu lape ma lεkpa ale, “Numbietε dilɔbafulo numbiεtε wo nɔɔ katū oleko, se diele nkpo, ni banyɔ lεma babakpa mambuo diibio kamε. ⁴⁰ Saateketete kuonwii ninlenkee saatuotε nɔɔ. Kafɔɔ nse saateketete ntooloo asaa nɔɔ otekete, ote ante fe mmle di saatuotε nɔɔ nte nii.

⁴¹ “Le diebla fɔɔnya diku biibii le ninsi ni di owo lefɔ ninu, kafɔɔ fɔlɔcɔnya kawosoku ka ninsi fɔ ni leelete kamε? ⁴² Le dibawa ale faatɔkɔ owo lefɔ fale, ‘Lekoto, owo nii, tεε ndiki fɔ diku niinu.’ Kafɔɔ fɔlɔcɔnya kawosoku ka ninsi fɔ ni niinu kamε? Afɔ laate! Lekatū fadiki kawosoku ka ninsi ni niinu lefɔ kame fie, ni fabafuo ɔnyia nwaa, fandiki diku biibii le ninsi ni di obilee ninu kamε.

Kowoso Biala Ku Abi Ni Kū.

⁴³ “Kowoso biene níntika abi lalaale, kowoso lalaale kafɔɔ níntika abi biene. ⁴⁴ Kowoso biala, abi ya ootika ni man-yɔ mantofo kū. Mántesε

akpaloo abi di kukutuwoso suoto, nkpo kafɔ manantesɛ akutu di akpaloo dikũmii suoto nε.
45 Otii biene yi, asaa biene ya eekookaa ni di otu nɔɔ kame andiki asaa biene kayi ankyeko. Kafɔɔ otii kpile nnwɔɔ, asaa kpile ya eekookaa ni di otu nɔɔ kame andiki asaa kpile ankyeko. Diekye asaa ya nintooyii ni otii otu kame, nnya ambue nε.

Kyɛc Yesu ɔlaa Atoko Faabla Ninnwu Suoto.

46 “Be lɛsaa oso biɔlɛɛ mi Saate, kafɔɔ mimbla di lɛsaa le kɔtɔkɔ ye ni suoto? **47** Otii lele niɛwa ɔkyɛ nii, annu mi ɔlaa, ambla nwu di suoto, matuo ye otii wɔ ale nii. **48** Ate fe otii wɔ nikotofo ni leyo, eekutu ni kasɔ diekyofo nii, ese ni lɛsɔse nɔɔ di afuɔ suoto. Nse okle leyii, kuobie kuɔbasa di seyoyie nwu suoto, leyo nwu nimbla lɛsalesaa, diekye diewɛ leba biene diye. **49** Kafɔɔ otii wɔ ninnu mi ni ɔlaa anaamufu nwu aaklee nii, ate fe otii wɔ nietofo ni leyo di kɔtɛ suoto lɛsɔse nɔɔ nnaa ni osie. Nioso nse okle leyii kuobie kuɔbasa leyo nwu, nimbiɛ osie kanya wududu ninkaa kaasɔ!”

7

Yesu Layɔcsa Roma Batii Bakpete Nɔɔfo Kpemblate Nɔɔ Onwii Ofie.

1 Obe wɔ di Yesu latɔkɔ batii selaa se mmle simuu aaloo nii, ni aasifi Kapernaum nε.
2 Roma batii bakpete nɔɔfo onwii lawɛ ninfa, aawɛ kpemblate onwii ambɔmbɔ ni osie kanya. Kpemblate wɔ mmle latoofie osie kanya diabu keekɛɛ aakpi nii. **3** Nioso obe wɔ aanu ni Yesu lekpanko, aakpee Yuda batii banɔɔfo bawo ale

bakyε baalaatɔkɔ nwɔ aawa abayɔɔsa kpɛmblate nɔɔ nwu ofie atɔɔ. ⁴ Obe wɔ baatii ba mmle lawa ni Yesu nfū, baatikiti nwɔ lekoto osie kanya ale, “Osuɔtɔ wɔ mmle lesiɛko ale faatɔɔ lɛkyakaako, ⁵ diekye ambɔmbɔ kale loo. Nnwɔɔ nietofo Yuda batii kasiisakɔ εεta wo ne.” ⁶ Nioso Yesu lataka aatikanko ma.

Obe wɔ di Yesu nfε kɔtεetεe ni bakpεte nɔɔfo nwu leyo, ni aakpee basiɛwo nɔɔ ale bakyε baalaatɔkɔ Yesu ale, “Saate, tankpee suoto dibuo. Diekye ami, ninsiɛko ale, faawa mi leyo. ⁷ Nkpo kafɔɔ ninasiɛko ale kawa fɔ anu ne. Nkpo oso afɔ buε ɔlaa onwii pe, kpɛmblate nii mawɛ osie. ⁸ Diekye ami kafɔɔ nsi di ɔnɔɔfo wɔ ninlenke mi ni kalɔ. Ni baakpεte nsi mi kaalɔ. Nse lɛtɔkɔ onwii nle, ‘Akyε nfū,’ ni ankyε ne. Nse lɛtɔkɔ ɔbamba nle, ‘Awa ninfū,’ ni anwa ne. Nse lɛtɔkɔ kpɛmblate nii nle, ‘Bla nle,’ ni ambla ne.”

⁹ Obe wɔ di Yesu lanu ni ɔlaa wɔ aabue nii, diabla nwɔ ɔkpε. Ninfe aamunikii aatɔkɔ batii dikudi le niatikanko nwɔ ni ale, “Kɔtɔkɔ ye nle, diidii ninnya ofū onu wɔ mmle okle di Israel batii kamε nnya!” ¹⁰ Obe wɔ baatii ba baakpee ni kɔtɔ lakple baalaabuo ni leyo, baanya ale kpɛmblate nwu sitoosie nwɔ.

Yesu Lasenkesa Kpisɔfɔ Onwii Obisuɔtɔbi.

¹¹ Ninkpo kamaa, Yesu lakyε okpoo wɔ bɔɔlɛɛ ni Nain kamε. Basaateketete nɔɔ ku batii dikudi kpinwu latikanko nwɔ. ¹² Obe wɔ aadu ni okpoo nwu kasükunya, aakyakako batii kodie bakle kpi boofenko kakookaakɔ. Otii wɔ niakpi nii, obisuɔtɔbi onwii nwu pe aale aata kpisɔfɔ nwu ne. Batii dikudi kpinwu di okpoo nwu kamε lawε

di kpisofa nwu ɔkye. ¹³ Obe wɔ di Yesu lanya ni ɔsanko wɔ mmle, aakpe nwɔ nyaamii. Ninfɛ di Yesu latɔkɔ nwɔ ale, “Die owi.”

¹⁴ Ninfɛ di Yesu lafe kaame lema aalaakpanko kpi alakaa nwu ne. Ninfɛ baatii ba niatuka ni kpi nwu nkpo layila ne. Ni di Yesu labue ale, “Okosopo! Kɔtɔkɔ fɔ nle taka!” ¹⁵ Nfanwu kpi nwu nkpo niataka aasie, aakyako ɔkakate. Ni di Yesu lakpaa nwɔ aata ɔya ne.

¹⁶ Leyekε lapε batii nwu bamuu osie kanya, ni baatansa Yaa ne. Ta nkpo oso baabue ale, “Yaa ɔlaa buetete kple nintɔwa wo kame! Yaa ntoosoo ewa batii nɔɔ odiki!” ¹⁷ Yesu suoto ɔlaa wɔ mmle lakpe kuakyaka Yuda kasɔ nwu suoto ku aba bule amuu.

*Batɔkyente Lakyε Yohane Yaa Ntu Kpeesate
Nfū Baakyε Yesu Nfū.*

¹⁸ Obe wɔ di Yohane basaateketete latɔkɔ ni Yohane selaa se mmle, nfanwu aalee batii banyɔ kaame lema. ¹⁹ Ni aakpee ma Saate nwu nfū ale balaakaale nwɔ ale, “Afɔ ninle otii wɔ ale abawa ni εε, sεε buatoonyu osuku muntɔota otii bamba?”

²⁰ Nioso obe wɔ baawa ni Yesu nfū, baatɔkɔ nwɔ ale, “Ntu kpeesate Yohane lekpee wo ale buwa buɔbakaale fɔ ale, ‘Afɔ ninle otii wɔ aabue ale abawa ni εε, sεε buanyu osuku munta otii bamba?’ ”

²¹ Di obe nwu nkpo kamε, Yesu ntɔɔyɔɔsa batii kpinwu sifiε, ate ate, eetososa anwuna kpile baatii suoto, eetikiti kafɔɔ banumbiɛt kpinwu anu. ²² Ninfɛ di Yesu ladiki kanya aatɔkɔ Yohane basaateketete nwu ale, “Bikple

biɛlaatɔkɔ Yohane asaa ya biɛnya ni ku nya bienu ni bile, banumbiete nfe kɔnya asaa, abafa nfe kɔtaka ankye, batii ba nikofie ni sifiɛ seɛle suoto ntɔɔkpa, batokotɔtɛ nfe konu, bakpi kɔtaka mansie nkpa, bapiite kafɔɔ nfe konu ɔlaa biene nwu nkpo. ²³ Suoto mayɔɔ batii ba ninanya ni ɔlaa kpile kuonwii di suoto nii.”

²⁴ Obe wɔ di Yohane basaateketetɛ ntoosifi beeloo nii, Yesu lakyɛ kasɔ aatoɔkakate aatoɔta batii dikudi nwu nkpo di Yohane suoto ale, “Obe wɔ biadie biakyɛ ni Yohane nfū di ɔfaafuu kamɛ, be biatoonyu osuku bile bianya? Lɛkprenyi le di kɔfɛɛfɔ latɔɔfɛ ni? ²⁵ Be lesaa biadie biakyɛ bialaanya? Otii wɔ niakpe ntu aasie ni di assaa biene kamɛ? Batii ba ninlolaa suoto mansie ni di suoto 1eyɔɔ kamɛ yi, baka ayo mansie. ²⁶ Aye bitɔkɔ mi, be biakyɛ bialaanya? Yaa ɔlaa buetete? Nwaako katɔkɔ ye nii, otii wɔ biakyɛ bialaanya ni nlenke bia Yaa ɔlaa buetete. ²⁷ Diekye Yohane ninle otii wɔ di Kɔkpana Klekle Kukũ lebuɛ ale,

‘Makyesee tɔkyɛntɛ nii anlefɔ katū,
analolaa osuku ante fo.’ ”

²⁸ Yesu lakple aatɔkɔ ma ale, “Yohane nlenke Otii biala beelofo ni kaayi ka mmle kamɛ. Kafɔɔ otii wɔ ninle ni ɔyɛntele di Yaa sekà kaleko, nlenke Yohane.”

²⁹ Batii nwu nkpo bamuu lanu Yohane ɔlaa biene wɔ aabue nii, kyenkye akpooto bafunte lafū Yaa dibiesaa baanu, ninfɛ aakpeesa ma Yaa ntu ne. ³⁰ Kafɔɔ Farisi batii ku kufiofa batuotɛ lasī Yaa dibiesaa, nioso Yohane ditakpeesa ma Yaa ntu.

31 Yesu lakple aabue aakyakaa ale, “Nunua, be lesaa kayo mie akyenfcoole nkaatessa ko? **32** Nkpo bate fe babiso ba ninsi bookpee ni kokyoo di asaa kasunsukoo ne. Boottoko dikudi bamba ale,
‘Buasa sekafcoenu buata ye,
kafco biasi otuu.

Buakpee sikunu buata ye,
kafco biasi kaku owi.’

33 Ntu kpeesate Yohane lawa, aanii kanya, atanyi nta kafco diidii, biatoko nwaa bile, ‘Ninwuna kpile ninsi nwaa!’ **34** Ni di ami, Otii Obi, kafco lewa, lele, lenyi. Ni biobue bile, ‘Banyu lenyate ku tanyintse nwaa lo! Ale akpooto bafunte ku bakpileblate siawo!’ **35** Kafco batii ba bamuu nintikanko ni Yaa ninumbe nkpaamaa, batoodiki beetuo ale ninumbe nwaa dile.”

Yesu Lakyε Simon Wɔ Niale Ni Farisi Otii Leyo.

36 Farisi otii onwii lalae Yesu ale awa abale ko nwaa alesaa. Nioso Yesu lakyε leyo noo aalaasie ale ooleko nwaa alesaa. **37** Osanko onwii lawe di okpoo nwaa kame, aale sonokpete. Nioso obe wo aanu ale Yesu lewa akpe ni di Farisi otii nwaa leyo oole ni alesaa, aayoo lebo kylokylo ninwii di nnonyi konokonoo layii ni aawako. **38** Aabayila di Yesu ɔlaakoo, aatoowi kaku aatookpete di Yesu nkpaatu. Ni di osanko nwaa nkpo layo disi noo sinwini aatoosunsu nnumee be niakpete ni di Yesu nkpaao ne. Aafifii nwaa nkpaatu, ni aanyeesene nnonyi konokonoo nwaa kafco aakpete nwaa ninkpaatu ne.

39 Obe wo di Farisi otii wo niakyakako ni Yesu lanya ni nle mmle, aabue di disi noo kame ale, “Nse otii wo mmle Yaa ɔlaa buetete ale nwaako,

se dikpeni antofo ɔsanko wɔ mmle otiikle wɔ ale ni fie εεwa ɔɔkpango nwɔ nii!"

⁴⁰ Ninfé di Yesu latókɔ nwɔ ale, "Simon, nkpe olaa komie nlɛ ntókɔfɔ nii."

Ninfé di Simon labue ale, "Saatuotε, tókɔ mi olaa wɔ kule ni." ⁴¹ Ninfé di Yesu lakyε kassɔ aatókɔ nwɔ ale, "Otii onwii lawe aatɔɔfensa ato, aatɔɔta batii, ni baatii banyɔ banwii lasiεko nwɔ koto ne. Onwii lasiεko koto ko nikawo ni fe otii kɔwεntεto. ɔnyɔɔfa kafɔɔ lasiεko fe awεntε lefosi kɔkpento. ⁴² Batii ba mmle banyɔ kuonwii dilɔbabuo koto nwu nkpo ɔta. Nkpo oso, ato fensate nwu layɔ ato ya baasiεko nwɔ ni aakyε ma. Baatii ba mmle kame, ɔmenle lema feenyu fale ababɔmbɔ ato fensate nwu anlenkee?"

⁴³ Ninfé di Simon labue ale, "Lefū lenu nlɛ otii wɔ koto nimpo kulenke nii."

Ninfé di Yesu latókɔ nwɔ ale, "Feelolaa feebue, nkpo kute ne."

⁴⁴ Nfa nfε di Yesu lamunikii aanyu ɔsanko nwu, ni aatókɔ Simon ale, "Fɔɔnya ɔsanko wɔ mmle? Obe wɔ lewa ni leyo lefɔ, faatεε ntu nfoto nkpaα, kafɔɔ ɔsanko wɔ mmle leyɔ nnunεε nɔɔ eefoto mi nkpaα εεyɔ disi sinwini nɔɔ eesunsū mi.

⁴⁵ Faafū mi fabla mi atuu ku suoto leyɔɔ. Kafɔɔ diεyɔ ni di obe wɔ lebabuo ni nfū, ayidie mi nkpaatū ofifiɔ. ⁴⁶ Faatεε nnɔnyi fale nkpee diisi. Kafɔɔ ɔsanko wɔ mmle leyɔ nnɔnyi kɔnɔkɔnɔ eekpeete mi ninkpaatū. ⁴⁷ Nkpo oso kɔtɔkɔfɔ nlɛ, di lebabɔmbɔ kple le eediki eetuo mi ni oso, diotuo ale batɔɔyɔ sikpile nɔɔ se kpιnwu εεbla ni bεεkyε nwɔ. Otii wɔ kafɔɔ bεεyɔ sikpile kεεkεε bεεkyε nii, lebabɔmbɔ nɔɔ kafɔɔ kεεkεε ninle."

48 Nfa nfε di Yesu latōkō ɔsanko nwu ale, “Batcɔyɔ sikpile lefɔ bɛekye fo.”

49 Obe wɔ baatii ba niasie ni di alesaa kalekɔ nwu ninfa lanu ni ɔlaa wɔ di Yesu labue nii, baakaale suoto ale, “Owe ninle nwɔ ninfū oofuo bia batii sikpile ɔyɔ ɔkye ma ni?”

50 Ninfε di Yesu latōkō ɔsanko nwu ale, “Ofū onu lefɔ ntoodiki fɔ, nioso tɔɔkye ku atoko ɔkye ole.”

8

Basanko Bawo Latikanko Yesu.

1 Obe owo kamaa, Yesu lakyε aatookyi sekpoo ku nkpayotū kamε, aatoobue ɔlaa biene nwu di Yaa seka kalekɔ suoto. Lefosi batii banyɔ ba kafɔɔ aadiki ni latikanko nwɔ. **2** Basanko ba di Yesu layɔɔsa ni sifiε ate ate ku mba aatososa ni anwuna kpile aadiki ni kaame lema kafɔɔ latikanko nwɔ. Di kamε lema onwii lasie baatɔɔlεs ni Maria Magdalene, nwɔ kamε di Yesu latososa ni anwuna kpile akuεnsi. **3** ɔsanko bamba kafɔɔ kaame lema niale nwɔ baatɔɔlεs ni Yohana, ɔsa baatɔɔlεs Kusa, aale ni Herode kakankɔ asaa nyunte nɔɔfo ne. Basanko bamba kpinwu ku nwɔ kafɔɔ baatɔɔlεs ni Susana latikanko Yesu, baatcɔyɔ mma bamu asaa ya baatcɔwε nii baatcɔkyakaako Yesu ku basaateketete nɔɔ.

Yesu Lape Lekpa Aakyeko Alesaa Kubi Sante Onwii Suoto.

4 Batii kpinwu lakyε sekpoo ate ate baatcɔwa Yesu nfū. Ni di obe wɔ baatii kpinwu ntɔɔbasi nii, Yesu lape ma lekpa le mmle ale,

5 “Alesaa kubi sante onwii lakyε aalaasa alesaa kubi. Obe wɔ ɔɔsa ni kubi nwu koofe kame, kowo lakpete di osuku suoto batii lananafu kū, bakansie kafɔɔ labasesee kū baale. **6** Kowo kafɔɔ lakpete di afuɔ kasɔ. Di obe wɔ kuakɔntɔ nii, kutawε ntu ku kasɔ nwaa kuayila. Nkpo oso kuayɔɔ kuakpi. **7** Alesaa kubi nwu kowo lakpete di siwuu sefa kame. Ni siiwuu sefa nwu lamuɔ siafukiti siatfi alesaa kubi nwu kumuun ne. **8** Alesaa kubi nwu kowo kafɔɔ lakpete di kasɔ biene suoto. Kuakɔntɔ kuamuɔ kuatika abi alafa alafa.”

Di Yesu latoobue ni selaa se mmle, aanyente ale, “Otii wɔ kuunutoko nkpe nii yi, aanu!”

Lesaa Le Oso Di Yesu Lape Ni Lekpa Nwu.

9 Yesu basaateketete nɔɔ lakaale nwɔ lekpa nwu nkpo kasɔ. **10** Ninfε aatɔkɔ ma ale, “Aye beediki lesaatofo le niewofa ni di Yaa sekə kalekɔ beetuo. Kafɔɔ batii bule akpa kame beyɔ bεeta ma ale,

‘Babanya asaa, kafɔɔ blɔbanya bate nsū.
Babanu kafɔɔ, blɔbanu kasɔ.’

Yesu Ladiki Lekpa Nwu Kasɔ.

11 “Lekpa nwu lesɔdiki ninle nle mmle ne. Alesaa kubi nwu nkpo baasa ni ninle Yaa ɔlaa ne. **12** Alesaa kubi nwu nkpo niakpete ni di osuku suoto ninle batii ba, nse beenu ɔlaa nwu nkpo, Abonsam nwa amadiki nwu di situ lema kame, mmle manaafū banu ale Yaa kadiki ma anta ma ni nkpa. **13** Nko kafɔɔ niakpete ni di afuɔ kasɔ suoto, ninle batii ba nse beenu ɔlaa nwu nkpo, manfū nwu ku suoto leyɔɔ. Kafɔɔ kumbuo ma kaame nwaa. Manfū nwu

manu di obe kakuii kame. Nkpo oso nse oso onyu lewa ma di suoto, mankple nkpaamaa. ¹⁴ Alesaa kubi ko kafco niakpete ni di siwuu sefa kame ninle, batii ba nienu ni ɔlaa nwu nkpo, kafco kayika mmle nimiina ku lesaawé ku kayi suoto omenefe okpee nfukiti nintii ma, mámmuo baatika abi. ¹⁵ Alesaa kubi ko niakpete ni di kasɔ biene suoto, ninle batii ba nse beenu ɔlaa biene nwu nkpo, mammufu nwu manklee ku situ biene. Manwakosa suoto kasɔ mankpee okyiini ninaadu obe wɔ beetika ni abi.

Ta Kandie Lefo Akpa Ata Batii.

¹⁶ “Otii kuonwii ninsɔ kandie, aayɔ lesaa aatii nwɔ. Ee aayɔ ase di mpa kalɔ. Kafco antakatesa kandie nwu antika leeba le niɛtaka nii, ale aakpa anta batii ba nikɔwa ni leyo nwu kame. ¹⁷ Lessaa lele niewofa kaakɔ lele, babadiki ni kayi. Lelele kafco beetii beεte diitunu kame, babanya ni mandiki ni manwako lekpa kame.

¹⁸ “Bilolaa atoko bikyɔɔ di selaa se bianu ni suoto. Otii wɔ nienu, eenu ni kasɔ, abakple annu kasɔ anlenkee bia. Otii wɔ ninankyɔɔ ni atoko, keεkεε wɔ eenyu ale eenu nii bia, babakle manfū nwɔ ninnεε mansifiko.”

Owe Ninle Yesu ɔya Ku Babilema?

¹⁹ Yesu ɔya ku Yesu basuɔtɔbi lɛma lawa nwɔ ɔnya, kafco batafuo nwɔ ɔnya, ta batii dikudi nwu oso. ²⁰ Ninfɛ baatii bawo lakyɛ baalaatɔko Yesu ale, “Yaafɔ ku babilee suɔtɔbi n-yɛ kaayi boomie ale banya fo.”

21 Ninfé di Yesu latókó bamuu lëma ale, “Yaami ku babiloo suotobi ninle batii ba nikonu ni Yaa olaa bɔɔbla nwu ni di suoto ne.”

Yesu Lakakate Aata Kɔfɛɛfɔ Kuadie ɔfe.

22 Dii ninwii, Yesu labuo di oklo kame ku basaateketete nɔɔ. Ni aatoko ma ale, “Bita butaale busifi lekpo le mmle semaa.” Nkpo oso baayefe osuku baakyako osifi. **23** Obe wɔ batika ni di ntu osi bɔɔkye nii, Yesu lakyɔsii. Nfanwu, kɔfɛɛfɔ siene kunwii niakyako ɔfe di ntu nwu osi, ntu lakyako ɔpe obuo di oklo nwu kame. Nioso diata ale baasisie di kukpi ku nkpa ntɛɛ.

24 Nioso basaateketete nɔɔ nwu nkpo lakyɛ baalaasenkesa Yesu, baatoko nwɔ ale, “Cnɔɔfo, cɔɔfo! Nfe buokpi lo!”

Ninfé di Yesu lataka aayila aamuɛ kɔfɛɛfɔ ku ntu nwu nikɔkpɛ ni suoto, ni diate kloklo dialo kanana ne. **25** Ni aakaale basaateketete nɔɔ ale, “Fɛ di ofū onu lee nkpe?”

Kafɔɔ oyila ko baayila baatoonyu yaaa, leyɛkɛ kafɔɔ lapɛ ma. Ni baatɔɔkaale bawo ale, “Cmentii okle ninle nwɔ? Ankakate anta kɔfɛɛfɔ ku ntu be nikɔkpɛ ni ale ankyɔɔ nwɔ atoko!”

Yesu Latososa Ninwuna Kpile Ninwii Aadiki Di Osuɔtɔ Onwii Kame.

26 Yesu ku basaateketete nɔɔ lataale baalaadu Galilea lekpo kotoko kakye nyɔɔfa di Gadara kasɔ suoto. **27** Obe wɔ di Yesu lasoo ni di oklo, osuɔtɔ onwii di anwuna kpile nsi ni ladie aakyɛ okpoo nwu kame abakyakako nwɔ. Ditɔɔkle di osuɔtɔ wɔ mmle disinkpee ni awu, ánsie kafɔɔ leeyo. Sɛkya kame ko ansie. **28** Di obe wɔ aanya ni Yesu, aayiisa kudu osie kanya aapɛ akunkyi di

Yesu katū. Ni aabue ale, "Yesu, Yaa wɔ ninlenke ni Obi! Əmenlaa ninsi munkofo ntεε? Kotikiti fɔ lekoto, tannanfi mi kootoko." ²⁹ Osuɔtɔ wɔ mmile labue nkpo, diekye Yesu lamue ninwuna kpile nwu ninsi nwɔ ni kaame ale, "Didie nwɔ kaame!" Obe kpинwu kame ninwuna kpile nwu mmufū osuɔtɔ nwu nkpo, nse beekpee nwɔ nkɔkyɔ ninnεε ku nkpaα, anfefee mi kafɔɔ. Ninwuna nwu nkpaα nwɔ ninsifiko ɔfaafuu kame.

³⁰ Yesu lakaale nwɔ ale, "Le manlεε fɔ?"

Ninfe aatɔkɔ Yesu ale, "Ami manlεε dikudi ne." Aabue nkpo diekye anwuna kpile nwu nsi nwɔ kaame apo. ³¹ Ninfe di anwuna nwu nkpo latikiti Yesu lekoto ale, atantososa ma aakpee di leba le manfuki anwuna kpile mankpee ni di dibiɔ le ninaani kase, diibuo nsi ni kaame.

³² Aplakuo ɔlambu kple onwii latoole alesaa di kabokotee nkpaα ninfa. Ni di anwuna kpile nwu latikiti Yesu lekoto ale, ata ma balaabuo di aplakuo nwu kame. Ninfe di Yesu lata ma osuku ne. ³³ Nfanwu anwuna kpile nwu ladie di osuɔtɔ nwu kame aalaabuo di aplakuo nwu kame. Ni di aplakuo ɔlambu nwu latoso kitikiti aakyе kabokotee nwu nkpaα aalaakpa aabuo die lekpo kame aamemee ntu aakpi ne.

³⁴ Obe wɔ baatii ba niatɔkpa ni aplakuo nwu lanya lesaa le niawa nii, baatoso baasifi sekpo simuu ku afe kame baalaabue ɔlaa nwu baakyakasa. ³⁵ Nioso batii ladie baakyε ale bɔɔlaanyu lesaa le niawa nii. Di obe wɔ babadu ni Yesu nfū, baanya osuɔtɔ wɔ di Yesu latososa ni anwuna kpile nwu aadiki ni kaame nsi di Yesu nkpaatū. Ditɔkpa nwɔ eekpee awu asi kloklo.

Bamuu lema, leyeke lape ma. ³⁶ Batii ba nianya mmle okle diawa nii, latokɔ batii bule mmle okle diabla fie diakpa ni osuɔtɔ wɔ kame die anwuna kpile lasie nii. ³⁷ Nkpo oso ntɛɛ nwu batii bamuu di Gadara kasɔ lawa babatikiti Yesu lekoto ale, adie ma kaasɔ suoto asifi, diekye baayeke. Nkpo oso Yesu labuo di oklo kame aasifi.

³⁸ Osuɔtɔ wɔ kame di Yesu latososa anwuna kpile nwu aadiki ni kaame, latikiti Yesu lekoto ale, "Tee ntikanko fo." Kafɔɔ Yesu ditatuna ni aatokɔ nwɔ ale, ³⁹ "Toɔkye leyo, faalaabue lesaa le di Yaa lebla eeta fo ni." Ninfɛ di osuɔtɔ nwu nkpo lakple aasifi okpoo nwu kame aalaatoobue lesaa le di Yesu labla atɔɔ ni ne.

Yesu Layɔɔsa Yairo Obi Sankobi Ku ɔsankɔ Onwii Ofie.

⁴⁰ Di obe wɔ di Yesu lakple aataale lekpo nwu aasifi nii, batii nwu nkpo lafū nwɔ osie kanya, diekye bamuu lema baatoonyu nwɔ osuku. ⁴¹ Ninfɛ di osuɔtɔ onwii baatɔɔlɛɛ ni Yairo, ale ni Yuda batii kasiisakɔ onofo lawa abape akunkyi di Yesu nkpaatū aatikiti nwɔ lekoto ale, awa baakyɛ leyo nɔɔ, ⁴² diekye obi nɔɔ sankobi onwii wɔ ninkpe nwɔ ni, atoofū ni fe lefosi aleɛ anyɔ, latookpi.

Obe wɔ di Yesu layefe osuku oofe nii, batii kpinwu latikanko nwɔ baamana nwɔ kpinkpī baakyi. ⁴³ Baatii nwu nkpo kame, ɔsankɔ onwii die asaa latoowii ni osie kanya fe lefosi aleɛ anyɔ lasie kaame. ɔsankɔ wɔ mmle ntɔɔlalaasa koto nɔɔ kumuu di bafate sekycɛ ale diayɔɔ nwɔ, kafɔɔ kuonwii ditafuo nwɔ kɔfa ɔbla. ⁴⁴ Nioso aafe di

Yesu semaa di batii nwu kame, aalaakpanko nwɔ awu kotokosi. Nfanwu, asaa owii nwu niabudi.

45 Ninfɛ di Yesu lakaale ale, “Owe niɛkpankoe?”

Kafɔɔ kuonwii ditabue ale nnwɔɔ niɛkpanko nwɔ. Ninfɛ di Petro lakaale nwɔ ale, “Saate, nyu mmle okle baatii nwu lemana fɔ kpinkpī beekyi ni!”

46 Kafɔɔ Yesu labue ale, “N-ye nle otii lekpankoe, diekye osie owo ledie mi kaame.”

47 Obe wɔ di ɔsanko nwu lanya ale Yesu ntootofo lesaa leaabla nii, atafuo suoto owofasa. Aadie aawa aabape akunkyi di Yesu katũ ku ditütükũ di batii nwu anu. Ninfɛ aadiki aabue lesaa le oso aakpanko nwɔ nii, ku mmle di ofie nwu layɔɔ nwɔ ni ninfanwu ne. **48** Nkpo oso Yesu latɔkɔ nwɔ ale, “Obi nii sankobi, ofū onu lefɔ ntɔɔyɔɔsa fɔ ofie. Tɔɔkye di atoko ɔkye ole kame.”

49 Di obe wɔ di Yesu lekple akle ɔlaa nwu oobue nii, tɔkyɛntɛ onwii niakye Yuda batii kasiisakɔ ɔnoɔfo Yairo leyo aawa leba nwu. Ni aabatɔkɔ nwɔ kanya ale, “Obi lefɔ sankobi nwu ntookpi kofokofoko. Nioso taansinkpensa saatuote ninwuna odiki!”

50 Kafɔɔ di Yesu lanu ni ɔlaa nwu nkpo, aatɔkɔ Yairo ale, “Tanyɛke. Afɔ fū fanu falɛ obi lefɔ nwu dibayɔɔ nwɔ.”

51 Obe wɔ di Yesu labuo ni Yairo leyo yi, atata osuku ale otii kuonwii abuo leyo nwu kame ku nnwɔɔ, diediki Petro ku Yakobo ku ɔsankobi nwu ote ku ɔya lete aata osuku baabuo. **52** Batii bamuu ninfa layila baatoowi kaku ta obisɔ nwu

oso. Ninfε di Yesu latōkō ma ale, "Bitansinwi kaku, obiso nwu diekpi ɔkyɔsii ɔɔkyɔsii."

⁵³ Ninfε baatii nwu bamuu lama nwɔ nε, diekye baye ale atookpi. ⁵⁴ Ninfε di Yesu lamufū nwɔ di kanεεtū, ni aalee nwɔ ale, "Obi nii, takā!"

⁵⁵ Nfanwu ɔsankobi nwu ninwuna niakple dia-buo, aasenke. Ninfε di Yesu latōkō ma ale, bamie lesaa batɔɔ ale. ⁵⁶ Lesaa le mmle labla ɔsankobi nwu balofote ɔkpε, kafɔɔ Yesu lakpee ma kufiofa ale, batantōkō otii kuonwii lesaa le niɛwa nii.

9

Yesu Lakpee Basaateketete Nɔɔ Lefosi Banyo Nwu Kɔtɔ.

¹ Nni kamaa, Yesu lalees basaateketete nɔɔ lefosi banyo nwu asiisa, ni aadiiki ma osuku aata ma kafɔɔ otumi ale baayɔ mantososa anwuna kpile amuu, manyɔɔsa sifiɛ ate ate kafɔɔ. ² Ninfε aakpee ma ale batɔɔkye baalaabue Yaa sekə kalekɔ selaa bata batii, baayɔɔsa bafiete sifiɛ.

³ Fie nfe babasifi nii, Yesu latōkō ma ale, "Bitanyo lesalesaa biaklee di osuku nwu biofe ni kamε. Bitanklee ɔkyεnwo-so, ee asaa ɔkaale kotofo ee alesaa ee koto. Bitanklee bia osi awo nyɔɔfa.

⁴ Kakɔ lele beefū ye, biesie leeyo nwu nkpo dilaase di dii le bibadie ni di okpoo nwu nkpo kamε. ⁵ Nse baafū ye di okpoo owo kamε, nfe biodie ninfa minsifi, biefente nkpaasɔ lee kɔtε bite ma. Nni nimatuo ale baasī ye ofū nε."

⁶ Ninfε di basaateketete nwu nkpo lasifi, baakyε baalaakyi nkpayotū mmuu kamε, baabue Yaa ɔlaa biene nwu baayɔɔsa kafɔɔ batii sifiɛ kaakɔ biala.

Herode Lakpɔkρtɔ Diisibu Kame Ta Yesu Oso.

⁷ Obe wɔ di Herode wɔ niatoole ni sekə di Galilea kasɔ lanu ni asaa ya niatɔɔwa nii, aakpɔkρtɔ. Diekye batii bawo latoobue ale, Ntu Kpeesate Yohane nintookple εεtaka eekye bakpi kame εεwa. ⁸ Batii bamba kafɔɔ latoobue ale, Elia ntookple εεwa. Ni baawo kafɔɔ latoobue ale Yaa ɔlaa buεtεtε owo nintookple εεtaka εεwa ninkpa. ⁹ Ni di Herode labue ale, “Ami niata baabudi Yohane disi, ni owe ninle otii wɔ mmle suoto konu selaa se mmle nkyeko ni?” Nkpo oso Herode latoomie osuku wɔ abafe annya ni Yesu.

Yesu Lata Basuɔtɔ Nkpe Nnɔɔ Alesaa Baale Baamie.

¹⁰ Obe wɔ baasaateketete nwu nkpo lakple baawa nii, baatɔkɔ Yesu asaa ya amuu baabla nii. Ninfɛ di Yesu lakpaa lete lama aasifiko okpoo wɔ bɔɔlɛɛ ni Betsaida ne. ¹¹ Obe wɔ baatii kpinwu lanu nii, ni baatikanko nwɔ baakyε nfa ne. Yesu kafɔɔ lafū ma, ni aakakate aata ma di Yaa sekə kalekɔ suoto ne. Ni aayɔɔsa mba niatoofie ni kaamε lema sifiε ne.

¹² Obe wɔ kuufī nfe kofe ni ɔmɛɛ, ninfɛ di basaateketete nɔɔ lefosi banyɔ nwu nkpo lawa Yesu nfū baabatɔkɔ nwɔ ale, “Ta batii nwu nkpo batɔɔkyε nkpayotū ku afe ya baatii nte ni, εεtεtεɛ wo ni kame, baalaamie alesaa ku ntenkɔ. Diekye leba le bukpe nii ayo nnaa ninfū.”

¹³ Kafɔɔ Yesu latɔkɔ ma ale, “Aye bamu bimie alesaa bita ma bale.”

Nfa nfe baatɔkɔ Yesu ale, “Alesaa ya bukle ni ninfū ninle bloblo akudi anɔɔ ku kɔkpaku kɔnyɔ, sεε foomie falε bukyε buɔlaaya alesaa buwako

banankpantii ba?" ¹⁴ Basuɔtɔ ba niawɛ ni ninfa kabla fe nkpe nnɔɔ.

Ninfe di Yesu latɔkɔ basaateketete nɔɔ nwu ale, "Bita batii nwu nkpo basie kaasɔ akudi akudi. Diikudi ninwii dibla fe batii afosi anɔɔ." ¹⁵ Di basaateketete nwu labla nkpo baalo nii, ¹⁶ ninfe di Yesu layɔ bloblo akudi anɔɔ ku kɔkpaku kɔnyɔ nwu nkpo, ni aatakatesa anu aanyu osi ne. Ninfe aapɛ Yaa sefa diisi lenya ne. Ninfe abεbeɛ nya aayɔ aata basaateketete nɔɔ ale base bata batii nwu ne. ¹⁷ Bamuu lɛma baale baamie, ni basaateketete nwu lasiisa kɔkyeɛ kɔkyeɛ ko niabu ni ne. Kuayii lefosi nkyikye nnyɔ.

Petro Labue Ale Yesu Ninle Otii Wo Beediki Ni Ne.

¹⁸ Dii ninwii obe wɔ di Yesu lete latɔɔpɛ ɔlaa aatɔɔta ni Yaa, basaateketete nɔɔ lawa ɔkye nɔɔ. Ni aakaalɛ ma ale, "Owe baatii kobue ale nnle?"

¹⁹ Ninfe baatɔkɔ nwɔ ale, "Batii bawo kobue ale Ntu Kpeesate Yohane fale. Bawo kafɔɔ kobue ale, Elia fale. Fiɛ baawo kafɔɔ kobue ale, aaa Yaa ɔlaa buetete onwii nintookple εεtaka εεwa ninkpa."

²⁰ Ninfe aakaalɛ ma ale, "Ni aye mɔ, owe biobue bilɛ nnle?"

Ninfe di Petro ladiki kanya ale, "Afɔ ninle Kristo wo bεεre ni ɔfɔɔ ne."

Yesu Lakakate Aakyeko Dibuo Nɔɔ Ku Kukpi Nɔɔ Suoto.

²¹ Ninfe di Yesu laakpee ma kufiofa osie kanya ale, batantɔkɔ otii kuonwii ɔlaa wɔ mmle. ²² Yesu lakple aatɔkɔ ma ale, "Dikpe ni, ami, Otii Obi nwu, lefe di dibuo kamɛ di okpoo banɔɔfo ku

olebatate banççfo ku kufiofa batuotε nnεε kame, beesī mi, beelo mi. Kafçç di dii tiefa kame, Yaa makple ansenkesεε ankyeko bakpi kame anwako nkpa."

²³ Ninfε di Yesu latçkɔ bamuu lεma ale, "Nse otii owo komie ale awa abatikankoe, ni dikpe nii ansī suoto nɔɔ, an-yɔ aatoo nɔɔ, antikankoe dii biala. ²⁴ Diekye otii lele nikomie ale ata nkpa nɔɔ, abayu mi. Kafçç otii lele nieyu nkpa nɔɔ ta ami otikanko oso, nwaako, abawε nkpa. ²⁵ Lεmentota biene di otii mawε nse εεwε kayi ka mmle asa amuu eeyu nkpa nɔɔ? ²⁶ Nse ami ku asaatuo nii ya kotuo ni amuu lεkpε otii owo sinunso, otii nwu kafçç makpε, ami, Otii Obi nwu, sinunso di obe wɔ mawa ni lεekpa nii kame ku Yaa batɔkyente klekle bamuu lεkpa kame. ²⁷ Nwaako, kɔtɔkɔ ye nlε batii bawo nsi kaame lee ninfū, bɔlɔçwa ɔbakpi dielase di obe wɔ di Yaa lediki sɛka nɔɔ kalekɔ eetuo ma nii."

Yesu Letembi Lakyi Di Kobokote Osi.

²⁸ Fe nanwɔkyī semaa di Yesu labue ni selaan se mmle, aakpaa Petro ku Yohane ku Yakobo aasifiko kabokotee kanwii osi ale, bɔɔlaape ɔlaa manta Yaa. ²⁹ Obe wɔ cɔrε ɔlaa anta ni Yaa, anu nɔɔ lakyi. Awu nɔɔ kafçç lapu fututu aatoosese di anu. ³⁰ Nfanwu, ni baasuɔtɔ banyɔ banwii labayila baatɔɔkakate ko nwɔ ne. Basuɔtɔ nwu niale Mose ku Elia ne. ³¹ Baakyɔɔ di Yaa kafçç leklekle kame, ni bakakateko Yesu di osuku wɔ suoto abafe anyente lesaa le di Yaa komie ni kuukpi nɔɔ kame di Yerusalem ne. ³² Petro ku bawo nɔɔ labuo sεεkyɔsi kame osie kanya, kafçç

baasenke baanya leklekle le kame di Yesu lasie nii ku batii banyo ba niayila nwɔ ni di oloko. ³³ Obe wɔ baatii nwu nkpo latoosifi nii, Petro latoko Yesu ale, “Saate, nwaako nfū mmle loo ḥowa lete dile! Ta bupe akpanta atie ninfū. Anwii alefɔ, anwii Mose ale, anwii kafɔ Elia ale.” Atate aatofo bia ɔlaa wɔ aatoobue nii.

³⁴ Di obe wɔ eekple aye ɔokakate nii, dituntū ninwii lasoo diawa, diablefɛ diatii ma suoto. Basaateketete nwu nkpo layeke obe wɔ diituntū le mmle lakyɔ ma ni di suoto. ³⁵ Ninfɛ di sɛlo ladie di dituntū nwu kame siabue ale, “Nnya Obi nii ninle nnwɔ ne. Nnwɔ lediki nii bikyɔ nwɔ atoko!” ³⁶ Obe wɔ sɛlo nwu laloo ni ɔkakate, baanya nii, Yesu lete nfe niabu aayila. Basaateketete nwu layɔ asaa ya baanya ni ninfa baakookaa, batabe kanya baatoko otii kuonwii di obe nwu nkpo kame.

Yesu Latososa Ninwuna Kpile Aadiki Di Osuɔtɔbi Onwii Kame.

³⁷ Kaleesɛ, Yesu ku basaateketete nɔɔ nwu batie lasoo baakyɛ kabokotee nwu nkpo osi baawa. Ninfɛ baatii kpinwu lawa babakyaka ko nwɔ ne. ³⁸ Ninfɛ di osuɔtɔ onwii lafaa osie kanya aabue ale, “Saatuote! Kotikiti fɔ lekoto, nyu obi nii! Obi nwu onwii Pe! ³⁹ Ninwuna kpile ninwii nkpreko nwɔ, ninta ale nfanwu, anyiisa kudu osie kanya. Ambensa suoto anfuki nwɔ anlaasa kaasɔ, afuuta ntoodie nwɔ kaanya. Nse diɔkpereko nwɔ nkpo ninwɛ osie fie niinwuna nwu ndie nwɔ. ⁴⁰ Letikiti basaateketete lefɔ lekoto nle batososa ninwuna kpile nwu batɛɛ, kafɔ baafuo ni otososa.” ⁴¹ Ninfɛ di Yesu latoko ma ale, “Aye,

miε akyεnfɔole, be oso biloofū mi binu, biɔbla otokopī nkpo? ɔmεmbe okle biomie bile nsieko ye naase? ɔmεmbe okle kakpee otu nnanfi ye nnaase?” Ni aatɔkɔ osuɔtɔ nwu ale, “Kpaa obi lɛfɔ nwu fawako ninfū.”

⁴² Obe wɔ di ote kɔkpaa nwɔ aanwako nii, nfanwu, ninwuna kpile nwu niapε nwɔ diate kaasɔ aakyako ɔnananfi tii. Ninfε di Yesu lamue ninwuna nwu aadiki di obisɔ nwu nkpo kame, aayɔɔsɔɔ ofiε, aakpaa nwɔ aata ote ne. ⁴³ Diabla batii nwu bamuu ɔkpε di Yaa otumi kple wɔ mmle suoto.

Yesu Lakple Aakakate Di Kukpi Nɔɔ Suoto.

Obe wɔ di assaa ya amuu di Yesu labla ni latɔɔbla ni batii nwu ɔkpε oso, Yesu latɔkɔ basaateketete noo ale, ⁴⁴ “Bitanyee lesaa le lakye kasɔ latɔtɔkɔ ye nii! Babayɔ ami, Otii Obi nwu, mankpee di batii nnεε kame.” ⁴⁵ Kafɔɔ basaateketete ba mmle ditanu ɔlaa wɔ mmle kasɔ. Dile lesaa le baayɔ baawofasa ma nii, kafɔɔ baayɛkε nwɔ ɔlaa ɔkaale di ɔlaa nwu suoto.

Yesu Ladiki Otii Wɔ Ninlenke Ni Aatu.

⁴⁶ Kanani kanwii labuo di basateketete nwu ntεε ale, owe niefū kɔya kaame lema alenke. ⁴⁷ Di Yesu latofo lesaa le disi baatoobu ni oso aayɔ obisɔ onwii aase die anu lema di katū nɔɔ. ⁴⁸ Ninfε aatɔkɔ ma ale, “Otii wɔ niefū obisɔ wɔ mmle leeyooto nii kame, ami eefū. Otii wɔ kafɔɔ niefū mi nii, eefū otii wɔ niekpee mi ni kɔtɔ. Diekye otii wɔ niɛwakosa ni suoto kasɔ nnwɔɔ niefū kɔya alenke bamuu ne.”

*Otii Wɔ Ninantaka Ayila Ye Ni Di Suoto, Aye
Ye Kamaa.*

⁴⁹ Ninfé di Yohane latoko Yesu ale, “Gnocofo, buanya osueto onwii kotososa anwuna kpile baatii suoto leeyoto lefɔ kamε, ni buatoko nwɔ bulé adie, diekye aasi wo kaamε.”

⁵⁰ Ninfé di Yesu latoko basaateketete nɔɔ ale, “Bitantii nwɔ osuku. Diekye otii wɔ ninantaka ayila wo ni di suoto, bitofo bile, ni aye wo kamaa.”

*Baasi Yesu Ofū Di Samaria Kakpayotū Kanwii
Kame.*

⁵¹ Di obe ntɔɔteetεε ale Yaa kakpaa Yesu ansifiko ni osi,aabla disibu, aadie aayefe osuku aatoofe Yerusalem. ⁵² Aakyese batɔkyεntε bawo ale balekatū baso kakpayotū kanwii kamε di Samaria, balaalolaa asaa bate bata ɔwa nɔɔ.

⁵³ Kafɔɔ di okpoo nwu batii latofo ale ɔwaale ɔowale anfe ni Yerusalem oso, batatuna ale boofū nwɔ. ⁵⁴ Di obe wɔ di basaateketete nɔɔ ba ninle ni Yohane ku Yakobo latofo nii, baaleε Yesu ale, “Saate, foomis fale bulεε oto kuokye osi kuwa kubawɔɔsa ma?” ⁵⁵ Ninfé di Yesu lamunikii aasī ɔlaa aata ma ne. ⁵⁶ Ninfé di Yesu ku basaateketete nɔɔ lawaale baasifi kakpayotū bamba ne.

Batii Bawo Lamiε Ale Bootikanko Yesu Nkpaa-maa.

⁵⁷ Obe wɔ bakye di osuku boofe nii, osueto onwii lawa aabatoko Yesu ale, “Santuote, kakɔ lele fabakyε, matikanko fɔ.”

⁵⁸ Ninfé di Yesu latoko nwɔ ale, “Nkpikiti nkpe atue ya kamε mansie nii, bakansie nkpe ayo

mante nii. Kaf  o ami Otii Obi, nnaa leba kate ni disi.”

⁵⁹ Ni di Yesu lat  k   otii bamba ale, “Tikankoe.”

Kaf  o otii nwu labue ale, “Saate, t  enky   ninakookaa teemi fie.”

⁶⁰ Ninf   di Yesu lat  k   nw   ale “Ta batii ba ninte ni f   bakpi bakookaa mma bamu bakpi lema. Kaf  o af   yi, t  oky   falaabue Yaa sek   kaleko   laa nwu.”

⁶¹ Otii bamba kaf  o lat  k   Yesu ale, “Saate, matikanko fo. Kaf  o t  e osuku ninky   naata batii nii bamu letoko fie.”

⁶² Ninf   di Yesu lat  k   nw   ale, “Otii w   nf   ninkle ni l  nwa ay   ni kat  , ookple annyu ni semaa, diesieko ata Yaa sek   kaleko nwu   kp  .”

10

Yesu Lakpee Batikankote Afosi Akuens   Batii Bany   K  to.

¹ Nle mmle semaa, Saate nwu ladiki basu  t   afosi akuens   basu  t   bany   bamba, aakpee ma bany   bany   ale baky   sekpoo ku nkpayot   be kame   owa ni   bakye. ² Ni aat  k   ma ale, “Ofiel   nwu mpo, kaf  o bafiel  te di  r  . Nkpo oso bip     laa bita Saate nwu nimba ni ofiel   nwu nkpo bili  , aakyese bafiel  te mamakyakaako di ofiel   nwu nkpo kame mansiisa.” ³ Bit  oky  ! Kokyesee ye f   afosobi di bakplele kame. ⁴ Bitanklee koto lekpeesa ee asaa   kaale kotofo ee ntokota. Bitanyila di osuku kaf  o bile bi  se  sa otii kuonwii.

⁵ “Leyo lele kame biebuo, bile kat   bis  esa ma bile, ‘Atoko   ky   ole disieko leyo le mmle batii.’ ⁶ Kaf  o nse otii w   nimboomb   ni atoko   ky   ole owo nkpe ninfa, ni bi  ta atoko   ky  

ole lee ditikanko nwɔ. Kafɔɔ nse kuonwii nnaa yi, ni bieta atoko ɔkye ole lee dikple diwa ye ɔkye. ⁷ Bikple bisie di leyo le kame beefū ye ni. Bile, bienyi lesaa lele bɛeta ye, diekye kpemblate ninfū koto. Bitandie leeyo lewo kame, biasifi lɛbamba kame.

⁸ “Okpoo lele kame biɛkye, beefū ye yi, biele lesaa lele bɛeta ye. ⁹ Biɛyɔɔsa bafiɛtɛ ba ninkpe ni di okpoo nwu kame sifie. Biɛtɔkɔ okpoo nwu batii bilɛ, ‘Yaa sɛka kalekɔ nwu ntɔɔteɛtɛɛ ye.’ ¹⁰ Kafɔɔ nse biɛkye okpoo owo kame, di okpoo nwu batii diefū ye, biɛkye okpoo nwu lɛkpaka biebus bilɛ, ¹¹ ‘Okpoo lee kɔtɛ ko ninka wo ni di nkpaasɔ, buɔfente munte ye. Kafɔɔ binyuma bilɛ Yaa sɛka ole bee ntɔɔteɛtɛɛ!’ ¹² Nioso kɔtɔkɔ ye ntikiti nle di lɛkankoyi suoto, Yaa manya Sodom okpoo nyaami, anlenkee okpoo nwu!

Sekpoo Sewo Ditatfū Yesu ɔlaa.

¹³ “Korasin okpoo batii, biyɔɔsa! Betsaida okpoo batii, ayee biyɔɔsa! Nse Tiro ku Sidon sekpoo kpile nwu kame nimbla sɛkpe se niebla ni ɔkpɛ ntuo, nse batoosie kaasɔ kofokofoko, beenyukū sikplakpi, beefifia ntɔ di suoto bee-tuo ale batookyi di sikpile lɛma! ¹⁴ Yaa manya Tiro ku Sidon sekpoo nyaami anlenkee ye di lɛkankoyi suoto. ¹⁵ Ni afɔ Kapernaum, foonyu fale babatakatesa fɔ katoo mansifiko osi? Babawakosa fɔ kasɔ mankpee fɔ di kawɔɔ kame!”

¹⁶ Ninfe di Yesu latɔkɔ basaateketetɛ nɔɔ ale, “Otii lele niɛkyɔɔ ye atoko, ami εɛkyɔɔ atoko. Otii lele kafɔɔ niesī ye, ami eesī. Otii lele kafɔɔ niesī mi, eesī otii wɔ niekpee mi ni kɔtɔ.”

Batii Afosi Akuensī Batii Banyo Nwu Lakple Baawa Yesu Nfū.

17 Batii afosi akuensī batii banyo nwu lakple baawa ku suoto leyoō kple. Ni baatōkō Yesu ale, “Saate, bia anwuna kpile lanu wo ɔlaa aadie, buatososa nya ni di leyooto lefō kamē.”

18 Ninfé di Yesu latōkō ma ale, “Lanya Satana kókpaa ankye osi fē mmle di ɔplalaam munaa nii.

19 Bikyō atoko bienu nwaa! Ntōcta ye otumi nlē biafuo ɔkye di asaanwu ku nnkpakana suoto, ku lo nwu situmi nōcō simuu suoto ale lesalesa dilaabla ye. **20** Kafōcō, bitanta suoto layōcō ye ale anwuna kpile lekyōcō ye ni atoko oso. Kafōcō suoto siyōcō ye ale Yaa ntōckpana ye ayooto εετε di Yaa kafa.”

Yesu Latansa Yaa.

21 Di obe nwu kamē, Yaa Ninwuna lakpee Yesu suoto leyoō ni aabue ale, “Teete, osi ku kasō Saate, kōpe fō sefa. Diekye asaa ya feeyō feekookaa ni baküyente ku banumbente, nnya fatoodiki feetuo batii ba ninanye ni akū nē. Nwaako, Teete, nkpo okle foomie fale dite nē.”

22 Ninfé aakple aabue ale, “Teemi leyoō asaa amuu eekpee mi ninnē kamē. Kuonwii dieye otii wō ninle ni Obi nwu, diediki Ote lete. Otii kuonwii kafōcō dieye Ote nwu diediki Obi lete ku batii ba di Obi nwu nkpo komie ale adiki atuo nii.”

23 Ninfé di Yesu lamunikii aatōkō basaateketetē nōcō nwu nkpo buue ale, “Aye leleye nlē ale bionya asaa ya bionya ni lo! **24** Kotōkō ye nlē, Yaa ɔlaa babuetete kpinwu ku baka lamié ale bōcunya

lesaa le bionya nii, kafco batanya. Baamiε kafco ale boonu lesaa le bionu nii, kafco batanu.”

Yesu Lape Lekpa Di Samaria Otii Futulete Onwii Suoto.

²⁵ Kufiofa tuote onwii lawa ku disibu ale ooβaso Yesu annyu. Ni aakaale nwɔ ale, “Saatuotε, be kabla fie kawε nkpa be ninnaa ni kaloo?”

²⁶ Ninfε di Yesu ladiki kanya aakaale nwɔ ale, “Le Koɔkpana Klekle Kukū lebue fie? Le feenu olaa nwu nkpo kafco kasɔ?”

²⁷ Ninfε di osuɔtɔ nwu nkpo ladiki kanya ale, “Bɔmbɔ Saate Yaa lefɔ ku otu lefɔ omuu, ku ninwuna lefɔ nimuu ku osie lefɔ omuu ku disibu lefɔ nimuu, ni faabɔmbɔ owo lefɔ kafco fe mmle fambɔmbɔ ni suoto.”

²⁸ Ninfε di Yesu latɔkɔ nwɔ ale, “Mmle feebeue nii, nkpo kute ne. Ni bla nkpo fabawε nkpa.”

²⁹ Kafco kufiofa tuote nwu nkpo lamie ale ɔcta suoto lebe, nioso aakaale Yesu ale, “Owe ninle mi owo?”

³⁰ Ninfε di Yesu ladiki kanya ale, “Obe onwii, osuɔtɔ onwii lawε, aakye Yerusalem aatoofe Yeriko okpoo, ni baayu lamufu nwɔ di osuku ne. Baare nwɔ, baadiki nwɔ asaa di suoto, ni baadiε nwɔ baate ninfa, ooloo okpi. ³¹ Ni diabawa ale Yaa oletate onwii labafe di osuku nwu suoto. Kafco obe wɔ aanya ni osuɔtɔ nwu nkpo di osukulɔɔko, aawaale nwɔ aafe kaakyε nyɔɔfa aasifi. ³² Nkpo okle di oletate kyakaakotε onwii kafco bɔɔlε ni Lewi labatoofe ne. Obe wɔ aanya ni nwu, nnwɔɔ kafco aawaale nwɔ aafe di osuku kakye nyɔɔfa aasifi. ³³ Kafco Samaria otii onwii latoofe osuku, aakyε di osuku nwu nkpo

suoto, abakyakako osuotə nwu. Obe wɔ aanycc nii, kafutu lanyinyii nwɔ. ³⁴ Ninfe aakyε aalaadu nwɔ, ninfe aayɔ nnɔnyi ku nta aakpete nwɔ di nkɔ nwu suoto, ninfe aaninii nwɔ nkɔ nwu mmuu ne. Ni aakenke osuotə nwu nkpo aatika di nnwɔc omu nɔc bɔkɛs wɔ suoto aasiε nii. Ni aakpaa nwɔ aasifiko bafɔc kafunkɔ, aalaanyu nwɔ ne. ³⁵ Obe wɔ kale lase nii, Samaria otii nwu layɔ koto kowo aata bafɔc kafunkɔ nyunte, aatɔkɔ nwɔ ale, ‘Toonyu fiɛtε nwu. Nse kokple mmafe, lessaa lele feekple fɛlalaasa di suoto nɔc, kamata nta fo.’ ”

³⁶ Nfa nfe di Yesu lakaalɛ kufiofa tuotε nwu ale, “Afɔ fɔɔnya nii, di batii ba mmle batie kame, owe lema ninle osuotə wɔ niabuo ni baayu nneɛ kame siɛwo?”

³⁷ Ninfe di kufiofa tuotε ladiki kanya ale, “Otii wɔ nianycc ni nyaami.”

Ni di Yesu latɔkɔ nwɔ ale, “Afɔc yi, tɔɔkyε falaabla nkpo.”

Yesu Lakyε Marta Ku Maria Nfū.

³⁸ Dii ninwii Yesu ku basaateketete nɔc latoofe osuku, ni baalaadu okpoo onwii ne. Nfa di ɔsanko onwii bɔɔlɛs ni Marta lafū nwɔ kɔfɔc di leyo nɔc ne. ³⁹ Marta wɔ mmle lawɛ obilema sankobi onwii baatɔɔlɛs ni Maria. ɔsanko wɔ mmle lalasiε di Yesu nkpaatū aatoonu nwɔ assaa otuo. ⁴⁰ Leyo ɔsaabla latika di Marta lete suoto, nioso diatoobuo nwɔ suoto. Ni aakyε aalaatɔkɔ Yesu ale, “Saate, ni faayɔ nwu ole fale obiloo ntoodie leyo sɛkpɛ eetika mi di suoto? Tɔkɔ nwɔ aawa abakyakaakoe!” ⁴¹ Ninfe di Yesu latɔkɔ nwɔ ale, “Marta! Nyu mmle fookpee ni suoto

kubue di asaa kpinwu suoto lo. ⁴² Lesaa ninwii pe nieff. Nni ninle dibiene le di Maria ntoodiki ni ne. Kuonwii kafco dilabafu nwɔ ninnɛɛ."

11

*Yesu Latuo Basaateketete Nɔɔ Mmle Baapɛ
Olaa Manta Ni Yaa.*

¹ Dii ninwii, Yesu lawe leeba ninwii aatcoope olaa aatcoota Yaa. Obe wo aaloo nii, Saateketete nɔɔ onwii lawa nwɔ ɔkye abatoko nwɔ ale, "Saate, tuo wo mmle mampe ɔlaa manta ni Yaa, fe mmle di Yohane latuo ni basaateketete nɔɔ."

² Ninf di Yesu latoko ma ale, "Nse biçpɛ ɔlaa minta Yaa yi, biebue bile,

'Teete,

ta balee leyooto lefɔ klekle nwu ku dibu.

Seka kalekɔ lefɔ diwa wo kaame.

³ Ta wo dii alesaa ya buale ni obe lele.

⁴ Faayɔ sikpile loo fakyɛ wo,

diekye awo kafco mun-yɔ munkye otii lele niɛbla wo okpile.

Tankpaa wo faakpee di ɔɔ onyu kamɛ.' "

⁵ Ninf di Yesu latoko basaateketete nɔɔ ale, "Nse diewa ale onwii kamɛ lee lekye siewo nɔɔ nfū di nkyentɛɛ εεlaatoko nwɔ ale, 'Siewo, fensa mi bloblo akudi atie awo, ⁶ diekye siewo nii onwii lekye osuku εεwa εbasoosa di ɔkye nii nunua. Lelesaa kuninwii diete mi kamayɔ ntɔɔ anle nii!'

⁷ "Di siewo lefɔ nwu letokofo ale, 'Tandiki mi ninwuna! Munko babi nii nfe butocoose leyο kafco kofokofoko. Namasin fuo kafco okple ɔtaka mayɔ lesalesaa kuninwii nta fo.' ⁸ Kotoko ye nlɛ, se kunte ɔlobataka ayɔ bloblo nwu nkpo aatco

ta siɛwo nɔɔ ale ni oso, abataka an-yɔ lesaa lele niefi nwɔ antɔɔ, nse sinunso diɛkpɛ nwɔ eekpee okyilini aye ɔɔkaale, ɔkaale.

⁹ “Nkpo oso kɔtɔkɔ ye nlɛ bikaale Yaa asaa, abayo anta ye. Biwolaa asaa, abata ye minnya. Bipɛ nwɔ kokloo kɔnɛɛ, abaseketɛ anta ye. ¹⁰ Diekye otii lele niɛkaale Yaa asaa, an-yɔ antɔɔ. Otii lele niewolaa, antɔɔ anya. Otii lele kafɔɔ niɛpɛ Yaa kokloo kɔnɛɛ, anseketɛ antɔɔ.

¹¹ “Aye ba ninle ni babi bate, nse obi lee lɛkaale ye kakpaku, min-yɔ kɔsaanwu mintɔɔ? ¹² Ee min-yɔ kakpakana mintɔɔ nse εɛkaale ye lɛkɔɔkɔfū? ¹³ Bia aye ba ninle ni bakpileblate yi, biye mmle okle biayo asaa biene minta ni babi lee. Ni le oso nfe di Teeye wɔ ninkpe ni di osi ate ni klekle dilaayo Ninwuna Klekle ata batii ba niɛkaale nwɔ ni alenkee!”

Batii Bawo Lanansi ɔlaa Di Yesu Ku Beelsebul Otumi Suoto.

¹⁴ Di obe onwii, Yesu latootososa ninwuna kpile ninwii ninanfuo ni ɔkakate di otii onwii kamɛ. Obe wɔ di ninwuna nwu ladie ni di otii nwu kamɛ, aakyako ɔkakate. Lesaa le mmle labla batii ba niayila ni ninfa ɔkpɛ. ¹⁵ Kafɔɔ batii bawo labue ale, “Anwuna kpile ɔka wɔ bɔɔlɛɛ ni Beelsebul niɛtɔɔ otumi nwu nkpo ootososa nya andiki.” ¹⁶ Batii bawo kafɔɔ lamie ale bɔɔkyɔɔ Yesu okū, nioso baatɔkɔ nwɔ ale, abla lesaa le niɛbla ni ɔkpɛ, diatuo ale Yaa nfū eekye ni.

¹⁷ Kafɔɔ Yesu latofo lesaa le bakle ni di disibu lɛma kamɛ. Nkpo oso aatɔkɔ ma ale, “Kale ka niesɛ ni suoto akudi akudi kɔɔkpɛko ni suoto, ninyila diidii. Leyo le kafɔɔ niesɛ suoto

bεεtaka bayε ni baawo suoto mbiε. ¹⁸ Nkpo oso nse Satana sεka kaleko lεsε suoto akudi akudi bɔɔkpεko bawo, le sεeka kaleko lεma nwu mayila? Biobue bile kotososa anwuna kpile diekye Beelsebul nietεε otumi fie koblε nkpo. ¹⁹ Ni nse Beelsebul suoto kofe ntososa nya, ni owe suoto baatikankote lee mma, baafe baatososa anwuna kpile baadiki baatii kame? Aye bamu batikankote lee kodiki mantuo ale ole ye nnaa. ²⁰ Oowo! Kafɔɔ Yaa otumi kame kotososa anwuna kpile ndiki. Nle mmle kotuo kafɔɔ klekle ale, Yaa sεka kaleko ntɔɔwa ye kame kofokofoko.

²¹ “Nse siente owo lεyɔ akpesaa nɔɔ amuu εεkpakū aye oonyu leyo nɔɔ yi, lεsalεsaa nɔɔ kuninwii nin-yu. ²² Kafɔɔ nse otii wɔ ninkpe ni osie alenke nwɔ ni lεbakpe ko nwɔ eelenkee nwɔ, anklee akpesaa nɔɔ ya suoto eetika ni disi anfū di nnεs nɔɔ, lenkeetε nwu n-yɔ asaa ya beefū nii manse ku bawo nɔɔ.

²³ “Otii lele ninan-yε mi kamaa, nwaako εεtaka aye mi di suoto. Otii lele kafɔɔ ninakyakaakoe busiisa kamaa, ɔsamiiisa ansamiisa.

Ninwuna Kpile Okple Ḍwa.

²⁴ “Nse ninwuna kpile ledie di otii kame, ninaakyε ninkyi aba ya niekoso nii ninmie leba le diasie nii. Nse diewε leba kuninwii, ninmbue ale, ‘Makple nsifi leyo nii le kame ladie nii.’ ²⁵ Nkpo oso ninkple ninwa, ninmanya ale batoofie leyo nwu kame nimuu, bεεbla ni klekle. ²⁶ Ta nkpo oso, ninkple ninsifi ninaakpaa anwuna kpile akueñsi ya ninkpe osie alenke nwɔ nii, manwa, mamayie mansie di otii nwu kame. Di kayεntεkɔ,

otii nwu nkpo nkpa be nfε ansiε ni, nlalaan ninlenkee nkpa kasale be aasiε nii.”

*Yesu Latuo Asaa Aakyeko Otii Wɔ Ninkpe Ni
Suoto Lεyɔɔ Nwaa Suoto.*

²⁷ Di obe wɔ di Yesu ntoobue selaa se mmle eeloo ni sεmaa, ɔsanko onwii lafaa osie kanya baatii nwu kame aabue ale, “Suoto siyɔɔ ɔsanko wɔ nialakafɔ ni lεme aata fɔ lεnyεε, faanyεεfu ni!”

²⁸ Ninfε di Yesu labue ale, “Kafɔɔ batii ba nikonu ni Yaa ɔlaa, bɔɔbla nwu ni di suoto, di suoto siyɔɔ!”

*Yesu Lasī Ale ɔlɔbabla Dituosaa Kuninwii
Atuo.*

²⁹ Obe wɔ baatii dikudi labasi ni di Yesu ɔkyε, ninfε aatɔkɔ ma ale, “Miε akyεnfɔole ntɔɔlalaaloo! Sekpε se niεbla ni ɔkpε bomie ale banya, kafɔɔ blɔbanya dituosaa kuninwii dilenkee Yona lele le okle. ³⁰ Fe mmle ke di Yaa ɔlaa Buetεtε Yona lale ni ɔte onyu aata ni Niniwe batii, nkpo kafɔɔ di Otii Obi nwu male ɔte onyu anta miε akyεnfɔole ne. ³¹ Di lεkankoyi suoto, oka sanko wɔ niakye ni kala kasɔ, mataka anyila ankanko miε akyεnfɔole anlo ye lεpɔɔ diekye aakye okpoo nɔɔ fanfa aawa ale ɔɔbanu ɔka Salomo ninumbe asaa otuo. Kafɔɔ kɔtɔkɔ ye nle otii wɔ ninlenke ni Salomo nkpe ninfū. ³² Niniwe batii mataka manyila di lεkankoyi nwu kame mankanko ye manlo ye lεpɔɔ. Diekye di obe wɔ di Yona latɔkɔ ma ni Yaa ɔlaa, baakyisa nkpa, baadie sikpile lema ɔbla. Kafɔɔ nwaako kɔtɔkɔ ye nle, otii onwii nsi ye kaame ninfū alenke ni Yona!

Yesu Ladiki Asaa Ya Ninta Ni Otii Lekpa Aatu.

³³ “Otii kuonwii ninsə kandie ayə akookaa ee ayə lesaa atii nwɔ. Kafɔɔ an-yɔ antika lesaa suoto, lεεba le dibakpa ninta ni batii ba nikobuo ni leyo. ³⁴ Anu lefɔ nte fe kandie dieta suoto lefɔ simuu. Nse anu lefɔ nle, ni afɔ otii omuu fankpa, kafɔɔ nse anu lefɔ diele, afɔ otii omuu fansie di ditunu kame. ³⁵ Nkpo oso lolaa fanyu fale lekpa le ninsi fɔ ni kaamɛ dilaakple ditunu. ³⁶ Nse lekpa leyii fɔ kame, di leba lefɔ kuninwii diesi di ditunu kame, ni afɔ otii omuu fabakpa fante klekle, fe mmle di kandie nkpa ankpete ni di lesaa suoto ninkpa nii.”

Yesu Lalo Farisi Batii Ku Kufiofa Batuote Lepɔɔ.

³⁷ Di obe wɔ di Yesu laloo ni lekakate, Farisi otii onwii lalɛɛ nwɔ ale awa abaleko nwɔ alesaa leeyo. Nioso aakyɛ ale ɔɔlaaleko nwɔ alesaa. ³⁸ Diabla Farisi otii nwu ɔkpɛ obe wɔ aanya ale Yesu ditafoto kɔnɛɛ, di amanle lɛma kanya fiɛ aakyako ni alesaa ole.

³⁹ Nkpo oso Saate nwu latɔkɔ nwɔ ale, “Aye Farisi batii, minfoto sǐpǔ ku abesibii lee kayi, kafɔɔ kame lee leyii pɔ ku kayu kue asaakuu obla. ⁴⁰ Biébe anu! Diele Yaa wɔ niɛbla ni assaa nwu amuu kayi niɛbla kame kafɔɔ? ⁴¹ Biyɔ lesaa biala ninsi di abesibii ku nkɔkɔs lee kame bita bapiite, ni lesaa lee biala makpa di afiofa lee kanya.

⁴² “Biyɔɔsa, aye Farisi batii! Diekye min-yɔ alesaa lee lefosi le ku kɔba lee kame sefa se nimpe ni ɔkɔnɔ nwaa ate ate minta Yaa. Kafɔɔ biesi lεbe ɔta di osuku kanya ku Yaa

ləbəmbəo. Nle mmle dikpe ni biɛbla biɛkyakaā di n-ya biɔbla ni kofokofoko nε, dinaa ale bieder kuninwii biɛtε.

⁴³ “Biyɔɔsa, aye Farisi batii! Diekye mimbəmbəo nsiekɔ kple osiε di nsiisakɔ lee, mimmie kafɔɔ bile batɔɔsεesa ye ku dibu di akpaka.

⁴⁴ “Biyɔɔsa, diekye bite fe sekya se mənɔɔnya nii, baatii nkyε sī ni di suoto, ta mananye ni oso.”

⁴⁵ Ninfε di kufiofa batuote onwii ləma latɔkɔ Yesu ale, “Saatuote, nse foobue nkpo, ni footufa awo kafɔɔ nε.”

⁴⁶ Ninfε di Yesu ladiki kanya aatɔkɔ nwɔ ale, “Biyɔɔsa aye basaatuote kafɔɔ. Atoo ya baatii dilabafuo ni otuka, nnya minkpee min-yɔ mintukasa ma nε. Minsunko ma nnεε kafɔɔ bile biɔkyakaako ma mantuka atoo nwu nkpo.

⁴⁷ “Biyɔɔsa, diekye mimbla sekya biene minta Yaa ɔlaa babuetete. Kafɔɔ Yaa ɔlaa bauetete ba mmle bawa lee nialo ma. ⁴⁸ Aye bamu bitoofū biekpee bile, bieetuna di lesaa le baawa lee labla nii. Diekye baalo Yaa ɔlaa babuetete nwu. Ni di ayee bielolaa sekya ləma nwu nε. ⁴⁹ Nle mmle oso di Yaa ninumbe labue ale, ‘Makyesee Yaa ɔlaa babuetete ku batɔkyente kaame ləma, kafɔɔ babalo bawo, mantikanko bayentele.’ ⁵⁰ Nkpo oso Yaa mananfi mie akyenfɔɔle bamuu laatoko di Yaa ɔlaa babuetete ba bamuu batoolo ni diεyɔ ni di kayi ka mmle kasɔ kakyeckɔ. ⁵¹ Diayɔ ni di obe wɔ baalo Abel dielase ni di Sakaria wɔ baalo ni di oleɔta akyikye ku kakleklekɔ obo. Nwaako kɔtɔkɔ ye nε, Yaa mananfi mie akyenfɔɔle laatoko, ta ɔsaabla wɔ mmle fεε oso.

⁵² “Biycɔsa, aye kufiofa batuotε! Diekye leyo le kame ninumbe nte nii, biesee kayoko noɔ biediki saaffii. Diekye aye bamu biesi биле biloobuo nii, biotii batii ba kafɔɔ nikomie ale babuo ni osuku.”

⁵³ Obe wɔ di Yesu ladie ni ninfa, Farisi batii ku kufiofa batuotε lakyako Yesu suoto ɔlaa obue ku ɔbɔɔ, Baakaale nwɔ selaa kpинwu di asaa ate ate suoto. ⁵⁴ Diekye baatoomie osuku wɔ suoto baafe mantika nwɔ ni ɔlaa di suoto ale εεbla ni okpile.

12

*Yesu Lasī ɔlaa Aata Batii Ba Ninnu Ni Batii
Di Anu Mambla Ni Asaa.*

¹ Obe wɔ baatii nkpe bawo labasi ni dikudi, baakyako ni bia bawo ɔnanafū, Yesu lakte kaso aatɔɔtɔkɔ basaateketete noɔ ale, “Bilolaa binyu di Farisi batii mmɔle nyankale le suoto, dile ni selaa kuafunu ɔsaabla lεma.

² Lεsaa lele baatii lebla beekookaa, dibadie kayi klekle. Ee owofalaan kuonwii nnaa ale blɔbanu ni diidii. ³ Nkpo oso ɔlaa lele biebue diitunu kame, kubadie kayi kakū kpanamantāa. ɔlaa lele kafɔɔ biebue sεewεewεε leeyo kame, kubadie kayi manyie nwu lεkya lεkpaka.

Biyeke Yaa, Diele Otii.

⁴ “Basiεwo, kɔtɔkɔ ye nle, bitanyεke batii ba ninlo ni suoto sina, ninni kamaa, lεsalesaa nsinnaa ma babakple manfuo ni ɔbla. ⁵ Kamatuo ye otii wɔ biayεke nii, biyeke Yaa wɔ nse atoolo eeloo, eekple akpe ni osie an-yɔ anfuki ankpee ni di ɔtɔ wɔ nikofie ni kunaa ni kaloo kame. Nwaako kɔtɔ ye nle, nnwɔɔ ninle otii wɔ biayεke ni ne. ⁶ Diele mple nnyɔ pε man-ya kutiitii

kɔnɔcɔ? Kafɔɔ Yaa ninyee kukanwii. ⁷ Bia disi lee sinwini yi, Yaa n-ye sī lɛrpɔɔ. Nkpo oso yi, bitanyɛke. Diekye biefū kɔya bilenke kutfitii.

Biyila Yesu Kamaa Fe Kafaabi Nɔɔ.

⁸ “Nwaako kɔtɔkɔ ye nle, otii lele nimadiki ambue baatii anu ale ole mi ale ami, Otii Obi nwu, kafɔɔ madiki mbue di Yaa batɔkyente anu nle ole mi ale. ⁹ Kafɔɔ otii wɔ nimasī mi ni di batii anu, ami, Otii Obi, kafɔɔ mansī nwɔ di Yaa batɔkyente anu. ¹⁰ Otii lele nimabue ɔlaa kpile owo anyila di Otii Obi nwu suoto, Yaa mayɔ ankyɛ nwɔ. Kafɔɔ otii wɔ nimabue ni ɔlaa kpile die Ninwuna Klekle suoto, Yaa dilabayɔ akyɛ nwɔcɔ.

¹¹ “Nse bɛεkpaa ye bɛεkyɛnko Yuda batii nsisakɔ ee banɔɔfo ku baka anu ale bɔɔkanko ye yi, bitambu diisi di ɔlaa wɔ bibabue mindiki ni suoto kanya. ¹² Diekye Yaa Ninwuna Klekle nimatuo ye ɔlaa wɔ biabue ni di obe nwu nkpo kamɛ.”

Yesu Lape Lekpa Di Saawente Buute Onwii Suoto.

¹³ Osuɔtɔ onwii lasiɛ baatii dikudi nwu kamɛ, ni aatɔkɔ Yesu ale, “Saatuotɛ, tɔkɔ obiloo aasɛ atesaa ya di teewo ledie eetɛ ni aateɛ ale mi.”

¹⁴ Ninfɛ di Yesu ladiki kanya ale, “Osuɔtɔ, owe niɛtɛɛ osuku kakanko ee kase atesaa lee nta batii lee banyɔ?” ¹⁵ Ninfɛ aatɔkɔ bamuu lema ale, “Bilolaa binyu, di onumbɛbɛɛ lele suoto, diekye otii nkpa nwaa diesi di lɛsaawɛ le ninkpe nwɔ ni lɛrpɔɔ kanya.”

¹⁶ Ninfɛ di Yesu lapɛ ma lekpa le mmle ale, “Fekpɛntɛ saawente onwii lawɛ, kaasɔ nɔɔ lalɛ

ni alesaa osie kanya. ¹⁷ Nioso aabu diisi aabue ale, 'Le mabla? Diekye nnaa leba le mayo alesaa ya mmle nte nii.

¹⁸ "Ninfe aabue aatoko suoto ale, lesaa le kamabla ni ninle ale, kama bie alesaa kateko kofole nwu. Nintofo lefole le niemue dilenke nii. Nfa mate alesaa ya lewe ni ku asaa bamba ne. ¹⁹ Ni kamatoko suoto nle, disi nle fo! Fakpe asaa biene ya mmle amuu alees kpinwu. Nioso te onyeεε, faale, faanyi, faale nkpa."

²⁰ "Kafco Yaa latoko nwco ale, 'Afо buute! Mis kakye ka mmle babafu fo nkpa ninnεε. Ni owe nfe nimale asaa ya mmle fesiisa feεεta feεεta ni suoto?" "

²¹ Ninfe di Yesu layente ale, "Nkpo dibate ninta batii ba niesiisa asaa beεεta ni suoto kaaso ka mmle suoto ne, kafco banaa ni lesalesaa di Yaa anu ne."

Yaa Nyu Babi Nco.

²² Ninfe di Yesu latoko basaateketete nco ale, "Nkpo oso koko ye nle, bitankpe sikitii di nle biale minsie ni nkpa suoto ee nle biakpee ee minklee ni suoto. ²³ Nkpa lefu koya dilenke alesaa, nkpo kafco di suoto lefu koya silenke akleesaa ne. ²⁴ Binyu bakwakwalobi. Mankpe kofe, manfiel kafco. Banaa alesaa kateko ee siwu, kafco Yaa nta ma alesaa! Aye yi, biefu koya bilenke bakansie fanfanfa! ²⁵ Owe nimafuo dii ninwii eyo okyakaa ninkpa nco suoto, nse eebu nkpa nco disi osie kanya? ²⁶ Ni, di obe wo minoofuo ni asaa pitipiti obla, be oso biodiki suoto ninwuna di asaa bamba suoto?

27 "Binyu mmle okle di atoto leepoo kamε mmuɔ anlε ni onyu. Ántaa oleteku ee aloso awu ata suoto. Kafɔɔ kɔtɔkɔ ye nle ɔka Salomo omu, di lesaawε nɔɔ nimuu kamε, atakpee awu ale onyu awo lepoo kamε atoto kpeele ya mmle kaame lεma onwii. **28** Ni nse Yaa lekpee sεfa se mmle okle ninkpe ni nkpa sekpee miε, kɔɔsεε babayo mankpee ni di ɔtɔ kamε sinfiε nii. Ni Yaa nwu nkpo dilaanyuma ye ata ye akleesaa lee alenkee sεfa nwu nkpo? Ofū onu lee dieρo. **29** Nkpo oso bitankpe sikitii di nle bibale ku nle bibanyi ni suoto. Bitambu kafɔɔ disi sikitii. **30** Diekye n-ya mmle di kayi batii bamuu ntikanko obe lele nε. Teeye n-ye ale assaa ya mmle amuu lefī ye. **31** Kafɔɔ, biwolaa Yaa sekə kalekɔ, ni abayo asaa ya mmle amuu anta ye.

Bitika Anu Di Yaa Kafa Lesaawε Suoto.

32 "Bafoso nii dikudi biibii, bitanyekε! Diekye dile Teeye ale ɔɔyɔ sekə kalekɔ nɔɔ anta ye. **33** Biyɔ suoto lee asaa bisunsū, bieyɔ koto nwu bita bapiite. Biemie kotontofo ko ninamalala ni bita suoto, biekookaa lesaawε lee di Yaa kafa ninfū abate anta ye ni. Diekye yu kuonwii dilabafuo ɔkyε ɔlaayo, bakunsū kafɔɔ dilabafuo ɔkyε ɔlawee. **34** Diekye nfū di lesaawε lefɔ nte nii, nfa kafɔɔ di otu lefɔ nwe nε.

Yesu Latɔkɔ Basaateketete Nɔɔ Ale Basie Batonyu Osuku.

35 "Bilolaa suoto bita lesaa lele nimawa, bieta bakandie lee batɔɔkpa. **36** Bite fε batii ba nikonyu osuku manta ni saate lεma ale, abakyε ɔsanko kayɔkɔ anwa ni. Nse εεwa εbapε kokoloo

kōnεε, nfanwu, baasεkεtε nwɔ. ³⁷ Suoto maycɔ bakpεmblatε ba di saate lεma manya ma basi boonyu ni osuku nse eekple εεwa! Kötökɔ ye nle, abadiki awu ante ampe letapo d ičtɔ, antɔkɔ ma ale basiε kaasɔ, nnwɔcɔ omu nɔc anse ma opunu anta ma alesaa manle. ³⁸ Nse nkyεntεε ee kolesetū di saate nwu lεwa, εεbatū ma basi boonyu osuku, suoto mate sinyɔcɔ ma lo! ³⁹ Biye biliε nse leyo saate matofo obe wɔ kamε di yu mawa amayu nwɔ nii, see atabatɔcɔ osuku abiε nwɔ leyo abuo. ⁴⁰ Nkpo oso ayee bisiε bitoonyu osuku, diekye ami, Otii Obi nwu, mawa di obe wɔ minoonyu osuku biteε nii.”

*Dikpe Nii Kpεmblatε Nle Otii Wɔ Ninnu Ni
Olaa.*

⁴¹ Ninfε di Petro lakaalε Yesu ale, “Saate, lεkpa le mmle lete loo falaka εε, sεε ku batii bamuu falaka?”

⁴² Ninfε di Yesu ladiki kanya ale, “Kpεmblatε wɔ nimbla ni lesaa di osuku kanya, nnwɔcɔ di saate nɔc n-yɔ anse di bakpεmblatε bule kanya ne. Nnwɔcɔ nimata bakpεmblatε bule alesaa fe mmle diesieko ni di obe biene kamε. ⁴³ Babakusekusesa kpεmblatε nwu nkpo nse saate nɔc lεwa εba nyɔc ɔbla ɔkpε wɔ eekpee nwɔ ni ninnεε! ⁴⁴ Nwaako kötökɔ ye nle, saate nwu nkpo maycɔ kpεmblatε nwu anse di asaa nɔc amuu kanya.

⁴⁵ “Kafɔcɔ nse kpεmblatε nwu nkpo lebuε ale, ‘Saate nii maklε di osuku nwu fiε abawa.’ Nkpo oso εεkyako bakpεmblatε bule ɔpε dile ni basanko ku basučtɔ, εεkyako suoto lεyɔcɔ ɔnyu, anle, anwee, annyi nta ansiε, ⁴⁶ saate nɔc nwu

mawa di dii le ku obe wɔ kamε onoonyu osuku atɔɔ nii. Saate nɔɔ nwu mananfi nwɔ kootoko osie kanya, antɔɔ kasiɛkɔ di batokopitε kame.

47 “Kpemblate wɔ ninye lesaa le di saate nɔɔ komie ale abla atɔɔ ni fiesi ni ɔbla, ta áalolaa suoto ale ɔɔbla ni oso, lere le mampe nwɔ ni mpcɔ. **48** Kafɔɔ kpemblate wɔ ninanye lesaa le di saate nɔɔ komie ale abla nii, kafɔɔ εεbla lesaa le baananfi nwɔ ni kootoko, letokonanfi nɔɔ kεεkεε ninle. Otii wɔ bεeta ni asaa kpinwu, nkpo okle kafɔɔ mamie asaa kpinwu mankyeko ɔkye nɔɔ ne. Kafɔɔ otii wɔ beekple bεeta balenke nii, nkpo okle babafū manlenkeesa di ɔkye nɔɔ ne.

Batii Mase Suoto Ta Yesu Oso.

49 “Tɔ lewa okpee kaasɔ ka mmle suoto, komie kafɔɔ nle kuakεεsεε wla. **50** Yaa ntu okpeesa onwii nkpe babakpeesεε nii. Nioso ninwε onwu nwuna diɛlase di obe wɔ beekpeesεε mi nii. **51** Bienyu bilε atoko ɔkye ole lewako kayi ka mmle? Oowo! Diele atoko ɔkye ole, kafɔɔ kase. **52** Diεyɔ ni nua diesifi nii, batii banɔɔ leeyo ninwii kamε ntεε mase. Batii batie mataka manyila baanyɔ suoto, banyɔ bule kafɔɔ mataka manyila baatiε suoto. **53** Obi ote mataka anyila di obi suɔtɔbi suoto, obi suɔtɔbi kafɔɔ mataka anyila di ote suoto. Obi ɔya mataka anyila di obi sankobi suoto, obi sankobi kafɔɔ mataka anyila di ɔya suoto. ɔmaato mataka anyila di obisɔfɔ suoto, obisɔfɔ kafɔɔ mataka anyila di ɔmaato suoto.”

*Yesu Lakakate Aata Batii Mmle Baatofo Ni Obe
Wɔ Kamε Basi Nii.*

⁵⁴ Yesu latoko batii nwu nkpo kafco ale, "Nse biensa alokonkye di kufi kameekoo, bile kanto mancoo. Ninwa kafco kanya. ⁵⁵ Nse biensa kofeeefco kofe kunkye kala kasoo, mimbuue bile difila nfe kowa. Ninwa kafco kaanya. ⁵⁶ Aye balaate! Minfuo osi ku kasoo onyu mintofo lessaa le nimawa ni mimbuue, ni be oso minoonu obe wo mmle kasoo?

*Yesu Latuo Mmle Okle Baatii Kalolaa Ni Bawo
Nteε.*

⁵⁷ "Be oso minaabuo seela kame bitofo lessaa biene le dikpe ni biebla ni? ⁵⁸ Nse otii owo leleefco leka di bakante nfu, fe di osuku biala suoto bilolaa olaa nwu bita baawo fie bielaadu kakankoo. Nse diele nkpo, abayoo fo ankpee di kante nnese, kante nwu n-yoo fo ankpee di bamufute nnese mantefco leeyo. ⁵⁹ Koto fo fantofo nle, nfa fcoowa obasie yielaase di obe wo fatoceta ni letokonanfi lefco koto yentele ne."

13

*Nse Biékyi Di Situ Kame, Biowa Obakpi Siikpile
Letembi Nwu Kame.*

¹ Di obe nwu nkpo kame, batii bawo lawe ninfa latoko Yesu mmle di Pilato lalo ni Galilea batii bawo di obe wo baatocta ole baatocta ni Yaa. ² Ninfu di Yesu lakaale ma ale, "Bienu bile mmle okle beelo ni Galilea batii ba mmle oso, mma ninle bakpileblate balenke Galilea batii bamuu bule? ³ Oowo, diele nkpo kute! Nioso kotoke ye nle, nse biékyi di sikpile lee obla kame, nkpo okle di aye kafco biowa obakpi ne. ⁴ Ni lefosi batii banu ba di Siloa leyo kple nwu labie

diapε, baakpi ni mɔ? Bienu bilε, nle mmle oso, mma ninle bakpileblate balenke batii ba bamuu ninkpe ni di Yerusalem? ⁵ Oowo, diele nkpo kute! Kɔtɔkɔ ye nle, nse biékyi di sikpile lee suoto, nkpo kafɔɔ di bamuu lee biɔwa ɔbakpi ne.”

Yesu Lape Lekpa Aakyeko Kolewoso Ko Ninootika Ni Abi Suoto.

⁶ Ninfe di Yesu lapε lekpa le mmle aatɔkɔ ma ale, “Obe onwii kamε, osuɔtɔ onwii lawε, aasɔ kolewoso kunwii di kofe nɔɔ kamε. Dii ninwii aakyε ale ɔɔlamie kowoso nwu nkpo dibi, kafɔɔ, atawε kuninwii. ⁷ Ninfe di osuɔtɔ nwu latɔkɔ kofe nɔɔ nyunte ale, ‘Nyu! Aleε atie amu nkyε ni nfū komie ni kowoso ko mmle dibi nle kɔtεsε, kafɔɔ ninwε kuninwii. Budi kū fayu! Diekye nɔɔnya lesaa le oso kuyε ni kaasɔ ka mmle suoto.’

⁸ “Kafɔɔ kofe nwu nkpo nyunte labue ale, ‘Saate, ta kukple kuyila leleε ninwii buonyu. Kamakutu kū kalɔ nkpete asaa ya nimata leba le kuyε ni n-yɔɔ ninsie lela munnyu. ⁹ Ni nse leleε lekyi kuofuo abi otika kpинwu, ni kule ne. Kafɔɔ nse kúofuo abi otika, ni faafuo kū obudi oyu nfε.’ ”

Yesu Layɔɔsa ɔsanko Onwii Ninkpaa Lakpi Ni Ofie Di Lenyeεteyi Suoto.

¹⁰ Di Lenyeεteyi ninwii suoto, Yesu latotuo asaa di Yuda batii kassiakɔ kanwii kamε. ¹¹ ɔsanko onwii lawε ninfa di ninwuna kpile ninwii latɔkpeko ni lefosi aleε anε amu. Ninwuna nwu nkpo lata ale, obe lele ɔsanko nwu nkpo lebo, ánfuo suoto oyilasa. ¹² Obe wɔ di Yesu lanyɔɔ nii, aaleε nwɔ, ni aatɔkɔ nwɔ ale, “ɔsanko,

ofie lefə nwu ntccyccfo!” ¹³ Ninfə di Yesu layɔ kɔnɛɛ aatika di ɔsanko nwu suoto ne. Nfanwu, ɔsanko wɔ mmle niataka aayila wlɔc, aakyako Yaa ḥtansa ne.

¹⁴ Yuda batii kasiisakɔ nwu nkpo ɔnɔɔfo lanya ɔblɔ osie kanya di mmle di Yesu layɔɔsa ni ofie di Lənyeɛteyi nwu oso. Nkpo oso aatɔkɔ batii nwu nkpo ale, “Ayi akwɔ ninkpe wo mumbla ni sɛkpɛ. Nkpo oso biwa di ayi nwu nkpo kame baayɔɔsa ye sifie, diele di Lənyeɛteyi suoto!”

¹⁵ Ninfə di Saate ladiki kanya aatɔkɔ nwɔ ale, “Aye balaate! Mindiki banankyüe ku bapɔnkɔ lee di sikū minkpama minkyenku ntu kanyinkɔ di Lənyeɛteyi suoto. ¹⁶ Binyu ɔsanko wɔ mmle ninle ni Abraham ɔnanti di Satana lenii ni lefosi aleɛ aŋɛ amu. Diele ale baafukuti nwɔ di Lənyeɛteyi suoto?”

¹⁷ Yesu sela se aabue ni lata sinunsɔ lakpɛ balo noɔ. Kafɔɔ batii bule lanya suoto leyɔɔ di sɛkpɛ kple se simuu aabla ni oso.

Yesu Layɔ Yaa Seka Kalekɔ Aakaateesa Di Lewosobi Biibii Ninwii.

¹⁸ Yesu lakaale ma ale, “Be lesaa di Yaa kafa nwu nkpo ledie? ¹⁹ Ote dite fe, otii niɛyɔ lewosobi biibii ninwii eɛpɛ di kofe noɔ. Diakɔntɔ nii, diamuɔ, diebakple kowoso dibinte kunwii di bakansie lebla ni ayo lema di sela noɔ suoto.”

Yesu Layɔ Yaa Kafa Aakaateesa Di Lənyankasaa Suoto.

²⁰ Yesu lakple aakaale ale, “Be lesaa suoto mayo Yaa sekə kalekɔ nwu nkaatesa? ²¹ Ote dite fe ɔsanko onwii niɛyɔ lənyakasaa eekpee di bloblo

nnaafū kotofo kunwii bεεnwətō ni kame dielase di obe wō di nnafū nwu bεεnwətō ni lətaka nii.”

Yesu Labue Ale Nkpa Kayoko Nte Biibii.

²² Yesu lafe di sekpoor ku nkpayotū kame aatootuo batii asaa di obe wō aatoofe ni Yerusalem. ²³ Nfanwu otii onwii lakaale nwō ale, “Teete, batii ba nimawε ni didiki, baseε babale εε, sεε le?”

²⁴ “Kpee okyiini faafe di kayoko biibii nwu kame fabuo. Diekye batii kpinwu mamiε ale boobuo osie kanya, kafōo bōlōbaafuo obuo. ²⁵ Diekye obe kōwa di leyo saate maseε ni kayoko nwu nkpo. Bibaka kaayi minkyako kokloo kōnεε ɔpe mimbuε bile, ‘Teete, sekεtε wo!’

“Kafōo abatōkō ye ale, ‘Ninye ye nfū biekye nii!’

²⁶ “Nfa nfε bibakyako obue bile, ‘Awo ku afō niale, buanyi, faatuo wo kafōo asaa di okpoo loo le!’

²⁷ “Kafōo abakple antōkō ye ale, ‘Ninye ye nfū biekye nii! Bikyε mi di ɔlōkō bisifi, aye bakpileblate!’

²⁸ “Nfa nfε bibawi nku, minwee anyεε, di obe wō bibanya Abraham ku Isak ku Yakob ku Yaa ɔlaa babuetētē bamuu nsi ni di Yaa kafa. Kafōo aye, babafuki ye man-yu kaayi ale bitambuo. ²⁹ Batii makye kufī katunkō ku kamεekō manwa. Bawo nkye katoo ku kala kasō manwa mamasi di opunu katū di Yaa kafa, manle, manyi. ³⁰ Nioso batii ba ninle ni bayεntεle, mawa mamale bakasale. Mba kafōo ninle ni bakasale mawa mamale bayεntεle.”

Yesu Lawε Lebɔmbɔ Aata Yerusalem.

³¹ Di obe nwu nkpo kame kafɔɔ, Farisi batii bawo lawa Yesu nfū babatɔkɔ nwɔ ale, “Pɛsewa fadie ninfū fasifi kakɔ̄ bamba, diekye ɔka Herode komie ale alo fo.”

³² Ninfe di Yesu latɔkɔ ma ale, “Bikyɛ biɛlatɔkɔ ahia nwu nkpo bile, ‘Mie, matososa anwuna kpile, kɔsɛɛ nnyɔɔsa bafietɛ sifiɛ. Di dii tiefa suoto, maloo ɔkpɛ nii.’ ³³ Kafɔɔ dikpe nii lekye osuku mie ku kɔsɛɛ ku sakale. Diekye diekaatɛ ale baalo Yaa ɔlaa buetɛtɛ di leba bamba kuninwii ninanle ni Yerusalem okpoo kame.

³⁴ “O Yerusalem, Yerusalem, afɔ nialo Yaa ɔlaa babuetete, faasafɔ batii ba kafɔɔ di Yaa lakpeefɔ ni ɔkyɛ aafuɔ faalo! Obe kpinwu ntoomie nle kosiisa babi lefɔ di afoko nii kalo fe mmle okle di kɔɔkɔɔbiɔya nkpaab abi ankpee ni di afoko nɔɔ kalɔ, kafɔɔ flooru kasɔ. ³⁵ Ta nle mmle oso, Yaa madiki okpoo wɔ mmle atoko manwɔɔsa nwu. Nwaako kɔtɔkɔ ye nle, biloosinwa mi ɔbanya diediki dielaase di obe wɔ biebuɛ bile, ‘Yaa lekusekusessa otii wɔ nikɔwa ni di Saate leyooto kame!’ ”

14

Yesu Lakple Aayɔɔsa Osuɔtɔ Onwii Ofie Di Lenyeεεtεyi Suoto.

¹ Di Lenyeεεtεyi ninwii suoto, Yesu lakyɛ Farisi batii ɔnɔɔfo onwii leyo ninfū baaleɛ nwɔ ale abale ni alesaa. Batii lawɛ ninfa baatɔɔtɛtɛɛ nwɔ osie kanya. ² Osuɔtɔ onwii di nnɛɛ ku nkpaab lafufu ni lawa Yesu nfū. ³ Ninfe di Yesu lakaale kufiofa batuote ku Farisi batii ale, “Kufiofa loo lɛta wo osuku ale buayɔɔsa otii ofie di Lenyeεεtεyi

suoto εε, σες κυρτα ων οσυκο;” ⁴ Καφόο батафуо kanya əbe obue əlaa kuonwii. Ninfé di Yesu lamufū osueto nwu nkpo aayessa nwɔ ofie, ni aatoč aasifi ne.

⁵ Ninfé aakaale ma ale, “Nse onwii lee obi ee bəkees nɔc ləkpa eebuo di dibio kamə di Lənyeeteyi suoto, biləbadiki nwɔ dii nwu nkpo?”

⁶ Kafōo батафуо nwɔ əlaa nwu kanya odiki.

Yesu Labue Mmle Baawakosa Ni Suoto Kasɔ Ku Mmle Baafū Ni Bafōo.

⁷ Obe wɔ di Yesu lanya mmle di batii ba baakyakako ni latoodiki ni nsiekɔ kple, ninfé aapε ma ləkpa ninwii ale, ⁸ “Nse otii owo ləkyakako fɔ εewako ɔsankɔ nɔc kayɔkɔ yi, tansie di kasiɛkɔ kple. Diekye dibafuo ɔwa ale bεekyakako otii wɔ niɛtaka katoo alenke fɔ ni ninfa. ⁹ Ni otii wɔ niɛkyakako ni batii lee banyɔ mawa amatɔkɔ fɔ ale, ‘Taka faata otii wɔ mmle abasis ninfa.’ Nioso fabataka fanaasis di ləba yentele ku sinunso. ¹⁰ Nkpo oso nse bεekyakako fɔ bεewako ləba yi, kye faalaasis di kasiɛkɔ yentele. Nse otii wɔ niɛkyakako fɔ ni lewa yi, ni abatɔkɔ fɔ ale, ‘Siewo nii, taka ninfa, fabasis di kasiɛkɔ kple’ Nle mmle matakatesa fɔ katoo di batii ba bamuu bεekyakako bεewako ni ninfa anu. ¹¹ Diekye otii lele niɛtakatesa suoto katoo, Yaa mawakosa nwɔ kasɔ. Otii lele kafōo niɛwakosa suoto kasɔ, Yaa matakatesa nwɔ katoo.”

¹² Ninfé di Yesu latɔkɔ otii wɔ niakyakako nwɔ ale abale ni alesaa ale, “Nse fɔɔkyakako batii falε bawa babale alesaa yi, tanlε basiεwo ee babilée ee banantii lefɔ ee basaawente wo lefɔ lete. Ta

mmle di mma kaf   baale   f   ale wa fabaleko ma ni oso. Ni se dite nkpo, ni tofo fale lesaa le f  ebla feeta ni koto nfe b  ota manta f   ne. ¹³ Kaf   nse foole dii le mmle okle yi, faale   bapiite, ku batii ba ninoofuo ni   kye nwaa, ku abafa ku banumbiet  . ¹⁴ Nle mmle mata ale Yaa mawii f   l  y  o. Diekye batii ba mmle okle dil  bafuo f   lesalesaa   bla ota. Yaa nimata f   koto di dii le baatii biene makple mantaka mankye ni bakpi kam  .”

Yesu Lape Lekpa Di Yaa Kafa Opunu Kple Suoto.

¹⁵ Obe w   baatii ba niasi   ni di opunu kat   onwii l  ema lanu ni selaa se mmle, aat  k   Yesu ale, “Suoto mate siny  o batii ba nimale ni alesaa di Yaa kafa nwu nkpo osie kanya.”

¹⁶ Ninf   di Yesu lat  k   nw   ale, “Di obe onwii kame, osu  t   onwii lat   opunu kple, ni aakyakako batii kpinwu aawako alesaa nwu kalek   ne. ¹⁷ Obe w   di alesaa nwu olebee ntoowo nii, aakpee bat  kyent   no   ale balaat  k   batii ba aakyakako ni ale bawa. Diekye lesaa biala ntoosi!

¹⁸ “Kaf   bamuu l  ema baakyako osuku   kaale onwii onwii. Otii kasale lat  k   t  kyent   nwu ale, ‘L  ya kas   kanwii, nioso k  kye nnaanyu ka.’ Nkpo oso laat  k   nw   fal  , ‘Lekoto, namafuo   wa.’

¹⁹ “Obamba kaf   ale, ‘L  ya banankyuue bany   bany   akyuu an  o. Osuku nfe n-y   kaf   kofe ma   so onyu nse bale ne. Nle mmle oso, laat  k   nw   fal  , ‘Lekoto, namafuo   wa.’ ’

²⁰ “Obamba kaf   ale, ‘Nunua w   mmle nt  c  y     sanko ne, nkposo namafuo   wa.’ ”

21 “Tɔkyɛntɛ nwu nkpo lakple aakyɛ aalaatɔkɔ saate nɔɔ selaa se mmle simuu. Saate nɔɔ nwu lanya ɔblɔ̄ osie kanya ni aatɔkɔ tɔkyɛntɛ nɔɔ ale, ‘Pɛsewa fatɔɔkyɛ okpoo sisuku ku akpaka faalaaleɛ bapiite ku batii ba ninoofuo ni ɔkyɛ nwaa ku banumbiɛte ku abafa fawako.’

22 “Ditaklɛ tɔkyɛntɛ nwu nkpo lakyɛ aakple aabatɔkɔ saate nɔɔ ale ntɔlaabla nkpo, kafɔɔ kasiɛkɔ lekple keebu. **23** Nkpo oso saate nwu latɔkɔ tɔkyɛntɛ nwu ale, ‘Tɔɔkyɛ sekpoo kplɛ sisuku ku sibiibii suoto faakpee batii bamuu osie faakpaa ma fawako ale leyo nii kamɛ kayii. **24** Kɔtɔkɔ ye ntikiti nle batii ba bamuu leleɛ ni fie beesĩ ni ɔwa, kuonwii lɛma dilabatu alesaa nii ya mmle anyu! ’ ”

Fabawe Dibuo Nse Fale Yesu Saateketete.

25 Di obe onwii kamɛ baatii dikudi ninwii ku Yesu latɔɔkyɛ nii, ni aamunukii aatɔkɔ ma le, **26** “Otii lele niɛwa ɔkyɛ nii, anambɔombɔ mi alenkee ote ku ɔya, ɔsɔfɔ nɔɔ ku babi, babilema sankobi ku basuɔtɔbi ku nnwɔɔ omu nɔɔ suoto yi, ɔlobafuo mi saateketete ole. **27** Otii lele ninan-yɔ atoo nɔɔ atuka atikankoe di nkpaamaa, ɔlobafuo mi saateketete ole.

28 “Nse otii lee owo komiɛ ale atofo leyo kplɛ lewo, lekasale ansie kaasɔ ambu asaa ya nimafii ni leeyo nwu otofo kamɛ. Ambu koto ko ninte nwɔɔ nii, nse kubawo antofo fie ankye kasɔ. **29** Nse aabla nkpo, fie εɛlaase lɛsɔse, ɔlobafuo leyo nwu otofo oloo. Batii ba bamuu nimanya ni leyo nwu siyiɛkuu mananloo ni otofo makyako leyo tofote nwu ɔma ale, **30** ‘Otii wɔ mmle lekye leyo kasɔ, kafɔɔ aaloo otofo.’

³¹ “Nse ɔka owo nkle bakpεtε nkpe lefosi oofo ɔka wo nɔɔ wɔ ninkle ni bakpεtε nkpe afosi anyɔ ɔkpε ko, abasie ambu diisi nse osie wɔ ninkpe nwɔ ni, abafuo ɔka nwu ɔkpε ko. ³² Ni nse εεnya ale ɔlɔbafuo ɔkɔ nwu osie oyilako, abakyese batii, manaakyakako ɔka nwu nkpo, di obe wɔ anayiteetεε ma nii, mantikiti nwɔ lekoto, mankaale onwii ɔbla.” ³³ Nfa nfe di Yesu layεntε ɔlaa nɔɔ obue ɔtɔkɔ ma ale, “Nkpo okle di aye kafɔɔ bilaafuo mi basaateketetε ole, diediki biedie lesaa biala biεtε ne.

Mba Be Ninnaa Ni ɔmεnεfε, Man-yɔ Mi Man-wii.

³⁴ “Mba nle. Kafɔɔ nse ditoooyu ɔmεnεfε ni mi, lesalesa nsinnaa baakple man-yɔ mankpee mi ni ɔmεnεfε. ³⁵ Diesinle dita bia kasɔ, ee bia lefleku, owii nfe man-yɔ manwii.

“Nkpo oso aye ba kuunutoko nkpe nii binu!”

15

Baanya Lefosobi Le Niayu Nii.

¹ Dii ninwii akpooto bafunte ku bakpileblate lawa Yesu nfū babanu nwɔ ɔlaa. ² Ninfa, Farisi batii ku kufiofa batuotε lakyε kasɔ baatɔɔkakatε nwɔ di suoto ale, “Osuɔtɔ wɔ mmle lefū bakpileblate, anle bia alesaa ku mma!”

³ Nkpo oso Yesu lape ma lεkpa ale, ⁴ “Nse diεwa ale onwii lee nkpe bafoso kɔlafa, di onwii leyu kaame, ɔlɔbadie bafoso afosi anaasī banaasī nwu nkpo di alesaa kalekɔ alaawolaa onwii wɔ nieyu ni, dielaase di obe wɔ εεnycɔ ni? ⁵ Ni nse εεnycɔ, suoto dilabayɔɔ nwɔ osie kanya akεnke

nwɔ atika di nimuusi. ⁶ Akpaa nwɔ awako leyo. Abalɛɛ basiɛwo nɔɔ ku leyo nɔɔ batii ansiisa antɔkɔ ma ale, ‘Suoto kɔtɛ sinyɔɔ mi osie kanya, diekye ntɔɔnya foso nii nwu niayu nii. Biwa biɛbanyakoe suoto leyɔɔ!’ ⁷ Nioso kɔtɔkɔ ye nle nkpo kafɔɔ di suoto leyɔɔ kple mawɛ di Yaa kafa, nse kpileblate onwii lekyi, ninlenkee babienetɛ afosi anaasĩ batii banaasĩ ba kaakyi diefĩ ni ne.

Baanya Koto Fututu Ko Niayu Nii

⁸ “Ee nse koto fututu lefosi nkpe ɔsanko owo, eeyu kunwii, le ambla? Ansɔ kandiɛ anse, anfiɛ leyo nɔɔ kamɛ anwolaa kũ nwaa ninaase di obe wɔ εεnuya kũ nii. ⁹ Nse εεnuya kũ, anlɛɛ bawo nɔɔ ku leyo nɔɔ batii ansiisa, antɔkɔ ma ale, ‘Suoto kɔtɛ sinyɔɔ mi osie kanya, diekye ntɔɔnya koto nii nwu niayu nii, bibanyakoe suoto leyɔɔ.’ ¹⁰ Nwaako kɔtɔkɔ ye nle, nkpo okle kafɔɔ di Yaa batɔkyɛntɛ nnyia suoto leyɔɔ di kpileblate onwii wɔ niekyi ni suoto ne.”

Obi Wɔ Niayu Ni Lakple Aawa Ote Nfū.

¹¹ Yesu lakple abue akyakaa ale, “Osuɔtɔ onwii lawɛ, aawa babi suɔtɔbi banyɔ banwii. ¹² Ninfe di obisɔnle latɔkɔ ote ale, ‘Teete, yo kalekɔ nii ka fabateɛ ni di asaa lefɔ kamɛ fateɛ ninua.’ Nkpo oso osuɔtɔ nwu nkpo layɔ asaa nɔɔ aase aata babi nwu nkpo banyɔ.

¹³ “Di ayi awo kamaa, obisɔnle nwu nkpo layɔ asaa nɔɔ nwu amuu aasunsū aafū koto aadie leeyo, aasifi kale bamba fanfanfa. Aalaasiɛ nkpa lelaale, aalalaasa koto nɔɔ nwu kumuū. ¹⁴ Obe wɔ aale koto nɔɔ nwu kumuū kualoo nii, ditaklɛ, kɔka kple kunwii labakpɛ kaasɔ nwu

nkpo suoto. Aabakple piitε, nle aale ni lawε nwɔ osie. ¹⁵ Nioso aayɔ suoto aalaakpee awoba di osuɔtɔ onwii nfū di kasɔ nwu suoto. Ninfε di osuɔtɔ nwu lakpaa nwɔ aasifiko kakpayotū cɔn ale, alaatoonyu nwɔ aplakuo ne. ¹⁶ Kɔka oso, aamis ale se aatoole aplakuo nwu alesaa awo, kafɔɔ kuonwii ditatɔɔ osuku ale ale.

¹⁷ “Nioso, osuɔtɔbi nwu lababuo di suoto nɔɔ kamε aabue ale, ‘Batii ba di teemi lefū bɔɔbla sekpe mantɔɔ nii, alesaa diefī ma, boole mammie. Ni di mi nsi ninfū kɔka kolo mi ne! ¹⁸ Makple nsifi teemi nfū nnaatɔkɔ nwɔ nlɛ, “Teete, lεbla okpile leyila di Yaa ku afɔ suoto. ¹⁹ Ninsinsiɛko ale faalee mi ale obi lεfɔ. Kafɔɔ yɔ mi fabla fele bakpemblate lεfɔ onwii lεma feefū ni.” ’ ²⁰ Nfanwu ni aataka aayɔ asaa aayefe osuku aatoofe ote nfū ne.

“Obe wɔ akyε di osuku fanfa ɔɔwa nii, ni di ote lanyɔɔ ne. ɔlaa nɔɔ lakpe ote nyaami. Ni aatoso aakyε aalaaminiko nwɔ ku suoto lεyɔɔ ne.

²¹ “Ninfε di obi labue ale, ‘Teete, lεbla okpile leyila di Yaa ku afɔ suoto. Ninsinsiɛko ale faalee mi fale obi lεfɔ!’

²² “Kafɔɔ, ote latɔkɔ bakpemblate nɔɔ ale, ‘Bipɛsɛwa! Biɛyɔ awu biene anwii bibakpee nwɔ. Biɛyɔ lεkɔnii ku ntokota biene bibakpee nwɔ. ²³ Nle mmle kamaa, biɛkyε bilaamufū nankyue wɔ ninsi ni lεla bilo biɛwa alesaa, buɔnya suoto lεyɔɔ. ²⁴ Diekye obi nii wɔ mmle, buɔnyɛ fe aakpi. Kafɔɔ atookple εεsenke. Aayu, kafɔɔ butookple buɔnyaɔɔ.’ Nioso, baakyako suoto lεyɔɔ ɔnyɑ.

25 “Di obe nwu nkpo kamε, obi nɔɔfo lafe kofe. Obe wɔ atookye kofe ɔɔwa nfε ɔɔtεεtεε ni leyo, aanu sinu ku katū kanya osie kanya. **26** Nioso, aaleε kpεmplate onwii, ni aakaale nwɔ ale, ‘Be ninkpe leeyo?’ **27** Ninfε di kpεmplate nwu ladiki kanya aatɔkɔ nwɔ ale, ‘Obilee nintookple εεwa, ni di teefɔ lεta beelo nankyue wɔ ninsi ni lεla ne, diekye atookple εεwa buεε okpile kuonwii dietū nwɔ.’

28 “Nkpo oso obi nɔɔfole nwu lanya ɔblɔ osie kanya ale, oloosinkyε leyo. Ta nkpo oso, ote ladie aakyε ɔkyε nɔɔ aalaatikiti nwɔ lekoto ale awa baasifi leyo. **29** Kafɔɔ obi nwu lamunikii aakaalε ote ale, ‘Nyu lo! Ntɔɔbla okpe lεta fɔ aleε ya kpe fe ɔlanle. Diidii kafɔɔ ninsī fɔ ɔlaa onu. Obe fatɔɔbla feεtεε ami? Diidii bia tie, fayiteε fale nnyia suoto leyɔɔ ku bawo nii. **30** Kafɔɔ obi lεfɔ wɔ mmle nintɔɔlalaasa fɔ ni asaa ku basanko basɔɔnɔkpεete lekple εεwa nii, fatoolo nankyue wɔ ninsi ni lεla feεtɔɔ nnwɔɔc!’

31 “Ninfε di ote latɔkɔ nwɔ ale, ‘Obi nii, munkofɔ ninsi ninfū obe lele, lεsaa lele kafɔɔ ninkpe mi, lele fɔ dile. **32** Kafɔɔ, dikpe nii munya suoto leyɔɔ, mumpɔ. Diekye buɔyɔ bulε okpi di obilee lakpi, ni eekple εεsenke ne. Oyu aayu ni buokple buɔnyɔnɔc ne.’ ”

16

Asaa Nyunte Onwii Ditatɔɔbla Asaa Di Osuku Kanya.

1 Yesu latɔkɔ basaateketete nɔɔ ale, “Osuntɔ onwii lawε, aale saawente. Aawε kpεmplate onwii niatoonyu nwɔ ni asaa. Ni baabatɔkɔ

saawente nwu nkpo ale, asaa nyunte noo kole nwɔ kote. ² Nkpo oso saawente wɔ mmle lakee saanyunte nwu nkpo aatɔkɔ nwɔ ale, ‘Be lessaa ninle nle konu nkyeko ni suoto lefɔ nkpo? Babla nkuntaa di asaa nii ya amuu foonyu ni suoto fatee. Diekye flabasinfuo mi asaa nyunte ole.’

³ “Ninfe di kpemblate nwu latɔkɔ suoto ale, ‘Saate nii nfε madie mi di ɔkpε kamε. Le nfε mabla? Nnaa osie kafɔɔ makpε ni kofe. Asaa ɔkaale kafɔɔ nkpe mi sinunso. ⁴ Ahaa! Nfε n-ye lessaa le mabla nii! Ni nse ɔkpε nii leba die mi di nnεε, baasiεwo nii matoofū mi ni laayo lema, mantoonyu mi ni kanya.’

⁵ “Nkpo oso aalee batii ba ninsiko ni saate noo koto onwii onwii. Ni aakaale ɔkasale ale, ‘Le fasiko saate nii?’

⁶ “Ninfe di tote nwu latɔkɔ nwɔ ale, ‘Nsiko nwɔ nnɔfɔ ataase kɔlafa.’

“Ni di saanyunte nwu nkpo latɔkɔ nwɔ ale, ‘Nya koto lefɔ kukū ninfū. Sie kaaso, faakpana fale afosi anɔɔ pe niebu.’

⁷ “Ninfe aakaale onyɔɔfa ale, ‘Ni afɔ mo? Le koto fasiko?’

“Ninfe di nnwɔɔ kafɔɔ aabue ale, ‘Diebla atitabi atofo kɔlafa.’

“Ninfe di saanyunte nwu nkpo latɔkɔ nwɔ ale, ‘Nya kukū lefɔ ninfū. Kpana afosi anε.’

⁸ “Nle mmle oso, saate nwu nkpo latansa saanyunte nwu ninambla ni asaa di osuku kanya ale eebe anu. Nwaako, batii ba ninsi ni kaayi lebe anu di kayi asaa ɔbla suoto balenke batii ba ninsi ni di Yaa kafa lɛkpa kamε.” ⁹ Ninfe di Yesu lakple aabue aakyakaa ale, “Aye biyɔ kayi asaa

ɔwε bikyakaako batii. Nse nnya nkpo ntɔɔbafe yi, Yaa mafū ye di kafa nɔɔ ka ninnaa ni kaloo.

10 “Otii lele nielolaa asaa ya ninle ni abiibii eenu di osuku kanya, abafuo akple kafɔɔ onyu di osuku kanya. Otii lele ninanlolaa asaa ya ninle ni abiibii anyu di osuku kanya, ɔlɔbaafuo n-ya ninle kple kafɔɔ onyu di osuku kanya. **11** Ni nse biloofuo kayi ka mmle asaa ololaa oklee di osuku kanya, ni le nfe di otii mafuo ye ofū onu ale biafuo ninwuna kame asaa ya di Yaa lata ye ni oklee di osuku kanya? **12** Ni nse biloofuo otii bamba lesaa onyu di osuku kanya, ni le nfe dibabla fie baayo nle ninle ye ni lele manta ye?

13 “Kpemblate kuonwii dilaafuo basaate banyɔ sekpe ɔbla. Diekye abasi onwii ambɔmbɔ onwii. Ee abakyɔɔ onwii ɔlaa kotoko, ansī onwii kotoko ɔkyɔɔ. Flɔbaafuo Yaa ku lesaawɛ ɔkpe ɔbla ɔkpotɔɔsa.”

Yesu Latuo Asaa Bamba Kafɔɔ.

14 Obe wɔ di Farisi batii lanu ni selaa se di Yesu labue nii, baama nwɔ diekye baabɔmbɔ koto osie kanya. **15** Ninfé di Yesu latɔkɔ ma ale, “Aye ninle mba ninta ni suoto lebe di batii anu ne. Kafɔɔ Yaa n-ye ye situ kame. Diekye asaa ya niefū ni kɔya di batii anu yi, diedie lesalesaa di Yaa anu.

16 “Mose kufiofa ku Yaa ɔlaa babuetɛtɛ asaa ya bɛɛkpana bɛɛtɛ nii, labla ɔkpe dialaase di Ntu Kpeesate Yohane obe. Diɛyɔ ni di obe nwu kame, ni bɛɛkyako Yaa sɛka kalekɔ ɔlaa biene nwu obue ne. Otii biala kɔkpe ku okyiini ambuo Yaa sɛka kalekɔ nwu kame. **17** Kafɔɔ, diɛtɛ diɛyɔɔ

ale osi ku kasə kafe, ninlenkee ale Mose kufiofa kabefee kadie kaame ale baabla.

18 “Osuotə lele niesi ɔsəfɔ cɛlaayɔ ɔsankɔ bamba, ntookpee asonc. Osuotə wɔ kafc ni-mayɔ ni ɔsankɔ wɔ beesi ni, ntookpee asonc.

Yesu Labue Saawente Onwii Ku Lasaro Suoto ɔlaa.

19 “Osuotə onwii lawe, aale saawente. Obe lele ankpee asaa ya niefu ni kɔya. Aasie nkpa obe lele di suoto ɔeyɔ kamɛ. **20** Piite onwii kafc lawe baatɔɔles nwɔ ni Lasaro. Nkɔ latitika nwɔ di suoto kpinwu. Nioso mankpaa nwɔ manasessa di saawente nwu koyokontū. **21** Antoonyu osuku ale nse saawente nwu nkpo kole alesaa yi, kɔbefee ko nikɔkpa kumpre ni kaasɔ aayɔ anle. Baweejee bia ninwa mamatoɔya nwɔ nkɔ.

22 “Piite nwu nkpo labakpi, Yaa batɔkyente labakpaa nwɔ baasifiko Abraham nkpaatū di Yaa kafa baatɔɔnya suoto ɔeyɔ. Saawente nwu kafc labakpi baakookaa nwɔ. **23** Di bakpi kamɛ ninfa, obe wɔ asi ni diibuo kamɛ, aatakatesa anu aanyu osi. Ni aanya Abraham fanfanfa di osi ne. Lasaro lasie nwɔ di nkpaatū. **24** Nfanwu saawente nwu lalɛs osie kanya ale, ‘Teete Abraham! Nyɛɛ nyaami, faata Lasaro ayɔ 1ɛnɛs nɔɔ alaanyɔ nintu nwo kamɛ abalesesa di ɔkplalomii nii suoto dieyɔɔ mi kɛɛke. Diekye kofie di ɔtɔ wɔ mmle kamɛ!’

25 “Kafc Abraham latɔkɔ nwɔ ale, ‘Obi nii, nyuma fale di nkpa lefɔ kamɛ, asaa biene lete faafu. Lasaro nnwɔɔ yi, asaa kpile lete aafu. Kafc nunua yi, nfɛ ɔnyua suoto ɔeyɔ ninfu, kafc afɔ fasi diibuo kamɛ. **26** Diɛkyakaa nii

kaf   yi, dibio kple ninwii nte di awo ku af   nt  e. Nse otii owo komie ale ataale awa nfa,   lobafuo. Nkpo kaf   di otii kuonwii dil  bafuo okye ninfa   taale   wa   kye loo ne.’

27 “Nfa nfe di saawente lat  ko nw   ale, ‘Teete Abraham, kotikiti f   lekoto nle kpee Lasaro aaky   teemi leyo. **28** Nkpe babilema suot  bi, ban   ninfa. Aalaakpee ma kufiofa osie kanya ale balaawa leba le mmle di dibuo nkpe ni.’

29 “Ninfe di Abraham lat  ko nw   ale, ‘Mose ku Yaa   laa babuetete nkpe di babilee suot  bi nf  . Dikpe ni manky   ma   laa w   boobue ni atoko.’

30 “Kaf   saawente nw   lakple aabue ale, ‘Teete Abraham, bl  banu ma   laa! Kaf   nse otii owo l  taka eekye bakpi kam  , eekye   elaat  ko ma yi, babanu nw     laa manky   siikpile lema kam  .’

31 “Kaf   Abraham lakple aat  ko nw   ale, ‘Nse bl  banu Mose ku Yaa   laa babuetete   laa kamaa, nse otii l  taka eekye bakpi kam   kaf   eekye   kye lema yi, bl  banu nw     laa!’ ”

17

Bitanta Otii Labla Okpile Ta Aye Oso.

1 Yesu lat  ko basaateketete no   ale, “Asaa ya nimakpaa otii ankpee ni di okpile kam   mawa kokooko. Kaf   otii w   suoto abafe anwa nii, ay  sa! **2** Nse b  eyo   kuku   beenii b  esakasa nw   siimu, b  eyo   nw   beefuki beekpee di lekpo kam  , ditabale nw   ninleenkee ale aata babiso ba mmle onwii lema mbla okpile.

“Nse obilee lebla okpile yi, faas     laa fat  o. Nse eekyi di otu kam  , eetikiti lekoto, faay   faky  

nwɔ. ³ Nkpo oso bilolaa binyu nwaa di ləsaa lele biɔɔbla. ⁴ Nse εεbla fɔ okpile sikuensĩ, di dii ninwii kame, eekple εεwafo ɔkye di sikuensĩ nwu nkpo kame, εεbatikiti fɔ lekoto, faayɔ fakyɛ nwɔ.”

Baatikiti Yesu Lekoto Ale Ata Ofū Onu Lema Kupɔ.

⁵ Yesu batɔkyɛntɛ nɔɔ latikiti nwɔ lekoto ale, “Saate, ta ofū onu loo kupɔ.”

⁶ Ninfɛ di Saate nwu latɔkɔ ma ale, “Nse bikpe ofū onu fe sɛfá dibi, biafuo kowoso ko mmle ɔtɔkɔ bile sifi suoto ninfū mmle, ‘Falaasɔ suoto di lekpo kame,’ ku babla ninkpo.

Yesu Labue Mmle Okle Di Kpemblate Biene Mbla Ni ɔkpe.

⁷ “Biyo bile onwii lee nkpe kpemblate wɔ nikɔkpɛ nwɔ ni kofe, ee oonyu nwɔ ni bafoso. Nse eeyie koofe, bibatɔkɔ nwɔ bile, pɛsɛwa fabasiɛ kaasɔ faale alesaa lefɔ? ⁸ Oowo! Kafɔɔ bibatɔkɔ nwɔ bile, ‘Lolaa suoto faakpee awu, faawa alesaa, faatɛɛ ale mi nle, ninyi nloo fie faalaale, ale fɔ.’ ⁹ Nse kpemblate nwu lɛkyɔɔ saate nɔɔ kotoko, kyinkyinaa dile ale saate nwu lɛpɛ kpemblate nɔɔ nwu sefa? ¹⁰ Nkpo kafɔɔ aye, nse bitooloo sɛkpɛ lee se bɛeta ye ale biabla nii, biabue bile, ‘Awo, bakpemblate ba ninandie ni ləsalesaa ko buole. Ləsaa le dikpe ni buɔbla nii, nni butɔɔbla ne.’ ”

Yesu Layɔɔsa Basuɔtɔ Lefosi Bawo Ofie Seele.

¹¹ Obe wɔ di Yesu latoofe ni Yerusalem, aafe di Samaria ku Galilea kɔmɛ suoto. ¹² Aatoofe kaakpaayotū kanwii kame, ni aakyakako basuɔtɔ

lefosi bawo niatoofie ni ofie seele ne. Baayila fanfa. ¹³ Ni baafaa osie kanya baabue ale, “Teete Yesu! Nya wo nyaami!”

¹⁴ Yesu lanya ma ni aatoko ma ale, “Bitookeye bielaayeyo suoto bituo Yaa oletate aanyunyu ye nwaa.” Obe wo bakye ni di osuku boofe nii, ni di ofie nwu layeyo ma ne.

¹⁵ Nioso obe wo di onwii lema lanya ale ofie nwu ntccoyeyo nwoc nii, aape aakple aatocansa Yaa ku kudu osie kanya. ¹⁶ Ninfe aakyey aawa aabape akunkyi di Yesu nkpaattu, aape nwoc sefa ne. Osucto nwu nkpo Samaria otii aale.

¹⁷ Ninfe di Yesu lakaale ale, “Diele basucto lefosi leyccosa ofie? Ni fe baanaasii bule nkpe?

¹⁸ Le diewa fie di otii wo ninanle ni Yuda otii niere eekple eeewa ccopre Yaa sefa?”

¹⁹ Ninfe di Yesu latoko nwoc ale, “Taka, faatocokyey. Ofu onu lefco ntccoyeyo fo ofie.”

Yesu Labue Mmle Di Yaa Seka Kaleko Nwu Mate Nii.

²⁰ Diawa ale Farisi batii bawo lakaale Yesu obe wo di Yaa seka kaleko nwu mawa nii. Yesu latoko ma ale, “Yaa seka kaleko nwu dilobawa di osuku wo batii manya nii. ²¹ Kuonwii dilobabue ale, ‘Binyu lo! Nyaka ninfu,’ ee ‘Nyaka ninfa.’ Diekye Yaa seka kaleko nwu nkpo nfe nsi ye kaame.”

²² Ninfe aatoko basaateketete noo ale, “Obe kowa bibamie bile bionya ni ami, Otii Obi nwu, ayi nii nwu lewo, kafco biloco wa obanya! ²³ Batii bawo kamawa mamatoko ye ale, ‘Binyu nfa lo, akpe ninfa,’ ee ‘Binyu nfu lo, akpe ninfu!’ Kafco bitankye bialaawolaa mi ninfa! ²⁴ Diekye fe

mmle di ɔplala mmunaa ni di osi, kunkye ni kakye kanwii, kumafe ni kakye bamba, kɔtɔkɔ ye nle nkpo di ami, Otii Obi nwu nkpo, ɔwabee kamate ne. ²⁵ Kafɔɔ lekasale, dikpe nii, lefe di dibuo kpинwu kame, miɛ batii nsī mi.

²⁶ “Fε mmle diaawa ni di Noa obe kame, nkpo okle kafɔɔ diɔwa ɔbawa di ami, Otii Obi nwu, ɔwabee kame ne. ²⁷ Di obe nwu kame, batii latoole baatoonyi. Basanko ku basuɔtɔ latoobuo di sesa ku sesɔfɔ kame, baayɔ basankobi kafɔɔ baatɔɔta asa dialase di dii le di Noa labuo ni di oklo kple nwu kame. Fie nfe di kanto labancɔ ntu layii kasɔ kamuu, diawɔɔsa batii bamuu.

²⁸ “Dibate fε mmle diaawa ni di Lot obe kame kafɔɔ. Batii latoole baatoonyi, baatɔɔya assaa baatoosunsū. Bawo latɔɔkpε afe, bawo kafɔɔ latootofo ayo. ²⁹ Dii le di Lot ladie ni di Sodom, ni di ɔtɔ ku ɔtɔ afuɔ lakyε osi kuabakpete di okpoo nwu kame, kuawɔɔsa bamuu lema ne.

³⁰ “Nkpo okle kafɔɔ diɔwa ɔbate di dii le di ami, Otii Obi nwu, kamadie nkyɔɔ ni ne. ³¹ Di dii nwu nkpo suoto, Otii wɔ kafɔɔ nintika ni di leyo cɔn osi, atantɔkɔ ale oosoo anwa amayɔ lesalesa cɔn leeyo kame ansifiko. Nkpo okle kafɔɔ di otii wɔ ninkpe ni koofe, atasinkple aatɔkɔ ale oo yie ammayɔ lesalesaa ne. ³² Binyuma lesaa le niawa ni di Lot ɔsɔfɔ suoto! ³³ Otii lele niemis ale ɔcta nkpa nɔɔ, abayu mi. Otii lele kafɔɔ nieyu nkpa nɔɔ, abakple anwε mi. ³⁴ Kɔtɔkɔ ye nle di dii nwu nkpo kakye, batii banyɔ mate di atensaa anwii suoto, Yaa makpaa onwii ansifiko, andie ɔnyɔɔfa nn̄te. ³⁵ Basanko banyɔ matookuɔ nnaafū di kukuɔ suoto, kafɔɔ Yaa makpaa onwii

ansifiko andie ɔnyɔɔfa di kukuɔ katū. ³⁶ Basuɔtɔ banyɔ mayila koofe mantɔɔkpe, Yaa makpaa onwii ansifiko andie ɔnyɔɔfa antɔɔkpe.”

³⁷ Ninfɛ di basaateketete nɔɔ lakaale nwɔ ale, “Saate di ɔfe?”

Ninfɛ di Yesu ladiki kanya ale, “Leba le leesaa lekpi dite nii, nfa di alente nsi ne.”

18

Yesu Lape Lekpa Di Kpisɔfɔ Onwii Ku Kante Kpile Onwii Suoto.

¹ Yesu Lape lekpa aatuo basaateketete nɔɔ lesaa ale, dikpe nii, obe lele, bεεtɔɔpε ɔlaa bεεtɔɔta Yaa di nnεε otanfeesa kame. ² Aatɔkɔ ma ale, “Kante onwii lawε di okpoo onwii kame, ananyεkε ni Yaa ee otii. ³ Kpisɔfɔ onwii kafɔɔ lawε di okpoo nwu nkpo kame, aatɔɔkyε kante nwu nkpo nfū wlawa aalaatootikiti nwɔ lekoto ale, ‘Kyakaakoe ta balo nii oso.’

⁴ “Diaklε, kante nwu nkpo ditatookpee ɔlaa nwu kanya. Kafɔɔ sεmaa aabatɔkɔ suoto ale, ‘Kunte ninyεkε Yaa ee labu otii yi, ⁵ ta kubue ko di kpisɔfɔ wɔ mmle kokpee mi ni oso, manyu nle lεtɔɔ lebe. Se diele nkpo, obe lele abatɔɔwa nfū amatoodiki mi ninwuna.’”

⁶ Ninfɛ di Saate nwu lakple aabue aatɔkɔ ma ale, “Binu ɔlaa wɔ di kante wɔ mmle kpile labue ni. ⁷ Ni, Yaa dilɔbatuna ata batii nɔɔ ba bamuu ninpε ɔlaa mantɔɔ ni kakū ku kakye? Sεε bienyu bile ɔlobaresewa akyakaako ma? ⁸ Nwaako kɔtɔkɔ ye nle Yaa matuna ma wla. Kafɔɔ nse Otii Obi nwu lewa, abanya batii ba niefū beenu ni kaasɔ ka mmle?”

Yesu Lape Lekpa Ninwii Di Farisi Batii Ku Akpooto Bafunte Suoto.

⁹ Yesu lakple aape lekpa ninwii di batii ba ninnyu ale bate ni tinini, mannyu ni batii bamba ale baate ni fe mma. ¹⁰ Ni aatokɔ ma ale, “Obe onwii kamɛ, batii banyɔ banwii lakyɛ Yaa Olekatakɔ ale bɔɔlaare ɔlaa manta Yaa. Onwii lale Farisi otii, ɔnyɔɔfa kafɔɔ lale akpooto funte.

¹¹ Farisi otii nwu lablasa suoto aayila aape ɔlaa aata Yaa aabue ale, ‘Yaa, kɔpɛ fɔ sefa, diekye nnaa koto onumbɛbɛɛ, ninle otii kpile, ninle sɔɔnɔkpeete fe mmle baatii bamba mbla nii. Kɔpɛ fɔ sefa kafɔɔ ale, ninte fe akpooto funte nwu nkpo nin-ye ni ninfa. ¹² Nnii kanya ayi anyɔ di osuku kaanya kamɛ. N-ye kafɔɔ asaa ya amuu ninwɛ ni lefosile nwako fɔ.’

¹³ “Kafɔɔ akpooto funte nwu nkpo layila fanfa, atakplesa bia anu aanyu osi. Ni aayɔ kɔnɛɛ aatika nintɛɛ aabue ale, ‘Yaa, kpileblate nle, nyɛɛ nyaami!’ ”

¹⁴ Ninfɛ di Yesu latokɔ ma ale, “Kɔtɔkɔ ye nle, akpooto funte nwu nkpo lakple aasifi leyo, klekle di Yaa anu aalenkee Farisi otii nwu nkpo. Diekye otii lele niɛtakatesa suoto katoo, Yaa mawakosa nwɔ kasɔ. Kafɔɔ otii lele niɛwakosa suoto kasɔ, Yaa matakatesa nwɔ katoo.”

Yesu Labɔmbo Babisɔ ɔlaa Osie Kanya.

¹⁵ Batii bawo lakpaa babi lɛma baawako Yesu nfū ale atika ma nnɛɛ di asi. Obe wɔ di Yesu batɔkyɛntɛ lanya ni batii nwu nkpo, baasī ɔlaa baata ma ta lesaa nwu oso. ¹⁶ Kafɔɔ Yesu laleɛ babisɔ nwu nkpo aawako ɔkyɛ nɔɔ, ni aabue ale, “Bita babisɔ bawa ɔkyɛ nii, bitantii ma osuku.

Diekye batii fε babiso ba mmle okle kale ninle Yaa sekə kalekɔ nwu nkpo ne. ¹⁷ Binyuma nle mmle, otii lele ninanfũ Yaa kafa nwu fε obiso, dilɔbabuo nfa diidii.”

Yesu Lakakate Di Basaawente Ku Yaa Sekə Kalekɔ Suoto.

¹⁸ Yuda batii tunlete onwii lakaale Yesu ale, “Saatuote biene, be kabla fie kawε nkpa be ninnaa ni kaloo?”

¹⁹ Ninfε di Yesu lakaale nwɔ ale, “Be oso foɔlesε mi otii biene? Otii kuonwii nnaa ale ni bienete, diediki Yaa lete. ²⁰ Faye Yaa afiofa amuu. ‘Tanlo otii, tankpee asɔnɔ, tan-yu, tanlaa faatika di otii suoto, bu teefɔ ku Yaafɔ.’”

²¹ Ninfε di ɔnɔɔfo nwu labue ale, “Diεyɔ ni bia sibiso nii obe, lekyako afiofa ya mmle nwu nkpo ole.”

²² Obe wɔ di Yesu lanu ni ɔlaa wɔ mmle, ni aatɔkɔ nwɔ ale, “Diebu fɔ lesaa ninwii dikpe ni feεbla nii. Laayɔ asaa lefɔ amuu fasunsũ, faayɔ koto nwu fata bapiite, ni fabawε asaa di Yaa kafa. Nni kamaa faawa fabatikankoe.”

²³ Kafɔɔ obe wɔ di osuɔtɔ wɔ mmle lanu ni selaa se mmle, suoto ditayɔɔ nwɔ, diekye saawente aate aale. ²⁴ Yesu lanya ale suoto ditayɔɔ nwɔ, nioso aabue ale, “Dikpe osie dieta basaawente fie bababuo Yaa kafa! ²⁵ Diebla lesaa le niεyɔɔ dieta ni kapupunkɔ ale aafe di panie ditue, dilenke ale saawente kabuo ni Yaa sekə kalekɔ.”

²⁶ Batii ba nianu ni selaa se mmle lakaale Yesu ale, “Ni owe nfε nimawε didiki?”

²⁷ Ninfə di Yesu labue ale, “Lesaa le di otii diləbaafuo ni obla diidii, Yaa nnwɔɔ abafuo ni obla.”

²⁸ Ninfə di Petro latəkə Yesu ale, “Nyu! Awo buodie ayo loo buɔte buɔwa butikanko fo.”

²⁹ Ninfə di Yesu latəkə ma ale, “Nwaako dile. Kafɔɔ kɔta ye mintofo nle otii lele niedie leyə nɔɔ εετε, ee ɔɔfɔ nɔɔ εετε, ee babiləma suɔtɔbi εετε, ee ote ku ɔya εετε, ee babi nɔɔ εετε, ta Yaa sekə kalekə oso, ³⁰ abawε asaa nwu nkpo amρɔɔsa di nkpa be mmle kame ku nkpa be nikɔwa dinnaa ni kaloo kafɔɔ kame.”

Yesu Lakple Aakakate Ditiɛfa Di Kukpi Nɔɔ Suoto.

³¹ Yesu lalεε batɔkyεntε nɔɔ lefosi batii banyɔ nwu di ɔlɔɔkə ni aatɔkə ma ale, “Binu lo! Nfə buofe Yerusalem, nfū di asaa ya di Yaa ɔlaa babuetetε ləkpana bεetε ni di ami, Otii Obi nwu, suoto mawa ni kaanya. ³² Batii mayɔ mi mankpee di batii ba ninanle ni Yuda batii nneε kame, babama mi, mantufa mi, mantufa sita kafɔɔ mankpete mi di suoto. ³³ Babape mi, manlo mi, kafɔɔ dii tiefə kamaa, makple ntaka nkye bakpi kame.”

³⁴ Kafɔɔ basaateketete nɔɔ ditanu selaa se mmle kuonwii kasɔ. Selaa se mmle lessɔnu lawofa ma. Nioso batanu ɔlaa wɔ di Yesu latoobue ni kasɔ.

Yesu Layɔɔsa Numbietε Onwii Niale Ni Asaakaalete Ofie.

³⁵ Obe wɔ nfə di Yesu latɔotεεtε ni Yeriko, numbiεtε onwii lasiε di osukulɔɔkə aatɔɔkaalε

asaa. ³⁶ Obe wɔ aanu batii kpinwu kofe nii, aakaale ale, “Omènlaa kule?”

³⁷ Ninfə baatɔkɔ nwɔ ale, “Yesu Nasaret Otii nikofe.”

³⁸ Ninfə aafaa osie kanya aabue ale, “Yesu, ɔka Dawid Obi ee! Nyee nyaami!”

³⁹ Nioso batii ba niale ni katũ lamue nwɔ ale, alo kanana. Kafɔɔ mianfə aakple aafaa osie kanya aakyakaa ale, “Dawid Obi ee! Nyee nyaami!”

⁴⁰ Nkpo oso Yesu layila, ni aatɔkɔ ma ale, bakpaa numbiete nwu nkpo bawako nwɔ ne. Obe wɔ di numbiete nwu ladu ni Yesu nfū, ninfə aakaale nwɔ ale, ⁴¹ “Be foomie fale mbla nta fɔ?”

Ninfə di numbiete nwu labue ale, “Saatuote, ta anu atikiti mi nintɔonya!”

⁴² Ninfə di Yesu latɔkɔ nwɔ ale, “Ni nyaε! Ofūonu lefɔ ntoodiki fɔ.” ⁴³ Nfanwu, osuɔtɔ nwu lakyako ɔnya, ninfə aatikanko Yesu sεεmaa aatɔɔtansa Yaa ne. Obe wɔ baatii dikudi nwu nkpo kafɔɔ lanya ni nle mmle, bamuu lema baatansa Yaa.

19

Yesu Lakakateko Sakeo.

¹ Yesu labuo Yeriko okpoo kamε ɔɔwaalε anfe. ² Akpooto funte ɔɔcɔfo onwii lawε ninfa baatɔɔlεs nwɔ ni Sakeo, koto late nwɔ osie kanya. ³ Aamie ale ɔɔnya otii wɔ di Yesu nle nii, kafɔɔ atafuo nwɔ ɔnya ta batii lepɔ oso, diekye otii kunkudu aale. ⁴ Nkpo oso aatoso aale batii nwu katũ, aalaayie kowoso kunwii ale, ɔɔnya Yesu. Diekye aatofo ale Yesu mafe ninfa.

⁵ Obe wɔ di Yesu labadu ni kowoso nwu kalɔ, aatakatɛsa anu aanyu osi ni aatɔkɔ Sakeo ale, "Sakeo, pɛsɛwa fasoo fawa, diekye leyo lefɔ masoosa mie." ⁶ Nioso Sakeo lapɛsɛwa aasoo aawa, aabafū Yesu ku suoto լeyɔɔ kplɛ.

⁷ Batii nwu nkpo bamuu nianya ni lakyɛ kasɔ baatoonwununu di Yesu suoto ale, "Osuɔtɔ wɔ mmle kofe kpileblate wɔ mmle nfū osoosa."

⁸ Sakeo lataka aayila, ni aabue aatɔkɔ Saate ale, "Teete! Nyu lo! Mayɔ asaa ya ninkpe mi ni kakye kanwii nta bapiitɛ. Otii lele kafɔɔ ntɔyitafaa mata lesaa nwu ntɔɔ, nkyakaa nwɔ di akyuu ana kamɛ."

⁹ Ninfɛ di Yesu latɔkɔ nwɔ ale, "Miɛ nkpa ɔwɛ ntɔɔwa leyo le mmle kamɛ. Diekye osuɔtɔ wɔ mmle kafɔɔ Abraham ɔnantii ale. ¹⁰ Ami, Otii Obi, ɔwa lewa nlɛ, komawolaa ndiki mba nintooyu nii."

Yesu Lape Lekpa Di Koto Sɛele Suoto.

¹¹ Obe wɔ batii nwu nkpo konu ni selaa se mmle, Yesu lakple aape ma lekpa ninwii. Diekye obe nwu nfe ɔɔtɛɛtɛɛ Yerusalem. Baanyu ale Yaa sekä kalekɔ nwu nfe makycɔ. ¹² Nioso aatɔkɔ ma ale, "Obe onwii, osuɔtɔ finle onwii lawɛ, aatoofe kale kanwii fanfa ale bɔolaase nwɔ sekä ankple anwa okpoo nɔɔ. ¹³ Fiɛ abasifi nii, aaleɛ bakpɛmblate nɔɔ lefosi aasiisa. Ni aata obiala lema koto sɛele kunwii kunwii ne. Ni aatɔkɔ ma ale, 'Biyo koto nwu bitɔɔblako ɔkpɛ dilaase di obe wɔ kamawa ni.'

¹⁴ "Kafɔɔ oso cɔtuos wɔ mmle okpoo cɔu cɔ batii nimbɔmbɔ nwɔ, nkpo oso baakpee batii sɛemaa

nu alε, 'Buloomie osueto wɔ mmle bulε ale wo oka.'

¹⁵ "Kafco baase osueto nwu sekə aakple aawa okpoo nɔɔ. Nfanwu ni aakpee baalee bakpemblate nɔɔ baatco ale, babatoko nwu mmle bεεblako ni koto ko aata ma ni ɔkpε, ku mmle bεεwe ni.

¹⁶ "Ninfe di kpemblate kasale nɔɔ alε, 'Teete, koto nwu, lewe lefosi lekyakaa di nko faatee ni suoto.'

¹⁷ "Ninfe di Saate nwu latansa nwɔ aatoko nwɔ alε, 'Lafe! Feelolaa fεεbla! Kpemblate biene fale! Di obe wɔ feelolaa lesaabii le mmle feeklee ni di osuku wɔ mmle suoto oso, mayɔ fɔ nse di eekpoo lefosi kanya.'

¹⁸ "Kpemblate nyɔɔfa kafco lawa aabatoko nwɔ alε, 'Teete, di koto ko faatee nii, lewe anɔɔ lekyakaa di nkunkpo suoto!'

¹⁹ "Ninfe di Saate nwu nkpo latoko kpemblate nwu nyɔɔfa alε, 'Afɔ yi, mayɔ fɔ nse di eekpoo enɔɔ kanya!'

²⁰ "Kpemblate bambalawa aabatoko nwɔ alε, 'Teete, nnya koto sεele lefɔ nwu faatee ni. Layɔ lakookaa di kadukufi kame. ²¹ Latɔoyeke fɔ diekye otii siene fale. Fan-yɔ lesaa le ninanle fɔ ni lele. Fanfielε ninfu kafco fanankpε nii.'

²² "Ninfe di Saate nwu latoko nwɔ alε, 'Afɔ kpemblate kpile fale! Afɔ omu kanya kame selaa mayɔ nlo fɔ lepoɔ. Faye fale otii siene nle. N-yɔ lesaa le ninanle mi ni lele. Nfielε kafco ninfu ninankpε nii. ²³ Ni se faye nkpo mɔ, be oso fanan-yɔ koto nii nwu falaate di koto katoko? Ale nse lewa kamawε nfasu nkyakaa.'

24 “Ninfe aatoko batii ba niayila ni ninfa ale, ‘Bifū koto sesele nwu di nnee nō biyeo bita kpemblate wō ninkpe ni koto sesele lefosi.’

25 “Kafco batii nwu latoko nwō ale, ‘Teete, kpemblate nwu nkle koto lefosi kofokofoko!’

26 “Ninfe di saate nwu ladiki kanya ale, ‘Kotoko ye nle otii wō lesesaa nkpe nii, nnwō babakple mankyakaa ne. Kafco otii wō lesalesaa nnaa nii, kεekεe wō ninkpe nwō nii, babaklee manfū nwō ninnee. **27** Nunua yi, balo nii ba ninoomie ale nle ma ni ɔka, bikpaa ma biwako nfū biebalō ma di anu nii.’ ”

Yesu Labuo Yerusalem Ku Katansa.

28 Obe wō di Yesu latoko ma ɔlaa wō mmle aaloo nii, aalekatū aasifi Yerusalem. **29** Di obe wō nfe ɔcteetēe ni Betfage ku Betania di nnonyi kobokote ɔlooko, aakpee basaateketete nō banyo ale bale katū. **30** Ni aatoko ma ale, “Bitɔɔkye okpoo wō ninte ye ni siitū ninfa. Nse biebuo nwu kaame, bibanya leponkobi ninwii nsi di okū, di otii kuonwii diisie ni ni diidii. Bidiki ni di okū, biekpaa ni biwakoe. **31** Nse otii owo lekaalé ye ale be lessaa oso biodiki ni, bietoko nwō bile, ‘Saate komie ni.’ ”

32 Batɔkyente nwu lakyé baalaanya fe mmle okle di Yesu latoko ma nii. **33** Obe wō baatoodiki ni leponkobi nwu, saate ni ni lakaalé ma ale, “Be lessaa oso biodiki ni?”

34 Ninfe di basaateketete nwu nkpo ladiki kanya ale, “Saate nwu komie ale ablako ni ɔpke.”

35 Ninfe baakpaa leponkobi nwu baawako Yesu ne. Ninfe baayo abula lema baatika di leponkobi nwu kamaa, ni baakyakaako Yesu aayie aasié ni

kaamaa nε. ³⁶ Obe wɔ nfε asi ni, ninni suoto bɔɔkyε nii, batii layɔ abula lema baate di osuku suoto.

³⁷ Obe wɔ di Yesu nfε kɔtεεtεε ni Yerusalem, di leba le di osuku lesoo kuosifi ni Nnɔnyi Awoso Kobokote, basaateketete nɔɔ dikudi nwu lakyako Yaa sεfa ɔpε baatɔɔtansa nwɔ kafɔɔ ku sεlɔ siene di asaa kplε ya bεenya ni oso. ³⁸ Baatoobue ale, "Yaa akusekusesa ɔka wɔ nikɔwa ni di Saate leyooto kame!"

Atoko ɔkyε ole diwε di Yaa kafa, Yaa lele ninle leklekle!"

³⁹ Ni di Farisi batii ba bawo niawε ni baatii dikudi nwu kame latɔko Yesu ale, "Saatuotε, sī ɔlaa fata basaateketete lεfɔ, baadie kudu oyisa!"

⁴⁰ Ninfe di Yesu ladiki kanya ale, "Kɔtɔko ye nlε, nse batii ba mmle lemaasa kanya, afuɔ amu makye kasɔ ankyako kudu oyisa."

Yesu Lawi Di Yerusalem Disi.

⁴¹ Di Yesu nfε kɔtεεtεε ni Yerusalem okpoo aanya nwu nii, aawi kaku diisi ninwu. ⁴² Ni aabue ale, "Nse fe oye faye lesaa le nieffī dieta ni atoko ɔkyε ole mιε! Kafɔɔ nunua, flɔbafuɔ ɔnya! ⁴³ Obe onwii kɔwa di balo lee mamana ye mankyi nii kaakɔ biala. Babatīi ye di aba amuu ale kuonwii dilɔbawε osuku adie ee abuo. ⁴⁴ Babawɔɔsa okpoo wɔ mmle ku batii ba bamuu ninsi ni kaamε. Blɔbadie bia difuɔ kuninwii ditika leewo suoto. Diekye bitatofo obe wɔ di Yaa lawa ye ni odiki!"

Yesu Lakyε Yaa Olekatakɔ.

⁴⁵ Yesu lakyε Yaa Olekatakɔ, ni aakyako basaa-sunsutε otososa odiki nε. ⁴⁶ Ni aatɔko ma ale,

“Bεεkpana di Kokpana Klekle Kukū kamε ale, ‘Baaleε mi leyo ale ɔlaa ɔpε katakɔ.’ Kafɔɔ aye, bitɔɔyɔ biɛbla bayu kawofakɔ!”

⁴⁷ Dii biala Yesu latuo asaa di Yaa Olekatakɔ nwu ninfa. Yaa ɔlaa babuetete ku kufiofa batuotε ku okpoo banɔɔfo lamiε ale boolo nwɔ. ⁴⁸ Kafɔɔ batawε osuku wɔ suoto baafe manlo nwɔ nii. Diekye batii bamuu latɔɔkyɔɔ cnwɔ ɔlaa atoko osie kanya.

20

Batii Lananfiko Yesu ɔlaa Di Osie Nɔɔ Suoto.

¹ Dii ninwii obe wɔ di Yesu lawε ni di Yaa Olekatakɔ aatooutuo ni batii asaa, aatɔtɔkɔ ma ni kafɔɔ ɔlaa biene nwu, Yaa olebatate banɔɔfo ku kufiofa batuotε ku okpoo banɔɔfo lakyε ɔkyε nɔɔ. ² Ninfε baabakaale nwɔ ale, “Tɔkɔ wo, ɔmənsuku fakpe fɔɔbla asaa ya mmile? Owe kafɔɔ nieta fɔ osuku nwu nkpo?”

³ Ninfε di Yesu ladiki kanya ale, “Amii biteε nkaale ye ɔlaa onwii bietɔkɔ mi. ⁴ ɔfε di Yohane lawε osuku fie aatookpeesa batii Yaa ntu? Yaa nfū kuakye εε, sεε batii nfū kuakye?”

⁵ Ninfε baamumufū ɔlaa nwu nimanima baanyu ale, “Be nfε buabue? Nse buobue bulε Yaa nfū kuakye yi, abakaale wo ale, ‘Ni be oso bitafū Yohane bianu mɔ?’ ⁶ Kafɔɔ nse buobue bulε otii nfū kuakye yi, batii ba mmile niesi ni ninfū masafɔ wo afuɔ, diekye bamuu lema beefū beenu ale Yohane yi, Yaa ɔlaa buetete aale.”

⁷ Nioso baatɔkɔ Yesu ale, “Buoye nfū kuakye nii.”

⁸ Ninfé di Yesu latókó ma ale, “Nkpo okle kafco di amii, namatókó ye otii wó niestee ni osuku fié kobla ni asaa ya mmle ne.”

Yesu Lape Lekpa Aakyeko Kofe Nyunte Kpile Onwii Suoto.

⁹ Ninfé di Yesu lape lekpa le mmle aata batii nwu ale, “Obe onwii, osuotó onwii lakpe awosobi ya man-yo mambla ni nta kofe. Ni aayó kofe nwu nkpo aakpee di bakpente banwii nnée kame ale, batoonyu batootó ne. Ni aadie aasifi osuku, aalaasisie ninfa aakle ne. ¹⁰ Di obe lawo ale baatese ni awosobi nwu, aakpee kpemblate nco onwii ale, akyé aalaafu kalekó nco di kofe banyunte nwu nfú awako nwó. Kafco kofe banyunte nwu nkpo lape kpemblate nwu baatososco aasifi nnée fukuti. ¹¹ Nioso, aakple aakpee kpemblate bamba. Kafco kofe banyunte nwu nkpo lakple baape nwó baakpee nwó sin-unso baatososco aasifi nnée fukuti. ¹² Ni, aakple aakpee kpemblate tiefa ne. Kafco kofe banyunte nwu lape nwó baatika nwó nkó baatososco baadiki koefe nwu kame ninfa.

¹³ “Ni koefe nwu saate lakaale ale, ‘Be nfé kakple mbla? Ninfé aatókó suoto ale, kamakyese obi nii bembôte. Loobia babata obi nii nwu dibu.’

¹⁴ “Kafco obe wó di kofe nwu nkpo banyunte lanya ni obi nco nwu nkpo, ni baatókó bawo ale, ‘Nnya kofe saate obi wó nimale ni atesaa ninle nwó mmle ne. Bita bulo nwó di atesaa nco nwu nkpo akple wo ale!’ ¹⁵ Nioso baananfi obi nwu nkpo baadiki di kofe nwu kame, ni baalo nwó ne.”

Ninfé di Yesu lakaale ma ale, “Be bienyu bilé kofe saate nwu mabla kofe banyunte nwu? **16** Kötökó ye nle abawa amalo kofe banyunte nwu nkpo, an-yo kofe nwu ankpee koofe banyunte bamba nnée kamé.”

Obe wó baatii nwu nkpo lanu ni ɔlaa wó mmle baabue ale, “Oowo! Diləbawa nkpo!”

17 Yesu lanyu ma tuwii ni aakaale ma ale, “Ni be di Kɔkpana Klekle ko mmle kotuo? Nko niebue ale,

‘Difuɔ le baayotofotε lesī ale diɛlε nii,

nni bia nintoobakple difuɔ le nintoofū kɔya
dilenke ni di afuɔ amuu kamé ne.’

18 Otii lele niɛnɔɔ εɛrε diifuɔ le mmle, suoto nɔɔ mabibie wɔkyɔwɔkyɔ. Otii lele kafɔɔ diifuɔ le mmle lɛkpa dierε, suoto nɔɔ makuɔ tuiemus.”

Yesu Lakakate Di Akpooto ɔta Suoto.

19 Kufiofa batuote ku ole batate banɔɔfo lamiɛ ale boomufū Yesu ninfa, diekye baatofo ale lɛkpa le di Yesu lape nii mma aalaka. Kafɔɔ baayekε batii nwu nkpo. **20** Ta nkpo oso, baamiɛ osuku bamba wó suoto baafe mammufū nwɔ nii. Nioso baata batii bawo asaa di lewofa kamé. Ni baabla onwii baakyε Yesu ɔkyε fe batii biene bale. Baakyε ale bɔɔlaawolaa nwɔ kaanya ku selaa kaalele sewo. Mmle okle baawε osuku man-yo nwɔ mankpee ni di Roma abaa ɔnoɔfo nnée kamé. **21** Nioso banyawolaatε ba mmle lakyε Yesu nfū. Ni baatɔkɔ nwɔ ale, “Saatuote, buye bulε lesaa lele feebue, ee feetuo kute nkpo. Buye kafɔɔ bulε fannyu otii di anu faabla lesaa. Kafɔɔ fantuo nwaako ɔlaa wó di Yaa komie ni fanta batii. **22** Nioso buomie bulε butofo, dile ale

buata akpooto munta Roma Batii Ḍka Kple εε, sεε diele?”

²³ Kafcɔ Yesu latofo kakyɔnkyɔ osuku wɔ suoto bakyε nii, nioso aatɔkɔ ma ale, ²⁴ “Biyc koto fututu nwu biwakoe nnyu. Obe wɔ baayɔ baakyɛnko nwɔ nii, aakaale ma ale owe kunyii ku leyooto nintika?”

²⁵ Ninfε baadiki kanya ale, “Ḍka Kple Kaesare lele dile.”

Ninfε di Yesu latɔkɔ ma ale, “Ni biyc lesaa le ninle ni Ḍka Kple lele, bita Ḍka Kple. Biεyc lesaa lele ninle Yaa lele bita Yaa.”

²⁶ Batafuo ɔlaa kuonwii ɔwε, ɔyc omufū nwɔ di batii nwu anu. Nioso batasinfoo ɔlaa kuonwii obue. Diabla ma ɔkpε di ɔlaa wɔ di Yesu ladiki ni kanya oso.

Yesu Lakakate Di Bakpi Okple Ḍtaka Suoto.

²⁷ Ninfε di Saduki batii ba nimbuε ale bakpi dilɔbasintaka ni bawo lawa Yesu nfu babatɔkɔ nwɔ ale. ²⁸ “Saatuote, Mose lakpana kufiofa ko mmle εετε wo ale, ‘Nse osuɔtɔ owo lekpi eedie ɔsɔfɔ, manko nwɔ banaa obi, osuɔtɔ nwu nkpo obilema osuɔtɔbi kayɔ kpisɔfɔ nwu nkpo manlofo babi. Ni babi nwu nkpo, batii manya ma fe osuɔtɔ wɔ niñnaa ni babi.’ ²⁹ Obe onwii babilεma suɔtɔbi bakuenṣi banwii lawε. Osuɔtɔbi nɔɔfole labayo ɔsanko, batalofo obi, aabafe aakpi. ³⁰ Ni di obilema suɔtɔbi nyɔɔfa kafcɔ labayo kpisɔfɔ nwu ne. ³¹ Otiefa kafcɔ laakpanwu. Lesaa le mmle lawa babilεma suɔtɔbi nwu bakuenṣi suoto. Bamuu lema baakpi batalofo obi. ³² Yentεyεntε, ɔsanko nwu omu labakpi. ³³ Nimɔ, di dii le baakpi makple

mantaka nii, owe lema ɔsɔfɔ di ɔsankɔ nwu nkpo male di obe wɔ baakuensī lema nwu layɔ nwɔ ni?"

³⁴ Yesu ladiki kanya ale, "Nkpa be mmle kame lete di basuɔtɔ ku basanko kɔyɔ bawo. ³⁵ Kafɔɔ basuɔtɔ ku basanko ba niesieko ale baataka mankye ni bakpi kame mansie ni nkpa be mmle yi, blosinwa sesa ku sesɔfɔ ɔbatoole. ³⁶ Babate fɛ Yaa batɔkyentɛ, blosinwa ɔbakpi kafɔɔ. Yaa babi nfe bale diekye batɔɔtaka beekye bakpi kame. ³⁷ Mose lɛkpasa kame klekle di Kokpana Klekle Kukū kame ale bakpi makple mantaka mansie nkpa. Diekye obe wɔ aayila ni di owuu dibuu le niatoofie ni ɔlɔɔkɔ aabue di Saate suoto ale, 'Abraham Yaa, Isak Yaa ku Yakob Yaa.' ³⁸ Nle mmle kotuo ale, nnwɔɔ ninle batii ba ninkpe ni nkpa Yaa, diele bakpi Yaa ale. Diekye di anu nɔɔ bamuu lema bakpe nkpa."

³⁹ Kufiofa batuotε bawo ladiki kanya ale, "Nwaako, Saatuotε, feelolaa kanya feediki!"
⁴⁰ Di nni nkpo kamaa, kuonwii ditasinkpee otu aakaale Yesu ɔlaa kuonwii.

Owe Obi Ninle Otii Wɔ Bεερε Ni ɔfɔɔ?

⁴¹ Yesu lakaale ma ale, "Le diebla fie baatii kobue ale, Otii wɔ bεερε ni ɔfɔɔ Dawid ɔnantii ale? ⁴² Diekye Dawid omu labue di sinu kukū kame ale,

'Saate nwu latɔkɔ Saate nii ale,

"Sie kaasɔ di oletaneεkye nii

⁴³ dielase di obe wɔ mayo balo lefɔ

nkpee ni di nkpaasɔ lefɔ kalɔ." '

⁴⁴ Ni nse Dawid laleɛ nwɔ ale Saate, le dibawa fie di otii wɔ bεερε ni ɔfɔɔ male Dawid ɔnantii?"

Yesu Lasĩ Ọlaa Aata Basaateketete Nɔɔ Di Kufiofa Batuote Suoto.

⁴⁵ Obe wɔ baatii bamuu n-yε bɔɔkyɔɔ ni ɔlaa wɔ di Yesu latoobue ni atoko, aatɔkɔ basaateketete nɔɔ ale, ⁴⁶ “Bilolaa suoto binyu di kufiofa batuote suoto. Batii ba mmle mbɔɔmbɔ awu kple okpee, mankye mantookyi lɛkpaka ale batii katoɔsesesa ma ku suoto kasɔ ɔwakosa. Mambɔɔmbɔ nisiekɔ kple di Yuda batii nsiisakɔ ku dii nlekɔ. ⁴⁷ Mankye bakpisɔfɔ nfū manatafaa ma manfū ma asaa ninnε. Mantakatesa suoto katoo baatii anu manklesa ɔlaa ɔpε ɔta Yaa. Letoko nanfi lɛma mapɔ ninlenkee batii bamuu lele!”

21

Kpisɔfɔ Onwii Lata Koto Kplε.

¹ Di Olekatakɔ ninfa, Yesu latakatesa anu ni aanya mmle di basaawente layɔ asaa ɔta lɛma baatookpee ni di asaa ɔta lekpeesa kame. ² Ni aanya mmle kafɔɔ di kpisɔfɔ piite onwii labafe aalaakpee ni mple nnycɔ di asaa ɔta lekpeesaa nwu kame ne. ³ Ni aatɔkɔ ma ale, “Nwaako kɔtɔkɔ ye nle, kpisɔfɔ piite wɔ mmle nieta koto alenke batii bule. ⁴ Diekye batii bule yi, di lesaawε lɛma kame nle ninle ma ni bεεyɔ bεεbata. Kafɔɔ ɔsanko wɔ mmle di dipii nɔɔ kame, lessaa le ninkpe nwɔ aale ansie ni nkpa nimuu εεyɔ εbata ne.”

Yesu Labue Obe Wɔ Batii Kɔwa Ni Yaa Olekatakɔ Nwu Obie ɔte Kaasɔ.

⁵ Di obe nwu nkpo kame, basaateketete bawo latɔɔkakate di Yaa Olekatakɔ nwu nkpo suoto.

Di mmle okle diel ni onyu ku afuɔ ya bεεyɔ beetofo ni nii, ku asaa ḥta ya baayɔ baata ni Yaa. Ninfɛ di Yesu latɔkɔ ma ale, ⁶ “Asaa ya amuu biɔnya ni ninfū, obe owo kɔwa di difuɔ kuninwii dilababu ditika ni leewo suoto. Bababie amuu mante kaasɔ.”

Dibuo Ku Ditikanko Mawa.

⁷ Ninfɛ baakaale nwɔ ale, “Saatuotɛ, ɔmɛmbe di nle mmle mawa? Be nimale dituosaa le bubayɔ muntofo bule, obe nwu ntoowo ni?”

⁸ Yesu latɔkɔ ma ale, “Bilolaa binyu nwaa ale otii kuonwii diekyɔnkyɔ ye. Batii kpинwu mayɔ leyooto nii manwa ɔkye lee, mamaṭɔkɔ ye ale, ‘Ami dile,’ ni kafɔɔ, ‘Obe nwu ntoowo.’ Kafɔɔ bitantikanko ma di nkpaamaa. ⁹ Bitanyɛkɛ nse bienu kakpe kudu ku batii ḥtaka oyila baawo suoto. Dikpe nii asaa ya mmle lɛkasa ɔwa, kafɔɔ dilootuo ale kayi kalookɔ ntɔcteetɛɛ.”

¹⁰ Yesu lakple aabue aakyakaa ale, “Nnle mataka baawo suoto, sekə nlekɔ kafɔɔ mataka baawo suoto. ¹¹ Nsɔ matukū osie kanya. Aka siene kafɔɔ makpe di aba aba. Sifiɛ ate ate kafɔɔ mawa di aba aba kpi. Ayekesaa ku atuosaa kafɔɔ matɔkyɔɔ di osi.

¹² “Fie di asaa ya mmle mawa nii, batii matikanko ye, mamufū ye. Batii mayɔ ye mankpee di bakante nnɛɛ kamɛ, mankanko ye di Yuda batii nsiisakɔ mante ye laayo. Babakpaa ye manwako baka anu ku batunletɛ anu, ta ami oso. ¹³ Di obe nwu nkpo kamɛ, osuku kule kuɔsekete kuɔta ye ale, biabue Yaa ɔlaa biene nwu nkpo. ¹⁴ Bita disie ye diisi ale, bilaabu ɔlaa wɔ bibabue mindiki ni suoto kanya diisi

bialesakatū. ¹⁵ Diekye ami omu nimata ye lesaatofo ku ɔlaa wɔ bibabue nii, ale balo lee dilabafuo oyila di ɔlaa lee nwu suoto, ee bayɔ nwu babudi ye kanya. ¹⁶ Balofote ku babilee suɔtɔbi ku banantii lee ku basiewo lee madiki ye manta, manlo bawo kaamɛ lee. ¹⁷ Battii bamuu makyidi ye ta ami oso. ¹⁸ Kafɔɔ bia asi lee onwini onwii dilabayu. ¹⁹ Nse biekpee situ osie kanya, bibawɛ nkpa be ninnaa ni kaloo.

Yesu Labue Obe Wɔ Baatii Mabiɛ Ni Yerusalem Okpoo.

²⁰ “Nse obe lele biɛnya bakpɛtɛ lemana Yerusalem okpoo beekyi, ni bietofo bile okpoo nwu obiɛ bee ntoowo. ²¹ Di obe nwu kamɛ, bietatii ba ninkpe ni di Yudia batoso basifi abokote osi balaawofa. Mba kafɔɔ ninkpe ni di okpoo kamɛ, baadie. Mba kafɔɔ ninkpe ni di nkpaayotū ku afe, batasinkple baawa okpoo kamɛ. ²² Diekye obe nwu kamɛ ninle letokonanfi ayi ya bɛɛte nii, ale selaa se di Kɔkpana Klekle lebuɛ ni kawa kaanya. ²³ Di obe nwu nkpo kamɛ, dibate ninwɛ osie ninta basanko ba ninlaka ni amɛ ku mba nikɔta babi nyɛɛfu nii. Dibuo dibinte mawa di kasɔ nwu suoto. Diekye Yaa ɔbɔ mawa di batii ba mmle suoto. ²⁴ Babalo bawo ku mpamii. Babamufu bawo kafɔɔ mansifiko nsɔ bambo suoto. Batii ba ninanle ni Yuda batii male sekà di Yerusalem suoto ninaase di obe wɔ di Yaa letɛ ma nii.”

Oti Obi Nwu Makple Anwa.

²⁵ “Atuosaa madiki suoto kayi di kuffi ku kowente ku awɛntrɛbi suoto. Di kasɔ ka mmle suoto, leyɛke mape batii di nnle mmuu kamɛ

mankpɔkpɔtɔ mambla biɔɔ ta lekpo sɛlɔ ku mmle diɔkpɛ ni oso. ²⁶ Batii matoloo ɔnyeeɛ ta leyɛke, di obe wɔ basoko ni lessaa le nikɔwa ni kaayi kamuu suoto oso. Diekye osi asaa kafɔɔ matididi di aba ya atika nii. ²⁷ Di nni nkpo sɛmaa, batii manya Ottii Obi nwu makyɔɔ di alokonkye kamɛ ɔɔwa ku osie kplɛ di leklekle kamɛ. ²⁸ Nse asaa ya mmle lèkyako ɔwa bielolaa suoto bisie ta bitoonyu osuku, diekye didiki lee obe ntɔɔtɛetɛɛ.

Bitekete Asaa Bikyeko Kolewoso Suoto.

²⁹ Ninfɛ di Yesu lape ma lɛkpa ninwii ale, "Bibu disi di kolewoso ku awoso bamba suoto. ³⁰ Nse biɛnya afata lenya koyie afɔle, mintofo bile kanto ɔnɔɔbee nfe kɔtɛetɛɛ. ³¹ Nkpo okle kafɔɔ nse biɛnya asaa ya mmle kɔwa, bietofo bile Yaa sekə kalekɔ nfe mawa.

³² "Nwaako kɔtɔkɔ ye nlɛ, asaa ya mmle amuu mawa fie baatii ba ninkpe ni nkpa nunua bamuu makpi. ³³ Osi ku kasɔ mafe, kafɔɔ ɔlaa nii nwu kulabafe diidii.

Dikpe Nii Biesie Di Anu Kesekese Kamɛ.

³⁴ "Bilolaa binyu nwaa bile biɛyɔ obe lee bita alesaa ole ku nta onyi osie bilenkeesa. Ku kayi ka mmle asaa omie kpинwu suoto. Se diele nkpo, dii nwu nkpo mawa ninmafua ye. ³⁵ Fɛ mmle di okū ndiki ni bɔkɛɛ. Diekye dibawa di batii bamuu suoto kaayi ka mmle kamɛ. ³⁶ Nkpo oso bilolaa binyu, biɛtɔɔpɛ ɔlaa bitɔɔta Yaa ale biawɛ osie minfe di asaa ya mmle nimawa ni amuu kamɛ, ale biakyɔɔ di ami Ottii Obi nwu anu di leklekle kamɛ di lɛkankoyi nwu

suoto.” ³⁷ Di ayi nwu nkpo kamε, Yesu latuo batii asaa di Yaa Olekatakɔ nwu kamε, kafɔɔ nse kɔtɔɔfɔ lewo, andie ansifi Nnɔnyi Awoso Kobokote suoto anaasie kakye. ³⁸ Di kolesetū biala batii nwu nkpo bamuu ntaka mankyε Yaa Olekatakɔ mananu nwɔ asaa otuo.

22

Yaa Oletate Ku Banɔɔfo Lakpee Asi Baawo Ale Baalo Yesu.

¹ Bloblo wɔ ninantaka ni, manlεε ni Okpi Diisi Ofe Dii ole bee lateεεtεε. ² Olebatate banɔɔfo ku kufiofa batuote latɔyεke ni batii nwu nkpo oso, baatoomie osuku wɔ suoto baafe manlo ni Yesu di lewofa kamε.

Yuda Latuna Ale Abadiki Yesu Anta.

³ Ninfe di Abonsam labuo di Yuda wɔ baatɔɔlεε ni Iskariot kamε nε. Yesu basaateketete lefosi batii banyɔ onwii lεma aale. ⁴ Nkpo oso Yuda lasifi olebatate banɔɔfo ku Yaa Olekatakɔ banyunte banɔɔfo nfñ. Ni aalaakakatεko ma di osuku wɔ suoto abafe andiki Yesu anta ma ni nε. ⁵ Suoto layɔɔ ma nwaa, ni baatɔɔkɔ nwɔ ale babatɔɔ koto nε. ⁶ Ni di Yuda latuna nε. Nkpo oso aakyε kasɔ aatoomie osuku wɔ suoto abafe andiki Yesu anta ni baatii dilabatofo nii.

Yesu Lalolaa Suoto Aata Okpi Diisi Ofe Dii Alesaa.

⁷ Nni kama, dii le manlo ni lefosobi di Okpi Diisi Ofe Dii labawo di bloblo wɔ ninantaka ni ayi ole kamε. ⁸ Ni di Yesu lakpee Petro ku Yohane aatɔɔkɔ ma ale, “Bitɔɔkyε bielaawa Okpi Diisi Ofe alesaa bitawo buɔbale.”

9 Ninfε baakaalε nwɔ ale, “Ofe foomie falε bulaawa alesaa nwu buse?”

10 Ninfε aadiki kanya ale, “Nse biebuo Yerusalem okpoo kame, osuɔtɔ onwii mawa amakyakako ye atuka ntu dibukii. Bitikanko nwɔ bielaabuo leyo le kame ababuo ni.

11 Biɛkaalε leyo nwu saate bile, ‘Saatuotε ale bukaalε fo nii, “Lemeyo kame di ami ku basaateketete nii, bubasiε munle Okpi Diisi Ofe alesaa?” ’ **12** Abatuo ye leyo dibinte ninwii beetofo beetika ni di osi, nfū beelolaa, beese ni asiɛsa. Biwa mie dii nwu alesaa ninfa bita wo.”

13 Baakyε baalaanya fe mmle di Yesu latɔkɔ ma nii. Ni baawa Okpi Diisi Ofe alesaa nwu ninfa baase ne.

Baale Saate Nwu Kɔtɔɔfɔ Alesaa.

14 Di obe nwu lawo nii, Yesu ku batɔkyente noɔ lasie kaasɔ di opunu katū babale ni alesaa. **15** Ni aatɔkɔ ma ale, “Dile mi dibiesaa ale kaleko ye Okpi Diisi Ofe alesaa ya mmle fie kafe diibuo kame. **16** Diekye kɔtɔkɔ ye ntikiti nle, noosinwa nya ɔbale dielaase di obe wɔ di Yaa sekə kalekɔ nwu lewa nii.”

17 Nni kamaa, ni di Yesu layɔ opū ni aapε Yaa sefa aabue ale, “Bifū nle mmle bienyi bita baawo. **18** Diekye kɔtɔkɔ ye nle dieyɔ ni nunua diesifi nii, noosinwa nta be mmle okle onyi diediki Yaa sekə kalekɔ nwu lewa.”

19 Ninfε aayɔ bloblo ni aapε Yaa sefa ne. Ni aafee, aayɔ aata ma, aabue ale, “Nle mmle ninle suoto nii sina se bεeyɔ bεeta ni diisi lee ne. Bibla nle mmle, bieyɔ bitoonyuma mi.”

20 Nkpo okle kafɔɔ, di alesaa nwu nkpo kamaa, aayɔ opū nwu, ni aabue ale, “Opū wɔ mmle ninle kanya ninii fole le di Yaa ɔeyɔ ntɔ nii eese ni kaanya, beewii ni kaasɔ di disi lee ne. **21** Kafɔɔ binyu lo, otii wɔ nimadiki mi anta ni lekpee kɔnɛɛ kaasefɛ ninfū oolekoe alesaa. **22** Ami, Otii Obi nwu nkpo, makpi fe mmle di Yaa lɛtɛ nii. Kafɔɔ otii wɔ nimadiki mi anta nii, aycɔsa!” **23** Ninfɛ di basaateketete nɔɔ nwu lakyako bawo ɔkaale ale, owe mɔ kaame lema nimabla lesaa le mmle okle.

Owe Ninlenke Di Basaateketete Bamuu Kame?

24 Kananfi kanwii lababuo di basaateketete nwu kame ale, owe lema boonyu ale alenke baamuu lema kame. **25** Ninfɛ di Yesu latɔkɔ ma ale, “Batii ba ninanle ni Yuda batii, baka lema kole sesaate di batii lema suoto. Batunlete ba mmle nkpe ɔeyooto mammie ale batii ba mmle katɔɔleɛ ma ni dile ni basiɛwo. **26** Kafɔɔ diele nkpo dikpe ni ninte kaame lee. Kafɔɔ nwɔ ninle ni ɔnɔɔfo kaame lee dikpe nii ambla suoto fele obisɔ. Nwɔ kafɔɔ ninle ni tunlete kabla suoto fele kpɛmblate. **27** Owe ninle ɔnɔɔfo, nwɔ ninsie ni kaasɔ anle ni alesaa εε, sεε nwɔ ninse ni opunu? Kame lekpa klekle ale nwɔ ninsi oole ni alesaa ninle ɔnɔɔfo. Kafɔɔ nsi ye kaame fele kpɛmblate. **28** Biakpee situ biatikankoe di abuo nii amuu kame. **29** Nioso fe mmle di Teemi lɛtɛɛ otumi ale kale ni sekɔ, nkpo okle kafɔɔ mata ye otumi nwu ne. **30** Bibale alesaa minnyi di alesaa nii kalekɔ di sekɔ nii kalekɔ. Bibasie di akakpomii suoto minnle sekɔ di Israel nfaabi lefosi nnyɔ nwu suoto.”

Yesu Labue Aate Ale Petro Masī Nwɔ.

³¹ Yesu latōkō Simon Petro ale, “Simon, Simon, Satana lekaale osuku ale ccsa ye annyu, anse abiene andiki di alalaale kame fe mmle di fekpente nfeele kufuo andiki ni kaamō kamē.
³² Kafō ntcōrpe ɔlaa lēta Yaa diisi lefō Simon, ale ofū onu lefō dilaayu. Ale nse fēepē feekple fēewa ɔkye nii, faakpee babilee suotobi osie.”

³³ Ninfé di Petro latōkō nwɔ ale, “Saate, lelolaan suoto nle munko fo buate leeyo, nkpi ku afō!”

³⁴ Ninfé di Yesu latōkō nwɔ ale, “Petro, kōtōkō fo nle, kakye ka mmle fiē di kōokō mabo nii, fababue sitie simu fale faaye mi.”

Koto Katofee Ku Kokpetetofo Ku Kapamii

³⁵ Ninfé di Yesu lakaale basaateketete nōc ale, “Obe onwii kame lakpee ye ni kōtō, bitaklee ni koto katofoe ku kokpetetofo ku ntokota, lesaa lewo lafi ye?”

Ninfé baadiki kanya ale, “Lesalesaa ditafī wo.”

³⁶ Ninfé di Yesu latōkō ma ale, “Kafō nunua otii lele ninkpe koto katofoe kawo ee kokpetetofo kowo, aayō aklee. Otii wō kafō ninnaa ni kapamii, ayc awu nōc asunsū alaaya kapami kawo. ³⁷ Diekye kōtōkō ye nle, Kōkpana Klekle ɔlaa wō kuobue nii ale, ‘Bababu nwɔ mankpee di bakpileblate kame,’ dikpe nii diewa kaanya. Diekye ɔlaa wō bēekpana ni di suoto nii, nwaako nfe diċċwa kaanya.”

³⁸ Ni basaateketete nōc nwu latōkō nwɔ ale, “Saate, nnya mpamii nnyo!”

Ni di Yesu latōkō ma ale, “Mminkpo mpō.”

Yesu Lape ɔlaa Aata Yaa Di Nnɔnyi Awoso Kobokote Suoto.

³⁹ Yesu ladie di okpoo aasifi Nnɔnyi Awoso Kobokote osi fe mmle ambla nii. Ni baasaateketete nɔɔ kafɔɔ latikanko nwɔ nɛ. ⁴⁰ Obe wɔ baadu ni leba nwu nkpo, Yesu latɔkɔ basaateketete nɔɔ ale, “Bipɛ ɔlaa bita Yaa ale bilaabuo di ɔɔ onyu kamɛ.” ⁴¹ Ni aadiɛ ma aakyɛ sitū keεke, ni aare akunkyi aare ɔlaa aata Yaa nɛ. ⁴² Ni aabue ale, “Teete, nse dilefɔ, ni faata dibuo opū wɔ mmle kufe mi. Kafɔɔ diele dibiesaa nii, ta dibiesaa lefɔ diwa kaanya.” ⁴³ Ninfɛ di Yaa tɔkyɛntɛ onwii lakyɔɔ aakyɛ osi abakpee nwɔ osie nɛ. ⁴⁴ Ni aakple aare ɔlaa aata Yaa osie kanya ku dibuo di otu kamɛ. Apipi ya niatoosoo aatookpete ni kaasɔ late fe ntɔ.

⁴⁵ Obe wɔ di Yesu laloo ni ɔlaa ɔpɛ ota Yaa, aataka aawa basaateketete nɔɔ nfū, aabanya ma baatɔɔkyɔsii. Ta lehaale niatika ma ni di suoto oso. ⁴⁶ Ninfɛ aakaale ma ale, “Be lessaa oso biɔkyɔsii? Bitaka biepɛ ɔlaa bita Yaa mmle minaabuo ni di ɔɔ onyu kamɛ.”

Ole Batate Banɔɔfo Lata Baamufū Yesu.

⁴⁷ Obe wɔ di Yesu n-yɛ ɔɔkakate nii, batii dikudi ninwii niakye baawa. Yuda wɔ niale ni saateketete di lefosi banyɔ nwu kamɛ nialeko ma katū. Ni aakyɛ Yesu nfū ale ɔɔlaaminko nwɔ ambla nwɔ aatuu nɛ. ⁴⁸ Kafɔɔ Yesu lakaale nwɔ ale, “Yuda, atuu ɔbla fɔɔyɔ fandiki ami, Otii Obi nwu, fanta?”

⁴⁹ Obe wɔ di basateketete nwu lanya lessaa le nimawa nii, baakaale Yesu ale, “Saate, bublako mpamii loo ɔkpɛ?” ⁵⁰ Ninfɛ di saateketete onwii

layɔ kapamii aasafɔ Oletate Nɔɔfo kpɛmblate nɔɔ koletanee kotoko aakpa ne.

⁵¹ Kafɔɔ Yesu latɔkɔ nwɔ ale, “Oowo! Tambla nkpo!” Ninfɛ di Yesu layɔ kɔnɛe aatika di kpɛmblate nwu nkpo kotoko, ni kuakple kuate fe mmle kuate ni ne.

⁵² Ni di Yesu lakaale olebatate banɔɔfo ku Olekatakɔ banyunte banɔɔfo ku okpoo banɔɔfo nwu niawa nwɔ ni omufū ale, “Be oso di mpamii ku nwosoku bikle biewa mi omufū fele kpileblate nɔɔfo nle? ⁵³ Lasiɛ di Yaa Olekatakɔ nwu nkpo dii biala, kafɔɔ bitatɔkɔ bile biomufū mi. Kafɔɔ Yaa nieta ye osuku wɔ mmle. Ni di Satana ditunu kame otumi kole sekà nunua ne.”

Petro Lasī Yesu.

⁵⁴ Baamufū Yesu ni baakpaa nwɔ baasifiko Oletate Nɔɔfo leyo ne. Petro latikanko nwɔ sɛɛmaa fanfa. ⁵⁵ Batii bawo lakutaa ɔtɔ di leyo nwu nkpo kaflɔnkɔ, ni di Petro kafɔɔ lakyɛ aalaasisie ma kaame aatɔwɔfɔ ɔtɔ nwu ne. ⁵⁶ Obe wɔ di ɔsankɔ kpɛmblate onwii lanya Petro nsi ni di ɔtɔ nwu katū, ni aanyu nwɔ tuwii aakyɔɔ nwɔ lɛnɛe aabue ale, “Osuntɔ wɔ mmle kafɔɔ Yesu tikankote ale.”

⁵⁷ Kafɔɔ Petro lasī aabue ale, “ɔsankɔ, diidii ninye nwɔ!”

⁵⁸ Di obe kakuii semaa, osuntɔ onwii kafɔɔ lanya Petro ni aatɔkɔ nwɔ ale, “Afɔɔ onwii lema fale!”

Kafɔɔ Petro lakple aadiki kanya ale, “Osuntɔ, kpa woo! Ninye nwɔ!”

⁵⁹ Diabla ni fe lebombo ninwii semaa, osuntɔ bamba onwii lakple aabue osie kanya aatika difuɔ ale, “Glaa ɔnanfi kuonwii nnaa ale osuntɔ

wɔ mmle diele Yesu tikankotε, diekye Galilea otii ale!"

⁶⁰ Kafɔɔ Petro ladiki kanya ale, "Osuɔtɔ, ninye ɔlaa wɔ foobue nii!" Nfanwu aye ɔɔkatate nii, kɔɔkɔ niabo. ⁶¹ Nfanwu di Saate lamunikii aanyu Petro tuwii ne. Ninfɛ di Petro lanyuma ɔlaa wɔ di Saate latɔkɔ nwɔ ni ale, "Fie di kɔɔkɔ mabo ni ku kakye ka, fababue sitie simu fale faaye mi." ⁶² Ni di Petro ladie aasifi kayi aalaawi kaku osie kanya ne.

Yuda Batii Asaa Banyunte Lama Yesu Baape Nwɔ.

⁶³ Batii ba niatoonyu ni Yesu, baama nwɔ, baape nwɔ kafɔɔ. ⁶⁴ Baanii nwɔ anu baape nwɔ, ni baakaale nwɔ ale, "Owe niɛpɛ fɔ? Tɔkɔ wo!" ⁶⁵ Ni baatufa nwɔ kafɔɔ di sisuku bamba kpinwu suoto ne.

Baakpaa Yesu Baawako Bakante Nwu.

⁶⁶ Obe wɔ kaale lase nii, okpoo banɔɔfo ku olebatate banɔɔfo ku kufiofa batuote labasi, ni baakpaa Yesu baawako bawokaleekɔ nwu nkpo ne. ⁶⁷ Di bawo kaleekɔ nwu, ni baakaale Yesu ale, "Tɔkɔwo nse afɔ ninle Kristo wɔ bɛɛpɛ ni ɔfɔɔ."

Ninfɛ aadiki kanya ale, "Mintɛ lɛtɔkɔ ye, bilɔɔwa mi ɔbaftu onu. ⁶⁸ Ni nse lɛkaale ye ɔlaa owo kafɔɔ, bilɔɔwa mi kanya okpee. ⁶⁹ Kafɔɔ diɛyɔ ni di nua diesifi nii, ami, Otii Obi nwu, masie di Yaa wɔ ninlenke ni oletaneekyε."

⁷⁰ Ninfɛ bamuu lɛma baakaale nwɔ ale, "Nioso afɔ ninle Yaa Obi nwu ne?"

Ninfɛ aadiki kanya ale, "Aye bamu nikobue bilɛ nnwɔɔ nle ne."

71 Ni baabue ale, “Diesinfĩ ale otii kuonwii kayila ɔlaa owo kamaa! Awo bamu butoonu ɔlaa wɔ eebue nii!”

23

Baakpaa Yesu Baawako Pilato Nfū Aakaale Nwɔ Selaa.

1 Nfanwu batii dikudi nwu lataka baakpaa Yesu baasifiko Pilato nfū. **2** Nfa baakyako nwɔ kanya obudi ale, “Buomufū osuɔtɔ wɔ mmle ɔɔkyɔnkyɔ batii loo anfenko di osuku lalaale suoto. ɔɔtɔkɔ ma ale batanta apkooto lɛma baata Roma Batii ɔka Kple, ni aatɔkɔ ma kafɔɔ ale nnwɔɔ ninle Kristo wɔ bɛɛre ni ɔfɔɔ, ni ɔka ale.”

3 Ni di Pilato lakaale nwɔ ale, “Afɔ ninle Yuda batii ɔka nwu ne?”

Ninfé di Yesu ladiki kanya ale, “Nnwu fatoobue ne.”

4 Ni di Pilato latɔkɔ olebatate ku batii dikudi nwu nkpo ale, “Ninya okpile kuonwii di osuɔtɔ wɔ mmle suoto baalo nwɔ ni lɛpɔɔ.”

5 Kafɔɔ baayila osie kanya baabue ale, “Assaa otuo nɔɔ kokpee kudu di Yuda batii kamɛ. Aakyɛ kasɔ di Galilea, ni atɔɔwa εɛbadu nfū kafɔɔ ne.”

Baakpaa Yesu Baakyenku Herode Nfū Aakaale Nwɔ Selaa.

6 Obe wɔ di Pilato lanu ni ɔlaa wɔ mmle, aakaale ale, “Ni osuɔtɔ wɔ mmle Galilea otii ale?”

7 Nkpo oso obe wɔ aatofo ale Yesu lekye ni Galilea kale kakye ka di Herode kole ni sɛka, ni aakyeesee nwɔ Herode nfū ne. Herode wɔ mmle lawe di Yerusalem di obe nwu kamɛ.

8 Suoto layɔɔ Herode di obe wɔ aanya ni Yesu. Diekye atoonu nwɔ leyooto kofokofoko,

aatoomie kafčo ale aanyčo. Aatoonyu osuku kafčo ale aanya Yesu kčbla sekpe se ničbla ni čkpe. ⁹ Nkpo oso Herode lakaale Yesu selaa kpинwu, kafčo Yesu ditadiki ɔlaa kuonwii kanya. ¹⁰ Nioso olebatate ku kufiofa batuote ladie baawa sitū bababudi Yesu kanya, osie kanya. ¹¹ Herode ku bakpεte noč lama Yesu osie kanya baatufa nwč. Ni baayo awukyč biene biene anwii baakpee nwč, ni baakplesčo baasifiko Pilato nfū ne. ¹² Dii nkpo kale, Herode ku Pilato lakple basiewo. Diekye saa, bawo balo baale.

Pilato Lalo Yesu Lepčo Ale Eesičko Kukpi.

¹³ Pilato lalεe olebatate, okpoo banččfo ku batii bamuu aasiisa. ¹⁴ Ni aatčkø ma ale, “Bičkpaas osučč wč mmle bičwakoe bile, ɔčkyčnkyč ye afenko di osuku lalaale suoto. Ntoowolaa ɔlaa nwu kamε di anu lee. Kafčo ninnya okpile kuonwii di selaa se biebue bietika nwč ni di suoto. ¹⁵ Herode kafčo dienya okpile kuonwi di suoto noč fie ɛɛkplesa nwč eekyesee wo. Otii wč mmle diebla okpile kuonwii baalo nwč lepcč manta ni kukpi. ¹⁶ Nkpo oso mata mampe nwč, nindie nwč ansifi.” ¹⁷ Di Okpi Diisi Ofe Dii ole biala kamε, Pilato leblasaa dile andie leyotente onwii anta ma.

¹⁸ Nfa nfe baamuu lema baayiisa kudu osie kanya ale, “Lo nwč! Faadič Baraba fata wo!” ¹⁹ Baraba wč mmle, baate nwč leeyo di kudu kowo aakpee ni di okpoo kple kamε aalo ni batii bawo oso.

²⁰ Pilato lamie ale oodie ni Yesu oso, aakple aalaakakate aata batii nwu nkpo. ²¹ Kafčo baakple baayiisa kudu baalenkeesa kčkasale ale,

“Pe nwɔ sibue fakaasa koowoso suoto! Pe nwɔ sibue fakaasa koowoso suoto!”

²² Ninfə di Pilato lakple aakaale ma ditiefa ale, “Oməenkpile εεbla fie? Ninnya lesaa le εεbla ni oso kalo nwɔ ləρɔɔ ale aakpi nii! Mata mampə nwɔ kowesee nindies nwɔ ansifi.”

²³ Kafɔɔ mia nfe baakple baatɔɔfaa osie kanya baatoobue ale, “Dikpe nii feeta bεερε Yesu sibue bεεkaasa koowoso suoto.” Leyεntεle kudu lema nwu labalenkee Pilato nnεε. ²⁴ Nkpo oso Pilato lababudisa ɔlaa nwu nkpo fe mmle baatii nwu komie nii. ²⁵ Ni aadie otii wɔ boomie ni aata ma ne. Nwɔ baate ni leeyo ta kudu ko aakpee, aalo ni batii oso. Ni aadie Yesu aakpee ma ninnεε kamε ale balaabla nwɔ fe mmle boomie ni.

Bakpete Lape Yesu Sibue Baakaasa Koowoso Suoto.

²⁶ Bakpete lakpaa Yesu baasifiko. Ni di obe wɔ bakyε di osuku boofe nii, baakyakako Kirene otii onwii baatɔɔlεε ni Simon aakye kakpaayotū ɔowa Yerusalem. Ni baayilasa nwɔ, baanyinka nwɔ ale afū Yesu kowoso nwu atuka. Ni aafū aatikanko Yesu ne. ²⁷ Batii dikudi lewo latikanko Yesu di nkpaamaa, basanko bawo kafɔɔ lasie ma kaame baatoowi kaku baatɔɔtɔɔ. ²⁸ Ninfə di Yesu lamunikii aatɔkɔ ma ale, “Yerusalem basanko, bitanwi biatesε, kafɔɔ biwi bita suoto ku babilee. ²⁹ Diekye ayi awo kɔwa baatii mabue ale, ‘Suoto siyɔɔ ɔlema ku olofofɔtɔ wɔ kamε di obi didie ni diidii ku lεnyεε le manayinyεεfu ni diidii!’ ³⁰ Obe nwu ninle obe wɔ batii matɔkɔ abokote ale, ‘Bibiε bikpete wo!’ Mantɔkɔ kobokotee kafɔɔ ale, ‘Biwofasa wo!’ ³¹ Diekye nse kowoso kɔɔnle kofie mmle okle mɔ, ni lε kookosole mafie?”

32 Di obe nwu nkpo kamε, bakpεtε nwu lak-paa basuotε banyɔ banwii ninle ni bakpileblate baakyakaa di Yesu, boofenko olo. **33** Obe wɔ baadu ni lεba le bɔɔlεs ni Otii Disi Dikuifi, baapε Yesu sibue baakaasa koowoso suoto ninfa, ku bakpileblate banyɔ. Baapε onwii baakaasa di Yesu oletanεεkyε, ɔnyɔɔfa kafɔɔ di ɔmentukyε. **34** Ni di Yesu labue ale, “Teete, yɔ fakyε ma, diekye baaye lesaa le bɔɔbla nii.” Nni kamaa, baayo awu nɔɔ baase bawo di obe wɔ baawii ni atrebi baatofo n-ya di obiala lεma kayɔ nii.

35 Batii dikudi nwu nkpo layila baatoonyu nwɔ. Ni di Yuda batii batunlete nwu kafɔɔ layila baatɔɔma Yesu baatoobue ale, “Aafū batii bamba nkpa, bita afū suoto nɔɔ kafɔɔ, nse nnwɔɔ ninle Kristo wɔ di Yaa lεre ni ɔfɔɔ!”

36 Nkpo okle di bakpεtε nwu kafɔɔ lama Yesu ne. Baayo nta nyankale baakyenku nwɔ ale anyi.

37 Ni baatɔɔ nwɔ ale, “Nse afɔ ninle Yuda batii ɔka, faafū suoto lεfɔ nkpa buonyu!”

38 Di lεkantosi nɔɔ, baakpana selaa se mmle ale, “Nnya Yuda Batii ɔka ninle nwɔ ne.”

39 Bakpileblate banyɔ ba baapε baakasa ni koowoso suoto onwii lεma latufa Yesu ale, “Diele afɔ ninle Kristo wɔ bεεre ni ɔfɔɔ? Diki suoto faadiki wo kafɔɔ εε!”

40 Kafɔɔ ɔnyɔɔfa lasi ɔlaa aatɔkɔ nwɔ ale, “Fɔlɔɔyεke Yaa? Beelo fɔ lεrɔɔ fe mmle okle beelo nwɔ ni lεrɔɔ. **41** Kafɔɔ awo lεrɔɔ le beelo wo nii, lesieko wo. Diekye lesaa le buɔbla ni letokonanfi buofū ne. Kafɔɔ aabla okpile kuonwii.”

42 Ninfə aatəkə Yesu ale, “Yesu, nyuma mi nse feebuo sekə lefə ole kame.”

43 Ni di Yesu latəkə nwɔ ale, “Nwaako kətəkə fɔ nle, mιe wɔ mmle, munko fɔ bubabuo Paradiso kame.”

Baalo Yesu.

44 Di obe wɔ diapə ni fε kakū lefosi elomu εnyɔ, kufī ladie ɔpε, kayi kamuu lawəfɔ, dialaase di kətəfɔ elomu etiε kame. **45** Ni di dibula le niasaka ni di Yaa Olekatakə labε di nkyε nnyɔ nε.

46 Ni di Yesu lafaa osie kanya aabue ale, “Teete, leyɔ ninwuna nii, lekpee di nnεs lefə kame.” Obe wɔ aabue ɔlaa wɔ mmle aaloo nii, ni aakpi nε.

47 Baakpεtε ɔnɔɔfo nwu lanya lesaa le niawa nii, ni aatansa Yaa aabue ale, “Nwaako otii wɔ mmle, otii biene ale.” **48** Obe wɔ baatii ba niawa ni nfa ale bɔɔbaanyu lesaa le nikɔwa ni lanya ni lesaa le niawa nii, baakple baasifi ayo, baayo nnεs baatika nintεs ku sεyaami. **49** Batii ba bamuu ninye ni Yesu ku basanko ba niatikanko nwɔ baakye ni Galilea layila kaakyonkə baatoonyu assaa.

Yosef Arimatea Otii Niakookaa Yesu.

50 Osuɔto onwii lawε baatɔɔlesε ni Yosef. Aakye Arimatea di Yudea kasɔ suoto. Aale otii biene wɔ baatii mbu ni osie kanya. Aasie aatoonyu osuku obe wɔ di Yaa sekə kalekɔ mawa nii. **51** Mintε aale Yuda batii Bakante onwii lεma yi, atatunako ma di disibu le baabla ni ku lesaa le baabla ni suoto. **52** Aakye Pilato nfū aalaafū Yesu kpi. **53** Ni aasoosa kpi nwu nkpo di kowoso suoto aayɔ dibula fututu aamiminisa nwɔ di suoto. Ni aayɔ nwɔ aalaakookaa di ofuɔnnntuu ɔkyə wɔ kame

manayikookaa ni otii kuonwii kaame diidii ne.
54 Dii nwu nkpo Fiida diale, baatoololaa suoto baatɔɔta Lenyeεeteyi kale ɔse.

55 Basanko ba niatikanko Yesu baakye ni Galilea latikanko Yosef baakyε baalaanyu ɔkyα nwu ku mmle baayε Yesu baakookaa ni kaame.
56 Ni baakple baasifi leyo, baalaabla kɔfa kɔnɔkɔnɔ ku nnɔnyi be man-yɔ manfifia ni di kpi suoto baate. Ni baate ɔnyεε di Lenyeεeteyi suoto fe mmle di Yuda batii kufiofa nwu letuo ni ne.

24

Yesu Lataka Aakye Bakpi Kame.

1 Di Kɔsida kolesetū, basanko nwu lakyε ɔkyα nwu katū, baaklee kɔfa kɔnɔkɔnɔ ko baabla baase nii. **2** Ni baanya ale baamunusa difuɔ nwu di ɔkyα kanya ne. **3** Nkpo oso baabuo di ɔkyα nwu kame, kafɔɔ batanya Saate Yesu kpi nwu. **4** Lesaa nwu labla ma yaaa. Nfanwu batii banyɔ banwii niakyɔɔ baakpee asaa fututu ya nikosesee ni di anu. **5** Basanko nwu layεke osie kanya, ni baawakosa asi kasɔ baata batii nwu ne. Ni baatii nwu lakaale, ma ale, “Be oso biowolaa otii wɔ ninkpe ni nkpa baakpi kame? **6** Anaa ninfū. Atɔɔtaka! Binyuma ɔlaa wɔ aatɔkɔ ye ni, di obe wɔ aawε ni di Galilea ale, **7** ‘Dikpe nii, bεεyε Otii Obi nwu beekpee di bakpileblate nnεε kame. Bεεre nwɔ sibue bεεkaasa koowoso suoto. Ni ayi atie kamaa, abakple antaka ankye bakpi kame.’ ” **8** Ni baasanko nwu lanyuma selaa nɔɔ nwu nkpo ne.

9 Baakple ni di ɔkyə nwu katū, baabue selaas se mmle simuu baatoko batokyente lefosi onwii nwu ku babule bamuu. **10** Basanko nwu niale Maria Magdalene ku Yohana ku Maria wɔ ninle ni Yakobo ɔya. Mma ku basanko bamba niatoko batokyente nwu selaas se mmle ne. **11** Kafɔɔ batokyente nwu lanyu ale, selaas se baasanko nwu lebue nii, selaakuu sile batafū sī baanu. **12** Kafɔɔ Petro lataka aatoso aakyə ɔkyə nwu katū. Obe wɔ aadu ni nfa aakensa aanyu ɔkyə nwu kame, kafɔɔ akookaabula lete aanya, atansinnya lesalesaa. Ni aakple aasifi leyo, diabla nwɔ yaaa di lesaa le niawa ni suoto.

Batii Bawo Lanya Yesu Di Emaus Osuku.

13 Di dii nwu nkpo kale kafɔɔ, Yesu batikankotε banyɔ banwii latoofe kakpaayotū kanwii manles ni Emaus kame. Diawo fe ako akuensī diedie ni di Yerusalem. **14** Baatɔɔkakateko bawo di lesaa biala niawa ni suoto. **15** Obe wɔ bakyε bɔɔkakate mambuo ni seelaa nwu kame yi, Yesu omu lakpukuti aateetee ma, baakyako ɔkyε. **16** Baanyɔɔ, kafɔɔ batatofo ale nnwɔɔ diale.

17 Ninfε di Yesu lakaale ma ale, “Omɛnlaa bikyε biobue di osuku?”

Ni baayila baabla anu ku senyaami. **18** Ni di onwii kaame lema bɔɔles ni Kleopa lakaale Yesu ale, “Lete lefɔ ninle ɔfɔɔ di Yerusalem, fananye asaa ya niɛwa ni ninfa di ayi aseε ya mmle kame?”

19 Ni di Yesu lakaale ale, “Be lesaa niawa?”

Ni baadiki kanya ale, “Asaa ya niawa ni di Yesu Nasaret Otii suoto. Osuɔtɔ wɔ mmle Yaa ɔlaa buetete aale. Nnwɔɔ di Yaa ku batii bamuu

lenya ale, nwaako akpe otumi di asaa n̄o obla ku selaa n̄o obue kame ne. ²⁰ Yuda batii Yaa olebatate banɔɔfo ku okpoo banɔɔfo loo layɔ nwɔ baakpee di Roma abaa ḡeɛfo nn̄eɛ kame, aalo nwɔ kukpi lepɔɔ baakaasɔɔ koowoso suoto baalo. ²¹ Nse nnwɔɔ buotika anu bulɛ ale otii wɔ nimadiki ni Israel batii bamuu ne. Ni nni nkpo kamaa, mie ninle dii tiefa di selaa se mmle lawa ni ne. ²² Basanko bawo kafɔɔ lebatɔkɔ wo ɔlaa wɔ niɛbla ni ɔkpe. Diekye bɛɛkye ɔkyu nwu katũ mie ku kolesetũ ko mmle. ²³ Kafɔɔ baanya kpi n̄o. Beekple bɛɛwa bɛɛbatɔkɔ wo ale Yaa batɔkyentɛ bawo lediki suoto beetuo ma. Ni bɛɛtɔkɔ ma ale, Yesu nkpe nkpa ne. ²⁴ Batii bawo lɛkye ɔkyu nwu katũ bɛɛlaanya fe mmle baasanko nwu lebabue nii, kafɔɔ baanyɔɔ.”

²⁵ Ninfe di Yesu latɔkɔ ma ale, “Biébe anu! Lε oso di ofū onu lee lebla buɛɛ di asaa ya di Yaa ɔlaa buetete nwu latɔkɔ ye ni suoto? ²⁶ Bieye bile dikpe ni Kristo wɔ bɛɛre ni ɔfɔɔ kafe diibuo le mmle kame fie ababuo di sekâ n̄o klekle nwu kame?” ²⁷ Ni di Yesu ladiki kɔsa aata ma di selaa se beebeue ni di Kɔkpana Klekle Kukũ kame di suoto n̄o ne. Dieyɔ ni di Mose obe dielase ni di Yaa ɔlaa babueté bamuu obe suoto.

²⁸ Obe wɔ nfe bɔɔteetɛɛ ni kakpaayotũ ka boofe nii, Yesu labla fe ɔɔwaale anfe sitũ. ²⁹ Kafɔɔ baasi baatɔɔ baatɔkɔ nwɔ ale, “Kufi nfe mamɛɛ ni oso, akple aate di ɔkye lɛma.” Nkpo oso aatikanko ma ale ɔɔlaate di ɔkye lɛma.

³⁰ Aasiɛ kaasɔ ale oole alesaa ku mma. Ni aayɔ bloblo aapɛ Yaa sɛfa, ni aafee aayɔ aata ma ne. ³¹ Nfanwu anu lɛma niasekɛtɛ baanya Yesu baate nsū, kafɔɔ aayu di anu lɛma. ³² Ni baatoobue

baatɔ̄tɔ̄kɔ̄ bawo ale, “Obe wɔ̄ εεtɔ̄kakate kowo ni di osuku eetoodiki Kókpana Klekle Kukũ kaso εεtɔ̄ta wo nii, suoto diεtɔ̄yɔ̄ wo di otu kame?”

³³ Nfanwu ni baataka baakple baasifi Yerusalem ne. Ni baanya batɔ̄kyɛntɛ batii lefosi onwii nwu ku batii bamba beesi basi ne. ³⁴ Ni baatɔ̄kɔ̄ batii nwu banyɔ̄ ale, “Nwaako Saate nwu ntɔ̄taka eekye bakpi kame, atoodiki suoto eetuo Simon.” ³⁵ Ninfɛ di batii nwu banyɔ̄ kafɔ̄ latɔ̄kɔ̄ ma lesaa le niawa ni di osuku suoto ku mmle baanyɔ̄ baate ni nsū di obe wɔ̄ aafee bloblo aata ma nii.

Yesu Ladiki Suoto Aatu Basaateketete Nɔ̄ɔ.

³⁶ Obe wɔ̄ baatii nwu nkpo banyɔ̄ nkle ɔ̄laa lɛma boobue manayiloo nii, nfanwu Yesu niadie aayila ma kaamɛ. Ni aatɔ̄kɔ̄ ma ale, “Atoko ɔ̄kyɛ ole disieko ye.”

³⁷ Lεyɛkε lapɛ ma osie kanya ale kpi bɔ̄onya. ³⁸ Kafɔ̄ aatɔ̄kɔ̄ ma ale, “Be oso diisibu lee kɔ̄kpɔ̄kɔ̄tɔ̄ nkpo? Be oso minofū binu? ³⁹ Binyu mi nnɛɛ ku nkpa. Biɛkpankoe kafɔ̄ binyu, bietofo bile ami dile. Diekye kpi nnaa suoto sina ku akufi, fe mmle biɔ̄nya bile nkpe nii.”

⁴⁰ Aabue nwu aaloo nii, ni aatu ma nnɛɛ ku nkpa. ⁴¹ Suoto latɔ̄cɔ̄yɔ̄ ma osie kanya, di lesaa nwu labla ma ni ɔ̄kpe, batafuo ofū onu. Ninfɛ di Yesu lakaale ma ale, “Lelesaa lewo nkpe ye ninfū?” ⁴² Ni baayɔ̄ kakpaku fiele kawo baatɔ̄ ne. ⁴³ Ni aafū aawee di anu lɛma ne.

⁴⁴ Ninfɛ di Yesu latɔ̄kɔ̄ ma ale, “Nle mmle ninle assaa ya latɔ̄kɔ̄ ye ni di obe wɔ̄ lawe ni di ɔ̄kyɛ lee ne. Lesaa lele bɛɛkpana beekyeko suoto nii

di Mose kufiofa kukū kame, Yaa ɔlaa babuetetē akū kame ku sinu akū kame ntɔɔwa kaanya.”

⁴⁵ Ni aasəkete ma disibu baanu Kɔkpana Klekle Kukū kasɔ ne. ⁴⁶ Ni aatɔkɔ ma ale, “Bɛekpana bεete ale Kristo wɔ bεεre ni ɔfɔ mafe diibuo kame, abataka ankye bakpi kame di dii tisfa suoto. ⁴⁷ Ni leeyooto nɔɔ kame basateketetē nɔɔ kayie lɛkya manta nnle mmuu ale baakyisa situ, ale Yaa kayɔ sikpile lɛma ankye ma. Lɛkya le mmle oyie makye kasɔ di Yerusalem. ⁴⁸ Aye ninle selaa se mmle kamaa bayilate kaakɔ lele ne. ⁴⁹ Ami omu mayo lesaa le di Teemi lebuɛ εεtε ale abata ye ni nkyesee ye. Kafɔɔ bisie di Yerusalem okpoo kame dielaase di obe wɔ di otumi makye osi kumabuo ye ni kaamɛ.”

Yaa Lakpaa Yesu Aasifiko Osi.

⁵⁰ Nni kamaa, Yesu lakpaa basateketetē nwu adieko di Yerusalem okpoo kame aasifiko Betani ɔlɔɔkɔ. Ni aakplesa nnɛɛ katoo aatama dikusekuse ne. ⁵¹ Di obe wɔ ɔɔta ma ni dikusekuse ninfa, ni baabla baawo suoto ne, ni di Yaa lakpaa nwɔ aasifiko osi ne. ⁵² Ninfɛ baare akunkyi basumu nwɔ, ni baapple baasifi Yerusalem ku suoto lɛyɔɔ nimu ne. ⁵³ Ni baatoɔkye Yaa Olekatakao wlawla baalaatɔotansa Yaa ne.

Yaa Kanya Ninii Føle Selεε

Selεε: Yaa Kanya Ninii Føle Selεε New Testament

copyright © 2008 Wycliffe Bible Translators, Inc.

Language: (Selεε)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Feb 2024 from source files dated 29 Jan 2022

b86b27c9-33ee-5380-a452-244df2dc60c6